

ሃዋሬታ አሱዋ ጋሳ ቆፋ

ሃዋሬታ አሶ ማፃፋይ፣ ሉቃስ ምንጌላ ካሊዲ ፃፊው ማፃፋ። ማፃፋስ ደዲያ ዋና ቆፋይ ኮይሮ ዮሱሳ ካሊዲ አሳቲ ጌሻ አያናይ ካሌሴን፣ ኢያባ አዲያ ቃላ፣ «ዮሩሳሌምን፣ ዩሁዳ ቢታ ኡባን፣ ሳማሬን፣ ሳዓ ጋፃ፤ ጋፃ ጋካናው» (1:8) ምንጌላ ቢታ ኡባ ዋቲ ጋሲዳኮ አዳናሳ። ማፃፋይ፣ አማኖይ አይሁዲ አሳታ ጊዶን ዶሜቲዲ፣ ኩሜሳ አላሜን ደዲያ አሳ ኡባ አማኖ ጊዳና ጋካናው ዋኒዲ ዳልጊዳኮ አዲያ ታሪኬ። ሃ ማፃፋ ፃፊይ፣ አማኒያ አሳቲ ሮሜ ካዎቴሳ ኩንዲሳናው ጋርሳራ ማቁቲያ አሲ ጊዶናይሳኔ አማኖይ አይሁዲታ ሃይማኖቱ ፖሎ አሲይሳ ጊደይሳ ኤሪሳናው ኬሂ ዳቡሪዲ አሲስ።

ሃዋሬታ አሶ ማፃፋን ዮሱሳባ አዲያ ምንጌላይ ጋኪያ ቤሳይ ዎዴን ዎዴን ዳልጊ ዳልጊ ቤይሳኔ ዎሳ ኬሴ ኤቁዳይሳ ቆንጨሲሲያ ሄሹ አይፌ ኪፊሌታን ሻካናው ዳንዳዔቴስ።

1. አማኖይ ዮሱሴ ሳሎ ኬዩ ሲሚን ዶሜቲዳይሳ።
2. አማኖይ ኢስራዔሌ ቢታ ኡባ ጋኪዳይሳ።
3. ሮሜ ጉጂዲ ሜዲቲራኔ አባ ዩሹዋን ደዲያ ቢታ ኡባን ዳልጊዳይሳ ቤሴስ።

ሃዋሬታ አሶ ማፃፋን አዲዲ ቤንቴይ ጌሻ አያና አሶ ጊዲሺን፣ ጴንፂቆስ፤ ጋላስ ዮሩሳሌምን ደዲያ አማኒይሳታ ቦላ ዎልቃራ ዎዲዳይሳ አዴስ። ሄሳዳካ፣ ማፃፋ ጊዶን ቆንጨዳ አሶታ ኡባን ቤንቲዳይሳዳ ጌሻ አያናይ ዎሳ ኬሳኔ ዎሳ ኬሳ አይሴይሳታ ካሌሴዳይሳኔ ሚንሴሴዳይሳ ጉጂዲ አዴስ። ቤኒ ዎዴ ኢሜቲያ አማኖ ኪታይ ዱማ ዱማ አዴቲዳ ቃላ፤ ኬሶን ኬሶን ኤኬቲስ። ሃዋሬታ አሱዋ ጊዶን አሴቲዳ አሶታ ኪታይ አማኒያ አሳ ዴዎኒኔ ዎሳ ኬሳ ኢሲፊቴሳን ደዲያ ዎልቃይ አይ ሜላ ጊቴኮ ቤሴስ። ሃዋሬታ አሱዋ አይፌ ቆፋታ

- ማርካቴሳስ ጊጌቴሴ 1:1-26
- 1) ዮሱሳ ዉርሴሳ ኪታኔ ኢሚዳ ኡፋይሳ 1:1-14
 - 2) ዩሁዳ ቤሳን ሃራ ዶሩዋ 1:15-26
- ዮሩሳሌምን ማርካቴሴ 2:1-8:3
- ዩሁዳኒኔ ሳማሬን ማርካቴሴ 8:4-12:25
- ጳውሎሳ ሃዋሬቴሳ አሱዋ 13:1-28:31
- 1) ኮይሮ ሃዋሬቴሳ ቡሳ 13:1-14:28
 - 2) ዮሩሳሌም ሺቁዋ 15:1-35

- 3) ናምዓንን ሃዋሬቱ ሱሳ 15:36-18:22
- 4) ሄዻንን ሃዋሬቱ ሱሳ 18:23-21:16
- 5) ጳውሎስ ዩሩሳሌምን፣ ቂሳሪያኒኔ ሮሜን ቃሼቱላ 21:17-28:31

1-2 ቴዎሬሎሳ፣ ዩሱሲ ባ አሱዋ አይኪዳ ዎዴፕ ሳሎ ቢዳ ጋላሳ ጋካናው፣ አሲዳባኔ ታማርሲዳባ ኡባ ታኒ ታ ኮይሮ ማፃፋን ፃፋሰ። ሳሎ ባናፕ ሲንፎ ኢ ባ ዶሪዳ ሃዋሬታ ጌሻ አያናን ኪቲስ።
 3 ኢ ባ ዋያፕ ጉዩ ሃይቆፕ ዴንዲዳይሳ ሲዴይ ባይና ቆንጨሲዲ ኤንታው ባና ቤሲስ። አይታሙ ጋላስ ኤንታው ቆንጨዲ ያሳ ካዎቱላባ ኤንታ ታማርሲስ።
 4 ኢሲ ዎዴ ኤንታራ ኢሲፌ ሚሼ ኤንታ ሃይሳዳ ያጊዲ ኪቲስ። «ታ ሂንቱው አዲዳ፣ ታ አዋይ ኢማና ጊዳ ኡፋይሳ ቃላ ናጊቱፕ አቲን ዩሩሳሌምፕ ኬዮፒቱ።
 5 አይስ ጊኮ፣ ዮሃኒሲ ሃሳን ፃማቂስ፣ ሺን ጉሳ ዎዴፕ ጉዩ ጌሻ አያናን ሂንቱ ፃማቂታና» ያጊስ።

6 ሃዋሬቲ ዩሱሳራ ጋሄቲዳ ዎዴ ኢያኮ፣ «ጎዳው፣ ኢስራዔሌታስ ኔ ካዎቱላ ዛራና ዎዴይ ሃይሴ?» ያጊዲ አይቸዶሶና።

7 ዩሱሲ ኤንታኮ፣ «ታ አዋይ ባ ማታን አሲያ ዎዲያኔ ላይሳ ሂንቱ ኤራናው ዳንዳዔኬታ።
 8 ሺን ጌሻ አያናይ ሂንቱ ቦላ ዎዲያ ዎዴ ሂንቱ ዎልቃን ኩማና። ያኒ ሲሚዲ፣ ዩሩሳሌምን፣ ዩሁዳ ቤታ ኡባን፣ ሳማሬኒኔ ሳዓ ጋፃ ጋካናው ታው ማርካታ ጊዳና» ያጊስ።

9 ሄሳ ጊዳይሳፌ ጉዩ ኤንቲ ዩሊሺን፣ ዶቁ ዶቁ ጊዲ፣ ሳሱዋ ቤን ሻራይካ ኢያ ኤንታ አይፊያፕ ጌንሲስ።

10 ዩሱሲ ቢያ ዎዴ ኤንቲ ሳሎ ቲሺ አሲዲ ዩሊሺን፣ ቦላ ማዖ ማዲዳ ናምዑ አሳቲ አኬኮና ኤንታ ማታን ኤቂዲ፣
 11 «ጋሊላ አሳው፣ ሳሎ ዩሊሺ፣ ሂንቱ አይስ ኤቂዴቲ? ሃ ሂንቱ ቤዒሺን ሳሎ ቢዳ ዩሱሲ ሄሳዳካ ሲሚዲ ያና» ያጊዶሶና።

ዩሁዳ ቤሳን ማቲያሲ ዶሬቲስ
 (ማቶ 27:3-10)

12 ሄሳፌ ጉዩ፣ ሃዋሬቲ ሻማሆ ዴሪያፕ ዩሩሳሌም ሲሚዶሶና። ሻማሆ ዴሬይ ዩሩሳሌምስ ማታን ዴዔስ።
 13 ኤንቲ ዩሩሳሌም ጊሊዲ፣ ባንታ ዴዒያ ቤሳ ፖቂያ ቦላ ኬዩዶሶና። ኤንቲካ፣ ጳዒሮሳ፣ ዮሃኒሳ፣ ያይቆባ፣ ኢንዲሪያሳ፣ ፊልጶሳ፣ ቶማሳ፣

1:1-2 ሉቃ 1:1-4 1:4 ሉቃ 24:49 1:5 ማቶ 3:11፤ ማር 1:8፤ ሉቃ 3:16፤ ዮሃ 1:33 1:8 ማቶ 28:19፤ ማር 16:15፤ ሉቃ 24:47-48 1:9 ማር 16:19፤ ሉቃ 24:50-51

ባርቶሎሚዮስ፣ ማቶስ፣ ኢልሬዮስ ናዓ ያይቆባ፣ ባ ቢታስ ሚሼቲያ ሲሞናኔ ያይቆባ ናዓ ዩሁዳ።¹⁴ ሃይሳቲ ኡባይ ማጫሳታራ፣ ዩሱስ አዩ ማይራሚራኔ ዩሱስ ኢሻታራ ኡባይ ኢሲ ዎዛናን ጊዲዲ ሚንሲዲ ዎሶሶና።

¹⁵ ሄ ዎዴ ጴጊሮሲ ዌታኔ ላታማ ጊዲያ አማኒያ አሳይ ሸቂዳ ቤሳን ዴንዲ ኤቂዲ፣ ሃይሳዳ ያጊስ።¹⁶ «አሳው፣ ዩሱስ አይኪዳይሳታ ካሌሲዳ ዩሁዳባ ጌሻ አያናይ ካሴ ዳዊቴ ዶናን አዲዳ ያሳ ቃላይ ፖሌታናው ቤሴስ።¹⁷ ዩሁዲ ኑራ ኢሲፌ ሃ አሱዋ አሳናው ዶሬቲዳ አሲ።»

¹⁸ ሸን ዩሁዲ ባ ኢታ አሱዋን ዴሚዳ ሚሸን ጋዴ ሻሚስ። ኢ ጉፋኒዲ ኩንዲን፣ ኢያ ኡሎይ ዳኬቲስ፤ ኢያ ማራጩይ ኡባይ ካሪ ኬዩስ።¹⁹ ዩሁዳ ቦላ ሃኒዳባ ዩሩሳላሚን ዴዲያ አሳ ኡባይ ሲዲስ። ሄሳ ጊሾ፣ ሄ ጋዲያ ባንታ ቃላን አኬልዳማ (ሱሳ ጋዴ) ጊዲ ዌጊዶሶና።

²⁰ «ሄሲካ ማዝሙራ ማፃፋን፣

«ኢያ ኬሳይ ካሎ አቶ፤
አኒካ ኢያን ዴዎፖ።

ቃሲ ኢያ ሹማቴላ ሃሪ ኤኮ» ጌቴቲ ፃፌቲስ።

²¹ «ሄሳ ጊሾ፣ ጎዳ ዩሱሲ ኑ ጊዶን ሲሜሬቲዳ ዎዴ ኡባን ኑራ ዴዴይሳታ፤²² ቃሲ ፃማቂያ ዮሃንሳ ዎዲያፔ ዶሚዲ ጎዳ ዩሱሲ ሳሎ ቤዳ ጋላስ ጋካናው ኑራ ዴዴይሳታ፤ ኢሲ አሲ ኢያ ዴንዱዋስ ኑራ ማርካ ጊዳናው ቤሴስ» ያጊስ።

²³ ሄሳ ጊሾ፣ አሳይ ዶሩዋስ ዮስዎሳ ጊያ ባርሳባሳ ጌቴቲያ ዮሴፋኔ ማቲያሳ ናምዓ ሸሺዶሶና።²⁴ ሄሳፌ ጉዩ፣ ያሳ ዎሲሾ፣ «አሳ ኡባ ዎዛና ኤሪያ ጎዳው፣ ሃ ናምዓታፔ ኔ አና ዶሪዳኮ ኑና ቤሳ።²⁵ ዩሁዲ ባ ቤሳ ቢዲ፣ አጊዳ አሱዋኔ ሃዋሬቴላ አሱዋ ኤካና ሚላ ሃይሳታፔ ኑስ ቆንጨሳ» ያጊዶሶና።²⁶ ኤንታ ቦላ ሳማ ዩጊዶሶና። ሳማይ ማቲያሳ ቦላ ዎዲን ማቲያሲ ታማኔ ኢሲ ሃዋሬታ ቦላ ጉዤቲስ።

2

ጌሻ አያና ዩሳ

¹ ጴንዩቆስዌ ጊያ ጋላሳይ ጋኪዳ ዎዴ አማኒያ አሳ ኡባይ ኢሲፌ ኢሲ ቤሳን ሸቂዲ ዴዎሶና።² ቆፖና ዎልቃማ ጎቴዳ ጉሚያ ጉንሳይ አኬኮና ሳሎፔ ዩዲ ኤንቲ ዴዲያ ኬላ ኩሚስ።³ ቃሲ

1:13 ማቶ 10:2-4፤ ማር 3:16-19፤ ሉቃ 6:14-16 1:20 ማዝ 69:25፤ 109:8
1:22 ማቶ 3:16፤ ማር 1:9፤ ሉቃ 3:21 2:1 ሌዌ 23:15-21፤ ዛሬ 16:9-11

ታማ ላጮ ዳኒያ ኢንፃርሳቲ ኤንታው ቤንቲሼ፣ ሻኬቲ ሻኬቲ ኤንታ ኡባ ቦላ ዎዲዶሶና።⁴ ኤንቲ ኡባይ ጌሻ አያናን ኩሚዲ ዱማ ዱማ ዶናን አዴታና ሜላ ጌሻ አያናይ ኤንታ ዳንዳሲን ሃሳያ ዶሚዶሶና።

⁵ ሄ ዎዴ ቤታ ኡባሬ ዩዳ ያሳ ያያ አይሁዴቲ ዩሩሳላሜን ዴዎሶና።⁶ ሄ ጉንሳ ሲዲዳ ዎዴ ዳሮ አሳይ ሺቂዶሶና። አማኒያ አሳይ ኤንታ ቃላን አዴቲሺን ሲዲዳ ጊሾ⁷ ማላሌቲዲ፣ «ሃ አዴቲያ አሳ ኡባይ ጋሊላ አሴ ጊዶኮናዬ?»⁸ ያቲን፣ ኑኒ፣ ኑ ዩሌቲዳ ቤታ ዶናን ኤንቲ አዴቲሺን ዋኒዲ ሲዳናው ዳንዳሲዶ?⁹ ኑኒ ጳርፂን፣ ሜዶናን፣ ኤላሜን፣ ናምዑ ሻፋታፔ ጊዶን ዴዴይሳቲ፣ ዩሁዳን፣ ቃጳዶቂያን፣ ጳንዶሳን፣ ኢሲያን፣¹⁰ ጳርጌን፣ ጳንሬሌን፣ ጊብፂን፣ ቃሬና ማታን ዴዲያ ሊቢያን ዴዴይሳታ። ኑፔ ባጋቲካ ሮሜፔ ዩዳ አሳታ።¹¹ አይሁዴቲኔ አይሁዴቱሳ አማኖ ጌሊዳ አሳቲ፣ ቃርፂሳኔ አራቤ አሳቲ፣ ያሳይ አሲዳ ጊታ አሱዋ ኑ ቃላን አዴቲሺን ሲዶስ» ያጊዶሶና።¹² ኡባይ ማላሌቲዲ፣ ጋናባ ዳዩዲ ዎሊኮ፣ «ላ ሃይሲ አይ ጉሴ?» ያጊዶሶና።¹³ ሺን ሃራቲ፣ «ሃይሳቲ ኡዩዲ ማሶቲዶሶና» ያጊዲ ቁልቂሲዶሶና።

ጳጊሮሳ ሃሳያ

¹⁴ ሺን ጳጊሮሲ፣ ታማኔ ኢሲ ሃዋሬታራ ዴንዲ ኤቂዲ፣ ባ ቃላ ዶቁ አሲዲ፣ ኤንታው ሃይሳዳ ያጊዲ አዲስ፣ «አይሁዴቶ፣ ዩሩሳላሜን ዴዲያ ኡባቶ፣ ታኒ አዴይሳ ሲዲቴ።¹⁵ ዎንታፊ ሄኸ ሳቱ ጊዲያ ጊሾ ሂንቴ ቆፔይሳዳ ሃ አሳቲ ማሶቲቦኮና፣ ሄሲ ሂንቴው ኤሬቶ።¹⁶ ሺን ሃይሲ ሃኒዳይ ናቢያ ኢዩዴሲ አዲዳይሲ ፖሌታና ሜላሳ።

- ¹⁷ «‹ያሳይ፣ ዎዲያ ዉርሴሳን ሃይሳዳ ሃናና ያጌስ፣
ታኒ አሳ ኡባ ቦላ ታ አያና ጉሳና።
ሂንቴ አዴ ናይቲኔ ማጫ ናይቲ፣
ቲንቢቴ አዳና።
ሂንቴ ያላጋቲ ቆንጩሲ ቤዳና፤
ሂንቴ ጨማቲ አሙሆ አሙሃና።
- ¹⁸ ሄ ጋላሳታን ታና አማኒያ አዴ አይሌታ ቦላ፣ ማጫ አይሌታ ቦላ
ታኒ ታ አያና ጉሳና፤
ኤንቲ ቲንቢቴ አዳና።
- ¹⁹ ቃሲ ታኒ ቦላ ሳሉዋን አራሳባ፣
ጋርሳ ሳዓንካ ማላ ቤሳና።

2:17 ኢዩ 2:28-32

ሱሲ፥ ታሚኔ ዎልቃማ ጫጋኒ ቤንታና።

20 ጊታኔ ቦንቾ ጊዲዳ ጎዳ ጋላሳይ

ጋካናፔ ሲንሴ አዋይ ጳማና፤

አገናይካ ሱሲ ዳናና።

21 ሄ ዎዴ ሄሳዳ ሃናና፤

ጎዳ ሱንሳ ያጊያ አኒካ አታና) ያጊስ።

22 «ኢስራጫሌ አሳው፥ ሃ ቃላ ሲጊቴ። ናዘሬቴ ዩሱሳ አናቴሳይ፥ ያሳይ ሂንቴ ጊደን አሲዳ ዎልቃማ አሱዋኒኔ ማላታታን ሂንቴው ቆንጮይሳ ሂንቴ፥ ሂንቴ ሁዔን ኤሬታ። 23 ያሳ ካሴ ኤራኒኔ ኢያ ሼኒያን ዩሱሲ ሂንቴው አዲ ኢሜቲስ። ሂንቴ ኢያ ናጋራንቾቲ ማስቃሊያ ቦላ ካቂዲ ዎዳና ሜላ አሲ ኢሚዴታ።

24 ሺን ያሳይ ሃይቆ ዎልቃ ዲጊዲ ኢያ ዴንሲስ። ሄሳ ጊሾ፥ ሃይቆይ ኢያ አይካናው ዳንዳጊቤና። 25 ዳዊቴይ ኢያባ አዲሼ፥ <ታኒ ያርኮና ሜላ፥

ጎዳይ ታ ኡሻቻን ዴዔስ።

ጎዳ ኡባ ዎዴ ታ ማታን ቤዓይስ።

26 ሄሳ ጊሾ፥ ታ ዎዛናይ ኡፋይቲስ፤

ታ ኢንፃርሳን ኡፋይሲ ኩሚስ፤

ሃይቂያ ታ አሳቴሳይ ኡፋይሳን ዳና።

27 አይስ ጊኮ፥ ታ ሼምፑዋ ሲዎሌን አጋካ።

ቃሲ ኔ ጊሻ ናዓ አሃ ዎቂሳካ።

28 ኔኒ ታና ዴዎ አጊያ ኤሪሳዳሳ።

ኔኒ ታራ ዴዔይሳን ታ ኡፋይሳይ ኩሜሲ ጊዴስ) ያጊስ።

29 «አሳው፥ ኑ አዋ ዳዊቴባ ታ ሂንቴው ጊሻዳ አዳና። ዳዊቴይ ሃይቂዲ ሞጌቲስ፤ ኢያ ዱፎይ ሃቺ ጋካናው ኑ ማታን ዴዔስ።

30 ዳዊቴይ ናቤ ጊዲዳ ጊሾ ያሳይ ኢያ ሼሻፔ ኢሱዋ ኢያ ካዎቴሳ አራታ ቦላ ኡቲሳናው ኢያው ጫቂዳ ጫቂዋ ኤሬስ። 31 ሄሳ ጊሾ፥ ኪሪስቶሳ ዴንዱዋ ሲንሴ ያሊዲ፥ <ኢያ ሼምፓይ ሲዎሌን አቲቤና፤ ኢያ አሳቴሳይካ ዎቂቤና) ጊዲ አዲስ።

32 «ያሳይ፥ ሃ ዩሱሳ ሃይቂዋፔ ዴንሲዳይሳስ ኑኒ ኡባይ ማርካ።

33 ሄሳ ጊሾ፥ ያሳይ ባራ ሃራና ሜላ ባፔ ኡሻቻ ባጋራ ኢያ ጶቁ ጶቁ አሲዲ፥ ኢያው ኢማና ጌቴቲዳ ጊሻ አያና ኤኪዲ፥ ሃይሳ ሂንቴ ሃዲ ቤዔይሳኒ ሲዔይሳ ኑ ቦላ ጉሲስ። 34-35 ጋሶይካ፥ ዳዊቴይ ባ ሁዔን ሳሎ ቤቤናሺን ያጊስ።

<ጎዳይ፥ ታ ጎዳ፥ «ታኒ ኔ ሞርኬታ ኔ ቶሆይ ዩዲያሶ አሳና ጋካናው

2:23 ማቶ 27:35፤ ማር 15:24፤ ሉቃ 23:33፤ ዮሃ 19:18 2:24 ማቶ 28:5-6፤ ማር 16:6፤ ሉቃ 24:5 2:28 ማዝ 16:8-1 2:30 ማዝ 132:11፤ 2ሳሙ 7:12-13

ሃይሳን ታፔ ኡሻቻ ባጋን ኡታ» ጊስ) ያጊስ።

³⁶ «ሄሳ ጊሾ፣ ሃ ሂንቴ ማስቃሊያ ቦላ ካቂዳ ዩሱሳ፣ ያሳይ ጎዳኔ ኪሪስቶሳ አሲዳይሳ ኢስራዔል አሳ ኡባይ ቱማ ኤሮ» ያጊስ።

³⁷ አሳይ ጳጊሮሲ ጊዳይሳ ሲዲዳ ዎዴ ባንታ ዎዛናን ቦሼቲዲ ጳጊሮሳኔ ሃንኮ ሃዋሬታኮ፣ «ኢሻቶ፣ ያቲን ኑኒ አይ አሲኖ?» ያጊደሶና።

³⁸ ጳጊሮሲ ኤንታኮ፣ «ሂንቴ ናጋራይ አቶ ጌቴታና ሜላ ናጋራፔ ሲሚዲ፣ ሂንቴ ኢሶይ ኢሶይ ዩሱስ ኪሪስቶሳ ሱንሳን ማጭቲቴ። ያሳይ ኢሚያ ጌሻ አያና ሂንቴ ኤካና። ³⁹ ጋሶይካ ያሳይ ኢማና ጊዳ ኡፋይሳ ቃላይ ሂንቴስ፣ ሂንቴ ናይታሲኔ ጎዳይ ኑ ያሳይ ባኮ ዩጊያ ሃሆን ዴዲያ ኡባሳ» ያጊስ።

⁴⁰ ጳጊሮሲ ኤንታው ሃራ ቃላካ ጉጂ ማርካቲዲ፣ «ሃ ዎዲያ ጌላ አሳ ቦላ ያናው ዴዲያ ፐርዳፌ ሂንቴ ሁዲያ አሺቴ» ያጊዲ ዞሪስ።

⁴¹ ጳጊሮሲ አዲዳይሳ ኤኪዳይሳቲ ማጭቲደሶና። ሄ ጋላስ ሄዡ ሙኩሉ ጊዲያ አሳይ አማኒደሶና። ⁴² ኤንቲ ሃዋሬታ ቲሚርቲያን፣ ኢሲፌቴላን፣ ኡይሳ ሙሳኒኔ ያሳ ዎሳን ሚኖሶና።

አማኒያ አሳ ኢሲፌቴላ ዴዑዋ

⁴³ ሃዋሬታ ኩሼን ዳሮ አራሳባይኔ ማላቲ አሴቲያ ጊሾ አሳ ኡባይ ያዩደሶና። ⁴⁴ አማኒዳ ኡባይ ኢሲፌ ዴዎሶና፤ ባንታው ዴዲያባ ኡባ ኢሲፌ ሻኬቶሶና። ⁴⁵ ኤንቲ ባንታው ዴዲያባ ባይዚዲ ሚሺያ ኢሱዋስ ኢሱዋስ ኮሺዳ ሜላ ሻኮሶና። ⁴⁶ ኡባ ጋላስ ኢሲ ዎዛናን ጊዲዲ ያሳ ኬላን ሺቆሶና። ባንታ ኬላን ኢሶይ ኢሱዋ ዩጊዲ ኡፋይሳኒኔ አሸኪ ዎዛናን ካላ ሞሶና። ⁴⁷ ያሳ ጋላቲሼ አሳ ኡባን ሳቤቲደሶና። ጎዳይ አቴይሳታ ጋላስ ጋላስ ኤንታ ቦላ ጉጂስ።

3

ዎቤ አዴይ ፓዒስ

¹ ኢሲ ጋላስ ጳጊሮሲኔ ዮሃኒሲ ያሳ ዎሳናው ኡዱፋን ሳቴን ያሳ ኬሲ ቢደሶና። ² ዩሌቶሶፔ ደሚዲ ዎቤ ጊዲዳ ኢሲ አዴይ ያሳ ኬሲ ጌሊያ አሳፔ ሚሼ ዎሳና ሜላ ኡባ ዎዴ ሎዎ ጊያ ያሳ ኬላ ፔንጊያን ኤሂዲ ዎሶሶና። ³ ሄ ዎቤ አዴይ ጳጊሮሲኔ ዮሃኒሲ ያሳ ኬሲ ጌላና ሃኒሺን ቤዲዲ ኤንታ ሚሼ ዎሲስ።

⁴ ኤንቲካ ኢያ ጫዲ ዩሊዲ፣ «ኑኮ ሃ ዩላ» ያጊደሶና። ⁵ ዎቤ አዴይ ኤንታፌ አይኮ ኤካና ዳኒን ኤንታኮ ዩሊስ። ⁶ ሺን ጳጊሮሲ

2:34-35 ማዝ 110:1 2:44 ሃ.አ 4:32-35

ኢያኮ፡ «ታው ሚሼይ ባዋ፤ ሺን ታው ዴዲያባ ታኒ ኔው ኢማና። ናዚሬቴ ዩሱስ ኪሪስቶሳ ሱንሳን ዴንዳዳ ሃሙታ» ያጊስ።

7 ሄሳፌ ጉዩ፡ ዎቤ አዲያ ኡሻቻ ኩሺያ አይኪዲ ዴንሳሲ። ኤሌሲዲ ኢያ ቶሆይኔ ቂንጫፊሌይ ሚኒ አጊስ። 8 አዴይ ጉፒዲ ዴንዲ ኤቂስ። ጌዴኔ ሃ ሃሙሲ ዶሚስ። ሄሳፌ ጉዩ፡ ሃሙተሼ፤ ጉፒሼኔ ያሳ ጋላተሼ ኤንታራ ኢሲፌ ያሳ ኬሳ ጌሊስ።

9 ኢ ሃሙተሼኒኔ ያሳ ጋላተሼን አሳ ኡባይ ኢያ ቤዲዶሶና።

10 ቤዲዳ ኡባይ ሚሼ ዎሳናው ሎዎ ጊያ ያሳ ኬሳ ፔንጌን ኡተዳይሲ ኢያ ጊዲዳይሳ ኤሪዶሶና፤ ኢ ሃኒዳባ ቤዲዲ ማላሌተዶሶና።

ጲዲሮሲ ያሳ ኬሳን ሃሳዬዳ ሃሳዎ

11 አዴይ ጲዲሮሳፔኔ ዮሃንሳፔ ዱዲኬ ጊዲ አይኪዲ ዴዲሺን አሳ ኡባይ ማላሌተዲ፤ ሶሎሞኔ ባራንዳ ጊያሶን ኢሲፌ ኤንታኮ ዎዲዶሶና። 12 ጲዲሮሲ አሳ ቤዲዳ ዎዴ አሳኮ፤ «ኢስራዬሌ አሳው፤ አይስ ሃይሳን ማላሌተዲ? ዎይኮ አይስ ኑና ጫዲ ዌሌተ? ኑኒ ኑ ዎልቃን ዎይኮ ኑ ዊሎቴሳን ሃ አዲያ ሃሙሲዳባ ሂንቴው ዳኒ? 13 አብራሃሜ፤ ዩሳቃ፤ ያይቆባ ያሳይ፤ ኑ አዎታ ያሳይ፤ ባ ናዓ ዩሱሳ ቦንቺስ። ሺን ሂንቴ ሃይቆስ አሲ ኢሚዳይሳ ጲላዎሲ ቢላናው ኮዩንካ ሂንቴ ኢያ ሲንሳን፤ <ኑኒ ኢያ ኤሮኮ> ያጊዴታ።

14 ሂንቴ ጌሻኔ ዊሎዋ፤ <ኑኒ ኢያ ኤሮኮ> ጊዲ፤ ሼምፓ ዎዲዳይሳ ሂንቴው ቢላና ሜላ ጲላዎሳ ዎሲዴታ። 15 ዴዑዋ ኢሜይሳ ሂንቴ ዎዲዴታ፤ ሺን ያሳይ ሃይቆፔ ኢያ ዴንሳሲ። ሄሳስ ኑኒ ማርካ።

16 ሃ ሂንቴ ቤዴይሲኔ ኤሪያ አዴይ ፓዊዲ ሚኒዳይ ዩሱሳ ሱንሳን አማኒዳይሳና። ሃ ሂንቴ ኡባ ሲንሳን ኢያ ሃይሳዳ ፓሲዳይ ኢ ዩሱሳ አማኒዳ ጊሾሳ።

17 «ሃዲካ ታ ኢሻቶ፡ ሂንቴካ ሂንቴና ካሌሌይሳታዳ፤ ኤሮና አሲዳይሳ ታኒ ኤራይስ። 18 ሺን ያሳይ ቤኒ ናቤታ ኡባ ዶናን፤ <ኪሪስቶሲ ዋዩ ኤካናው ቤሴስ> ያጊዳይሲ ሃይሳዳ ፖሌታና ሜላ አሲስ። 19 ሂዛ፤ ያሳይ ሂንቴ ናጋራ አቶ ጋና ሜላ ጎዳኮ ሲሚቴ።

20 ጎዳ ማታፔ ሚንሴሶ ዎዴይ ሂንቴው ያና። ያሳይ ኪሪስቶሳ ጊዳና ሜላ ሲንሳተዲ ዶሪዳ ዩሱሳ ሂንቴው ዩዳና። 21 ያሳይ ባ ጌሻ ናቤታ ዶናን ቤኒ አዲዳይሳ ሜላ ኡባባይ አራዊያ ዎዴይ ጋካናው ዩሱሲ ሳሎን ጋምዓናው ቤሴስ። 22 ሙሴይ፤ <ጎዳ ያሳይ ታና ዴንሳዳይሳ ሜላ ሂንቴ ጊዶፌ ሂንቴው ናቤ ዴንሳና። ሂንቴ ኢ ጌይሳ ኡባ ሲዲቴ። 23 ሄ ናቤይ አዴይሳ ሲያና አሲ አኒካ አሳ ጊዶፌ ሻኬተዲ ዳዮ> ያጊስ።

3:13 ኬሳ 3:15 3:14 ማቶ 27:15-23፤ ማር 15:6-14፤ ሉቃ 23:13-23፤ ዮሃ 19:12-15 3:22 ዛሬ 18:15፤ 18 3:23 ዛሬ 18:19

24 «ቃሲ ሳሙዔላፔ ዶሚዲ ዴዲያ ናቤቲ ኡባይ ሃ ዎዲያባ አዲዶሶና። 25 ሂንቴ ናቤታ ናይታ፤ ቃሲ ዶሳይ አብራሃሜስ፤ ሳዓን ዴዲያ አሳ ኡባ ታኒ ኔ ሼሻ ባጋራ አንጃና) ያጊዲ ኑ አዋታስ ጌሊዳ ቃላ ሳቲያ ናይታ። 26 ዶሳይ ሂንቴና ኡባ ሂንቴ ኢታ አጊያፔ ዛሬዲ አንጃና ሜላ ባ ናዓ ዴንሲዲ ሂንቴው ኮይሮ ዮዲስ» ያጊስ።

4

ጴጊሮሲኔ ዮሃንሲ አይሁዴ ሻንጎ ሲንፋን

1 ጴጊሮሲኔ ዮሃንሲ አሳስ አዲሺን ካሂኔ ሃላቃቲ፤ ዶሳ ኬላ ናጊይሳታ ሃላቃይኔ ሳዱቃዌቲ ኤንታኮ ዩዶሶና። 2 ኤንቲ ዩሱሲ ሃይቆፔ ዴንዶይሳኔ ኢያ ጋሶን ሃይቆፔ ዴንዶይ ዴዴይሳ አሳ ታማርሲዳ ጊሾ ዩሎቲዶሶና። 3 ሄሳ ጊሾ፤ ኤንታ አይኪዲ ሳዓይ አማርሲዳ ጊሾ ዎንታና ጋካናው ቃሾ ኬሊ ጌልሲዶሶና። 4 ሺን ቃላ ሲዲዳይሳታፔ ዳርቲ አማኒዶሶና፤ አማኒዳ አዴ አሳ ታይቦይ ኢቻሹ ሙኩሉኮ ቢስ።

5 ዎንቴላ ጋላስ ዴሪያ ሃሬይሳቲ፤ ጨማቲኔ፤ ሂጌ አስታማሬቲ ዩሩሳላሜን ሺቂዶሶና። 6 ሄ አሳ ጊዶን ካሂኔ ሃላቃይ ሃኒ፤ ቃያፊ፤ ዮሃንሲ፤ ኢስኪንዲሬይኔ ካሂኔ ሃላቃ ሶ አሳቲ ኡባይ ዴዶሶና። 7 ሃዋሬታ ባንታ ሲንፋን ኤሲዲ፤ «አይቢ ዎልቃን ዎይኮ አዴ ሱንፋን ሃይሳ ሂንቴ አሲዴቲ?» ያጊዲ አይቺዶሶና።

8 ሄ ዎዴ ጴጊሮሲ ጊሻ አያናን ኩሚዲ፤ «ዴሪያ ሃሬይሳቶ፤ ጨማቶ፤ 9 ሃቺ ሃ ዎቤ አዲያስ አሴቲዳ ሎዎ አሱዋሲኔ ኢ ዋኒዲ ፓዲዳኮ ሂንቴ ኑና አይቺኮ፤ 10 ማስቃሊያ ቦላ ሂንቴ ካቂን፤ ዶሳይ ሃይቆፔ ዴንሲዳ ናዚሬቴ ዩሱስ ኪሪስቶሳ ሱንፋን ሃ አዴይ ፓዲዲ ሂንቴ ሲንፋን ኤቂዳይሲ ሂንቴውኔ ኢስራዔል አሳ ኡባስ ኤሬቶ።

11 ሪፖቤይሳቲ ቦሪዲ ኢዲዳ ሹቻይ፤

ጎዳ ሃጲዋ ሚንሲያ፤

ኡባፌ አዲያ ሹቹ ጊዲስ፤

ሄ ሹቻይ ዩሱሳ።)

12 ሄሳ ጊሾ፤ አቶቴሲ ኢያ ባጋራፔ አቲን ሃራ አዴ ባጋራካ ባዋ። ኑኒ ኢያ ሱንፋን አታና ሜላ አሳ ኡባስ ዶሳይ ሳሎፔ ጋርሳን ኢሚዳ ሃራ ሱንሲ ባዋ» ያጊስ።

13 ሺቂዳ አሳይ ጴጊሮሲኔ ዮሃንሲ ሚኒዳ ሚኖቴላ ቤዲዳ ዎዴ ኤንቲ ታማሪቦና ሮጌ አሲ ጊዲዳይሳ አኪኪዲ ማላሌቲዶሶና፤ ኤንቲ ዩሱሳራ ዴዴይሳ ኤሪዶሶና። 14 ቃሲ ፓዲዳ አዴይ

ጴጊሮሳራኔ የሃሂሳራ ኤቂዳይሳ አሳይ ቤዒዲ ጊያባ ጳዩዶሶና።
 15 ሺን ጴጊሮሳኔ የሃሂሳ ካሬ ኪያና ሜላ አሲዲ ባንታ ጊዶን።
 16 «ሃ አሳታ ኑ አይ አሲና? ኤንታ ኩሼን አሴቲዳ ጊታ ማላታይ ዩሩሳላሜን ዴዲያ ኡባስ ቤንቴስ። ኑኒ ሄሳ ኤሮኮ ጋናው ዳንዳዎኮ። 17 ሺን ሃ አዳይ አሳ ጊዶን ሳሌቶና ሜላ ሂዛፔ ጉዩ ሃ አሳቲ ዩሱሳ ሱንሳን አዴስካ አዶና ሜላ ሚንሲዲ ናጊሳና» ያጊዲ ዞሬቲዶሶና።

18 ኤንታ ዌጊዲ፣ ዩሱሳ ሱንሳን ሂዛፔ አዶና ሜላ ዎይኮ ታማርሶና ሜላ ኪቲዶሶና። 19 ሺን ጴጊሮሲኔ የሃሂሲ ኤንታኮ ዛሬዲ፣ «ዶሳስ ኪቴታናይሳፌኔ ሂንቴው ኪቴታናይሳፌ ዶሳ ሲንሳን አዉሲ ሎዎኮ ኦኔ ሂንቴ ፐርዲቴ። 20 ኑኒ ቤዒዳባኔ ሲዒዳባ አዶና አጋናው ዳንዳዎኮ» ያጊዶሶና።

21 ቢታ ጨማቲኔ ዴሪያ ሃሬይሳቲ ካሴፔ ሚንሲ ናጊሲዲ ኤንታ ዩዲ አጊዶሶና። አሳይ ሃሂዳባስ ዶሳ ጋላቲያ ጊሾ ኤንታ ሴራናው ዳንዳዲቦኮና። 22 ሄ ማላታን ሃርጊያፌ ፓሲዳ አዲያስ ላይሳይ አይታማፔ አዲስ።

አማኒያ አሳ ዎሳ

23 ጴጊሮሲኔ የሃሂሲ ቢርሼቲዲ ባንታ ዳቦታኮ ቢዲ፣ ካሂኔ ሃላቃቲኔ ጨማቲ ባንታኮ ጊዳባ ኡባ ኤንታው አዲዶሶና።
 24 ኤንቲ ሄሳ ሲዒዳ ዎዴ ኢሲ ዎዛናን ጊዲዲ ዶሳ ሃይሳዳ ያጊዲ ዎሲዶሶና። «ኡባ ሃሪያ ጎዳው፣ ሳሉዎ፣ ሳዓ፣ አባኔ ኤንታ ጊዶን ዴዲያ ኡባባ ሜዲዳይሶ። 25 ኔኒ ኔ አይሊያ፣ ኑ አዎ ዳዊቴ ዶናን ጌሻ አያናን።

‹ዴሬይ አይስ ዩሎቲዶና?
 አሳይ አይስ ጮ ማቁቲዶና?

26 ሳዓ ካዎቲኔ
 ዴሪያ ሃሬይሳቲ ኢሲፌ ጎዳ ቦላኔ
 ኪሪስቶሳ ቦላ ዴንዲዶሶና› ያጋዳሳ።

27 «ቴማካ፣ ሄሮዲሲኔ ጴንዌ ጲላዎሲ አይሁዴ ጊዶና አሳራኔ ኢስራዔሌ አሳራ ኔ ዶሪዳ ኔ ጌሻ ናዓ ዩሱሳ ቦላ ዴንዳናው ሃ ካታማን ሺቂዶሶና። 28 ቃሲ ኔኒ ኔ ዎልቃኒኔ ኔ ሼኒያን አሳና ጋዳ ቆፓ ኡቲዳባ ኡባ ፓሊዶሶና። 29 ሃዒካ ጎዳው፣ ኤንታ ማንዴሳ ቤዓ፤ ኑኒ ኔ አይሌቲ ኔ ቃላ ኩሜሳ ዎዛናን አዳና ሜላ ኑና ዳንዳዲሳ። 30 ኔ ጌሻ ናዓ ዩሱሳ ሱንሳን ሃርጋንቾታ ፓሳናው፣ አራሳባይኔ ማላታቲ አሴታና ሜላ ኔ ኩሺያ ሚጫ» ጊዲ ዎሲዶሶና።

4:24 ኪሳ 20:11፤ ናህ 9:6፤ ማዝ 146:6 4:25 ማዝ 2:1-2 4:27 ማቶ 27:1-2፤ ማር 15:1፤ ሉቃ 23:1፤ 7-11፤ ዮሃ 18:28-29

31 ኤንቲ ያሳ ዎሲዳፔ ጉዬ ሄ ኤንቲ ሺቂዳሶይ ቃጊስ። ኤንታ ኡባን ጌሻ አያኒ ኩሚን ያሳ ቃላ ሚኖቴላን አዲዶሶና።

ኮይሮ አማኒዳ አሳ ኢሲፌቴላ

32 አማኒይሳቲ ኡባይ ቆፋኒኔ ዎዛናን ኢሲኖ ጊዲዶሶና። ኤንቲ ባንታው ዴዲያባ ታባ ጎናሺን ኢሲፌ ሻኬቶሶና። 33 ሃዋርቲ ጎዳ ዮሱሲ ሃይቆፔ ዴንዲዳይሳ ጊታ ዎልቃን ማርካቶሶና። ያሳይ ኤንታ ኡባስ አዶ ኬሃቴላ ዳርሲዲ ኢሚስ። 34 ቤቲ ዎይኮ ኬሲ ዴዴይሳቲ ኡባይ ባይዚ ኤኪዳ ሚሺያ ኤሂያ ጊሾ አማኒይሳታ ጊዶን ሜቶታንቾይ ኢሶይካ ባዋ። 35 ሚሺያ ኤሂዲ ሃዋሬታስ ኢሞሶና፤ ሄ ሚሺያ ኢሱዋስ ኢሱዋስ ኮሼይሳዳ ሻኪ ሻኪ ኢሚስ።

36 ቆጲሮሳ ጊያ ቤሳን ዮሌቲዳ ዮሴፋ ጊያ ሌዌ ሺሻፔ ጊዲዳ ኢሶይ ዴዴስ። ኢያ ሱንሳ ሃዋሬቲ ባርናባሳ (ሚንሌሉ ናዓ) ጊዶሶና። 37 ባርናባሲ ባው ዴዲያ ቤታ ባይዚዲ ሚሺያ ኤሂዲ ሃዋሬታስ ኢሚስ።

5

ሃናኒያኔ ኢያ ማቺው ሳጲሮ

1 ኢሲ ሃናኒያ ጊያ አዴይ ባ ማቺ ሳጲሪራ ጋዴ ባይዚስ። 2 ሄ ባይዚዳ ሚሺያፔ ባ ማቺያ ኤሪሺን ባጋ አሺዲ፥ አቲዳይሳ ኤሂዲ ሃዋሬታስ ኢሚስ።

3 ሺን ጳዲሮሲ ሃናኒያኮ፥ «ኔን ጌሻ አያና ጨማና ሜላኔ ጋዲያ ባይዚዳ ሚሺያፔ ሻካዳ አሻና ሜላ ሃላሄይ ኔ ዎዛናን አይስ ጌሊዴ? 4 ኔን ባይዛናፔ ካሴ ጋዴይ ኔባ ጊዴኔዮ? ቃሲ ኔን ባይዛ ሲሚንካ ሚሼይ ኔባ ጊዴኔዮ? ያቲን፥ ሄሳ ሜላባ አሳናው አይስ ኔ ዎዛናን ቆጋዲ? ኔን ያሳ ቦላ ዎርዶታዳሳፔ አቲን አሳ ቦላ ዎርዶታባካ» ያጊስ።

5 ሃናኒይ ሄ ቃላ ሲዲዳ ሜላ ኩንዲዲ ሃይቂስ፤ ሄሳ ሲዲዳ ኡባይ ዳሮ ያዩስ። 6 ናዓቴላ አሳቲ ሶ ጌሊዲ ኢያ አሃ ሃጊዲ ኤፊዲ ሞጊዶሶና።

7 ሄኹ ሳቴፔ ጉዬ ሃናኒያ ማቺያ ሄሳ ኤሮና ዴዓሼ ጳዲሮሲ ዴዲያሱዋ ጌላሱ። 8 ጳዲሮሲ ኢኮ፥ «ሂንቴ ጋዲያ ሃይሳ ሜላ ሚሼስ ባይዚዴቲ? አኔ ታው አዳ» ያጊስ።

ኢያካ፥ «ኤ፥ ሃይሳ ሜላ ሚሼስ ባይዚዳ» ያጋሱ።

9 ጳዲሮሲ ማጫሲው፥ «ኔራኔ ኔ አዚናራ ጎዳ አያና ፓጫናው አይስ ዞሬቲዴቲ? ሄኮ፥ ኔ አዚና ሞጊዳ አሳቲ ካሬን ዴዎሶና፤ ኔናካ ኤንቲ ካሬ ኬሳና» ያጊስ።

10 ማጫሲያ ኢራካ ጳጳር ጳውሎስ ማታን ኩንዳዳ ሃይቃ አጋሱ፤ ናግቴላቲ ጌሊያ ዎዴ ሃይቂዳር ዴሚዲ ካሬ ኬሲዲ፣ ኢ አዚና ማታን ሞጊዶሶና። 11 ኩሜላ ዎሳ ኬሳይኔ ሄሳ ሲዲዳ ሃራ አሳ ኡባይ ዳር ያዩዶሶና።

አራሳባታኔ ማላሊሲያባታ

12 ሃዋሬቲ ዳር ማላታታኔ አራሳባታ አሳ ጊዶን አሶሶና። አማኒያ ኡባይ ሶሎሞኔ ባራንዳን ኢሲፌ ሺቆሶና። 13 ሃራ አሳፕ ኤንታራ ጋሄታናው ኢሲ አሲካ ሚኒቤና፣ ሺን አሳይ ኤንታ ቦንቼስ። 14 አማኒያ አዴታኔ ማጫሳታ ታይቦይ ካሴይሳፌ ዳሪቪ ቤስ። 15 ሄሳ ጊሾ፣ አሳይ ሃርጋንቾታ ሃላኒኔ አልጋን ቶኪዲ ጳጳርሲ አዲያ ዎዴ ኢያ ኩያይ ኤንታፌ ኢሶታ ኢሶታ ቦላ ሺምፓና ሜላ አጌ ዶናን ኬሲዲ ዎሶሶና። 16 ቃሲ ዳር አሳይ ዩሩሳላሜ ማታን ዴዲያ ካታማታፕ ሃርጋንቾታኔ ቱና አያኒ ዎይሲያ አሳታ ኤኪዲ ዮሶና፤ ኡባይካ ፓሂዶሶና።

ሃዋሬታ ቦላ ጎዲ ዴንዲስ

17 ካሂኔ ሃላቃይኔ ኢያራ ዴዲያ ሳዱቃዌቲ ኡባይ ቃናቴን ኩሚዲ ሃዋሬታ ቦላ ዴንዲዶሶና። 18 ሃዋሬታ አይኪዲ ዴሪያ ቃሾ ኬሳን ዩጊዶሶና። 19 ሺን ጎዳ ኪታንቾይ ቃማ ቃሾ ኬሳ ፔንጊያ ዶዩዲ ሃዋሬታ ካሬ ኬሲዲ፣ 20 «ቢዲ፣ ዎሳ ኬሳን ኤቂዲ ሃ አራሳ ዴያ ቃላ አሳ ኡባስ አዲቴ» ያጊስ። 21 ሃዋሬቲ ሄሳ ሲዲዳ ዎዴ ዎንታ ጉራ ዎሳ ኬሳ ጌሊዲ ታማርሶ ዶሚዶሶና።

ካሂኔታ ሃላቃይኔ ኢያራ ዴዲያይሳቲ ዩዲ፣ ኢስራዴሌ ጨማታ ኡባ ዌጊ ሺሺዲ ሃዋሬታ ባንታ ሲንፌ ኤሃና ሜላ ዎታዳሬታ ቃሾ ኬሳ ኪቲዶሶና። 22 ሺን ዎታዳሬቲ ቃሾ ኬሳ ቢዲ ሃዋሬታ ዴሚቦኮና። ጉዩ ሲሚ ዩዲ ዴሪያስ፣ 23 «ኑኒ ቢያ ዎዴ ቃሾ ኬሳ ፔንጊይ ሚንሲ ጎርዴቲን፣ ናጌይሳቲ ፔንጊን ኤቂዳይሳታ ዴሚዳ፣ ሺን ኑኒ ካሪያ ዶያ ዎዴ ጊዶን ሃሪ አቶሺን ኢሲ አሲካ ባዋ» ያጊዶሶና። 24 ሄሳ ጊሾ፣ ዎሳ ኬሳ ዎታዳሬታ ኪቲይሲኔ ካሂኔ ሃላቃቲ ሄሳ ሲዲዳ ዎዴ «ሃዋሬታ ቦላ አይቢ ሃኒዴ?» ያጊዲ ሂርጊዶሶና።

25 ሄ ዎዴ ኢሲ አይይ ኤንታኮ ዩዲ፣ «ሄኮ፣ ቃሾ ኬሳ ሂንቴ ጌልሲዳ አሳቲ ዎሳ ኬሳን ኤቂዲ አሳ ታማርሶሶና» ያጊዲ ኤንታው አዲስ። 26 ዎሳ ኬሳ ዎታዳሬታ ኪቲይሲ ባ ዎታዳሬታራ ቢዲ ሃዋሬታ ኤሂስ። ሺን ኤንቲ ባንታና አሳይ ሹቻን ጫዳና ጊዲ ያዩዳ ጊሾ ኤንታ አዳሺዲ ኤሂዶሶና።

27 ኤንቲ ሃዋሬታ ኤሂዲ፣ ሺቂዳ ሻንጉዋ ሲንሳን ኤሲን ካሂኔ ሃላቃይ ኤንታኮ፣ 28 «ሂንቴና ኑኒ ሄ ኡራ ሱንሳን ታማርሶና ሜላ ሚንሲዲ ኪቲቦኮ? ሄኮ፣ ሂንቴ ቲሚርቲያ ዩሩሳላሜ ካታማ

ኡባ ጋሊዴታ። ሄ ኡራ ሽምጥዋስ ኑና አይላናው ቆጥቲ?» ያጊዲ አይቺስ።

29 ጴጊሮሳራኔ ሃንኮ ሃዋሬታራ ኤንታው ዛሪሼ፥ «ኑኒ አሳስ ኪቱታናፔ ያሳስ ኪቱታናው ቤሴስ። 30 ማስቃሊያ ቦላ ሂንቱ ካቂዲ ዎዲዳ ዮሱሳ ኑ አዋታ ያሳይ ሃይቆፔ ዴንሲስ።

31 ኢስራዔሌቲ ናጋራፔ ሲማና ሜላኔ ኤንታ ናጋራይ አቶ ጌቱታና ሜላ ያሳይ ዮሱሳ ሃራይሳኔ አሼይሳ አሲዲ ቦንቾን ባፔ ኡሻቻ ባጋን ኡቲሲስ። 32 ሄሳስ ኑኒ ማርካ፤ ቃሲ ያሳይ ባና አማኔይሳታስ ኢሚዳ ጌሻ አያናይካ ማርካ» ያጊደሶና።

33 ሺቂዳ አሳይ ሄሳ ሲዲዳ ዎዴ ዳሮ ዩሎቲዲ፥ ሃዋሬታ ዎዳናው ቆፒደሶና። 34 ሺን አሳ ኡባን ዳሮ ቦንቼቲዳ፥ ሂጌ አስታማሪይ፥ ጋማሊያሌ ጊያ ኢሲ ፋሪሳዌይ ዴንዲ ኤቂዲ ሃዋሬታ ጉላ ዎዴስ ካሪ ኬሳና ሜላ ኪቲስ። 35 ሄሳፌ ጉዮ፥ ሺቂዳ አሳኮ፥ «ኢስራዔሌ አሳው፥ ሃ አሳታ ቦላ ሂንቱ አሳናው ቆፒያባፔ ናጌቲቱ። 36 አይስ ጊኮ፥ ሃይሳፌ ካሴ ቴዎዳሲ ባና፥ (ታኒ ጊታ) ጊዲ ዴንዲን፥ አይዱ ዌቱ ጊዲያ አሳቲ ኢያራ ኢሲፊደሶና።

ሺን ኢያ ዎዲን ኢያ ካሊዳ ኡባይ ላሌቲን ፓሶና አሲ ጊዲዲ አቲደሶና። 37 ሄሳፌ ጉዮ፥ አሳይ ታይቤቲያ ዎዴ ጋሊላ ዩሁዲ ዴንዲዲ ዳሮ አሳ ፓንጋዩዲ ካሌሲስ፥ ሺን ኢያካ ዎዲን ኢያ ካሊዳ አሳ ኡባይ ላሌቲስ። 38 ሃዲካ ታ ሂንቱው አዳይስ፤ ሃ አሳታፔ ሻኬቲቱ፤ ኤንታ ቦቾፊቱ። አይስ ጊኮ፥ ሃ ቆፋኔ ሃ አሱዋ አሲ አሲያባ ጊዲኮ ዳያና። 39 ሺን ሃ ቆፋይኔ ሃ አሶይ ያሳፌ ዩዳባ ጊዲኮ፥ ሂንቱ ኤንታ ዳይሳናው ዳንዳዔኪታ። ጌላዳ ያኒሼ ሂንቱ ያሳራ ካጩታና» ያጊዲ አዲስ። ሄሳ ጊሾ፥ ሺቂዳ አሳይ ጋማሊያሌ ዞሪያ ኤኪደሶና።

40 ሃዋሬታ ሶ ዌጊዲ ሊሶን ጋራፊሲስ። ሄሳፌ ጉዮ፥ ኤንታኮ፥ «ዮሱሳ ሱንላ ናምዓንላ ዴንሶፊቱ» ጊዲ ቢርሺ ዩዲደሶና። 41 ዮሱሳ ሱንላ ጊሾ ኤንቲ ካዉያናይሲ ቤሲያባ ጊዴይሳ ኤሪዳ ጊሾ ሻንጉዋ ሲንሳፌ ኡፋይቲሼ ኪዩደሶና። 42 ኤንቲ ኡባ ዎዴ ያሳ ኪሳኒኔ አሳ ሶን ዮሱሲ ኢ ኪሪስቶሳ ጊዴይሳ ታማርሶኔ ሳባኮ አጊቦኮና።

6

ላፕን አሳታ ደራቴላ

1 ሄ ዎዴ ካሌይሳታ ታይቦይ ዳሪ ዳሪ ቢሺን፥ ጊሪኬ ዶና አዴቲያ አይሁዴቲ ዩሁዳን ዩሌቲዲ ዴዲያ አይሁዴታ ቦላ ዙዙሚደሶና። አይስ ጊኮ፥ ጊሪኬ ዶና አዴቲያ አይሁዴቲ፥

«ጋላስ ጋላስ ኢሜቲያ ካላን ኑ አምጫቲ ናቁቶሶና» ያጊዶሶና።
 2 ታማኔ ናምዑ ሃዋሬቲ ዎሳ ኬላ አሳ ኡባ ዩጊዲ፥ «ኑኒ ዎሳ ቃላ
 አዴይሳ አጊዲ ካሲ ጊሻናው ኑስ ቤሴና። 3 ሂዛ፥ ኢሻቶ፥ ሎዎ
 አሳታ፥ ጊሻ አያናኒኔ ጨንጫቴላን ኩሚዳ ላፑን አሳታ ሂንቴ
 ጊዶፌ ዶሪቴ፤ ኑኒ ኤንታ ሃ አሱዋስ ሹማና። 4 ሺን ኑኒ፥ ኑ
 ኩሜላ ዎዲያ ዎሳ ዎሳኒኔ ቃላ ታማርሶን ፔሻና» ያጊዶሶና።

5 ሃዋሬቲ አዲዳ አዳይ አሳ ኡባ ኡፋይሲስ። ሄሳ ጊሾ፥
 አማኖይኔ ጊሻ አያኒ ኩሚዳ ኢስጊፋኖሴ፥ ፊልጶሳ፥ ጲርኮርሳ፥
 ኒቃርኔ፥ ጊሞና፥ ጳርሜናኔ አይሁዴ አማኖ ጌሊ ሲሚዳ አንዎኪያ
 ኒቆላዎሳ ዶሪዶሶና። 6 ኤንታ ሃዋሬታ ሲንላን ኤሲን፥ ሃዋሬቲ
 ኤንታ ቦላ ኩሼ ዎሲዲ ዎሳ ዎሲዶሶና።

7 ዎሳ ቃላይ ዳልጊ ዳልጊ ቢስ። ዩሩሳላሜን ዴዲያ አማኔይሳታ
 ታይቦይ ዳሪ ዳሪ ቢስ፤ ዳር ካሂኔቲካ አማኒዶሶና።

ኢስጊፋኖሴይ አይኬቲስ

8 ኢስጊፋኖሴይ አዶ ኬሃቴላኒኔ ዎልቃን ኩሚዲ አሳ ጊዶን
 አራሳባታኔ ማላታታ አሴስ። 9 አይሌቴላፌ ኬዬዳ አይሁዴ
 ዎሳ ኬላ አሳይ ቁሬናፔኔ ኢስኪንዲሪያፔ ኪልቂያፌኔ ኢሲያፔ
 ዬዳ ኢሲ ኢሲ አሳቲ ዴንዲዲ ኢስጊፋኖሴራ ፓላሚዶሶና።
 10 ሺን ኢስጊፋኖሴይ አያና ዎልቃን አዴቲያ ጨንጫቴላ ኤንቲ
 ኤቁታናው ዳንዳዒቦኮና።

11 ሄ ዎዴ ኤንቲ፥ «ሙሴኔ ዎሳ ኢ ጫዩሺን ሲዒዳ» ጊያ
 ዎርዶ አሳታ ሻሚዶሶና። 12 ሄሳዳ አሲዲ ቢታ ጨማታኔ ሂጌ
 አስታማሬታ ኢያ ቦላ ዴንሲዶሶና። ኢስጊፋኖሴ አይኪዲ ሻንጉዋ
 ሲንሴ ኤፊዶሶና። 13 ኢያ ቦላ ፓይዲዳ ዎርዶ ማርካቲ፥ «ሃ
 ኡራይ ሃ ዎሳ ኬላኔ ሙሴ ሂጊያ ዛሪ ዛሪ ጫዩስ። 14 ኢ፥ <ሃይሲ
 ናዘሬቴ ዩሱሲ፥ ሃ ዎሳ ኬላ ላላና፤ ቃሲ ሙሴይ ኑስ ኢሚዳ
 ሂጊያ ላማና» ያጊሺን ኑኒ ሲዒዳ» ያጊዶሶና።

15 ሻንጉ ሺቆን ኡቲዳ አሳ ኡባይ ኢስጊፋኖሴ ሎይሲዲ ዩሊያ
 ዎዴ ኢያ ሶምዎይ ኪታንቾ ሶምዎ ዳኔስ።

7

ኢስጊፋኖሴ ሃሳዎ

1 ካሂኔታ ሃላቃይ ኢስጊፋኖሴኮ፥ «ሃይሲ ቱሜ?» ያጊዲ
 አይቺስ።

2 ኢስጊፋኖሴይ፥ «ታ ኢሻቶ፥ ታ አዋቶ፥ ሲዒቴ! ኑ አዋ
 አብራሃሜይ ካራኔን ዳናው ባናፔ ሲንሴ ማሴጶዎሚያን ዴዲሺን፥
 ቦንቾ ዎሳይ ኢያው ቆንጨዲ፥ 3 <ኔ ቢታፌኔ ኔ ዳቦታፔ ሻኬታዳ

7:2 ሜዴ 12:1

ታኒ ኔና ቤሲያ ቢታ ባ። ያጊስ። ⁴ ሄ ዎዴ አብራሃሜይ ካልዳዌታ ቢታፊ ኬዱዲ ካራኔን ዳናው ቢስ። ኢያ አዋይ ሃይቂዳፔ ጉዮ ያሳይ ኢያ ሃ ቢታ ሃዲ ሂንቲ ዴዲያ ቤሳ ኤሂስ። ⁵ ኢ ሃ ቢታፊ ሃሪ አቶሺን ቶሆይ ዩዲያ ቤሲካ አብራሃሜስ ኢሚቤና። ሺን ናዲ ኢያው ባይና ዎዴ ያሳይ ሃ ቢታ ኢያውኔ ኢያ ሼሻስ ላታ አሲዲ ኢማናይሳ ቃላ ጌሊስ። ⁶ ያሳይ አብራሃሜስ፣ <ኔ ሼሻይ ሃራ ቢታን ኢማላቴሳን ዳና፤ ያን አይዱ ጌቱ ላይሲ ኤንቲ አይሌቴሳን ሃራታና። ⁷ ሺን ታኒ ኔ ሼሻ ሃሪያ ዴሪያ ቦላ ፒርዳና። ሄሳፊ ጉዮ፣ ኤንቲ ሄ ቢታፊ ኬዱዲ ሃይሳን ታው ጎይናና) ያጊስ።

⁸ ያሳይ አብራሃሜ ሼሻይ ቃፃራታና ሜላ ኢያራ ጫቂን፣ ዩሳቂ ዩሌቲዳ ሆስፑንሳ ጋላሳን ቃፃሪስ። ዩሳቂ ያይቆባ ቃፃሪስ፤ ቃሲ ያይቆቢ ታማኔ ናምዑ ባ ናይታ፣ ኑ አዋታ ማይዛታ ቃፃሪስ።

⁹ «ያይቆባ ናይቲ ዮሴፋ ቃናቲዲ ጊብዜ ቢታን አይሌቴሳስ ባይዚዶሶና፣ ሺን ያሳይ ኢያራ ዴዴስ። ¹⁰ ኢያ፣ ኢያ ዋዩ አብፊ ኬሲስ። ጊብዜ ካዉዋ ሲንሳን ሳባኔ ጨንጫቴሲ ኢያው ኢሚስ። ጊብዜ ካዎይ ዮሴፋስ ጊብዜ ቢታኔ ባ ኬላ ኡባ አይሳናዳ ሃላቃቴሲ ኢሚስ።

¹¹ «ጊብዜ ቢታኒኔ ካናኔ ቢታ ኡባን ኮሺ ጌሊዲ ዳሮ አሳ አንዴሲስ። ሄ ዎዴ ኑ ማይዛቲ ካሲ ዴማናው ዳንዳሲቦኮና።

¹² ያይቆቢ ጊብዜ ቢታን ካሲ ዴዴይሳ ሲዲዲ ኑ አዋታ ኮይሮ ያ ዩዲስ። ¹³ ናምዎንጶ ቡሳን ዮሴፊ ባ ኢሻታስ ባናቴሳ ኤሪሲስ። ጊብዜ ካዎይካ ዮሴፋ ሼሻ ኤሪስ። ¹⁴ ዮሴፊ ባ አዋ ያይቆባኔ ባ ዳቦ ኡባ፣ ላፑን ታማኔ ኢቻሹ አሳ ባኮ ያና ሜላ ኪቲዲ ኤሂሲስ። ¹⁵ ያይቆቢ ጊብዜ ቢታ ዎዲስ፤ ኢኔ ኢያ ናይቲ ያን ሃይቂዶሶና። ¹⁶ ኤንታ አሃይ ሄ ቤሳፊ ሴኬሜ ቢታ ቶኬቲዲ ቢዲ፣ ያን አብራሃሜይ ሃዋሬ ናይታፔ ዳሮ ቢራን ሻሚዳ ዱፎን ሞጌቲስ።

¹⁷ «ሺን ያሳይ አብራሃሜስ ኢማና ጊዳይሳ ፖሊያ ዎዴይ ጋካናው ማቲዳ ዎዴ ጊብዜ ቢታን ዴዲያ ኑ አሳይ ዳሪ ዳሪ ቢስ። ¹⁸ ሄሳፊ ጉዮ፣ ዮሴፋ ኤሮና ሃራ ካዎይ ጊብዜ ቢታን ካዎቲስ። ¹⁹ ሄ ካዎይ ኑ ዜሬላ ጌኒዲ ጉላ ናይቲ ሃይቃና ሜላ ኤንታ ካሬ ኬሲ ዩጋና ሜላ ኑ አዋታ አንዴሲስ።

7:4 ሜዴ 11:31፤ 12:4 7:5 ሜዴ 12:7፤ 13:15፤ 15:18፤ 17:8 7:6 ሜዴ 15:13-14 7:7 ኬላ 3:12 7:8 ሜዴ 17:10-14፤ 21:2-4፤ 25፤ 26፤ 29:31-35 7:9 ሜዴ 37:11፤ 28፤ 39:2፤ 21 7:10 ሜዴ 41:39-41 7:11 ሜዴ 42:1-2 7:13 ሜዴ 45:1፤ 16 7:14 ሜዴ 45:9-10፤ 17-18፤ 46:27 7:15 ሜዴ 46:1-7፤ 49:33 7:16 ሜዴ 23:3-16፤ 33:19፤ 50:7-13፤ ኢያ 24:32 7:17 ኬላ 1:7-8 7:19 ኬላ 1:10-11፤ 22

20 «ሄ ዎዴ ሙሴይ ዩሌቲስ፤ ኢ ያሳ ሲገሳን ዳር ሎዎ ናዓ።
ባ አዋ ኪሳን ሄዙ አገና ጋካናው ዲጨስ። 21 ሙሴይ ዎራ
ሆሌቲዳ ዎዴ ጊብዜ ካዉዋ ናዒያ ዴማ ኤካዳ ባ ናዓ አሳዳ ኢያ
ዲቻሱ። 22 ሙሴይ ጊብዜታ ጨንጫቴሳ ኡባ ታማሪዲ አዳኒኔ
አሶን ሚኖ አሲ ጊዲስ።

23 «ሙሴስ ላይሳይ አይታማ ኩሚዳ ዎዴ ባ ኢሻታ፥
ኢስራዔሌታ ቤዓናው ባ ዎዛናን ቆፒስ። 24 ኢስራዔላታ፤ ኢሱዋ
ጊብዜ ኢሶይ ቆሂሺን ቤዒዲ ሄ ኢስራዔሌ ኡራ ማዲዲ፥ ሄ ቆሂዳ
ጊብዜ ኡራ ዎዲዲ ኩሼ ዛሪስ። 25 ሙሴይ ባ ኢሻታ ባ ባጋራ
ያሳይ አሻናው ሃይይሳ ኤንቲ አኬካና ጊዲ ቆፒስ፥ ሺን ኤንቲ
አኬኪቦኮና።

26 «ዎንቴሳ ጋላስ ናምዑ ኢስራዔሌ አሳቲ ኢሶይ ኢሱዋራ
ዋዴቲሺን ዴሚዲ ኤንታ ሲገሳናው ኮዩዲ፥ <አሳቶ፥ ሂንቴ
ኢሻንታ፤ አይስ ኢሶይ ኢሱዋ ቆሄቲ?> ያጊስ።

27 «ሺን ባ ላጊያ ቆሄይሲ ሙሴኮ፥ <ኔና ኑ ቦላ ሃራይሳኔ ዳይና
አሲዳይ አኔ? 28 ኔኔ ዜኔ ጊብዜ ኡራ ዎዲዳይሳዳ ታና ዎዳናው
ኮዩዲ?> ያጊዲ ሙሴ ሱጊ ዩዲስ። 29 ሙሴይ ሄሳ ሲዒዳ ዎዴ
ጊብዜፌ ቤቲዲ ሚዲያሜ ቤታን ቤቴ አሲ ጊዲዲ ዴዒሼ ናምዑ
አዴ ናይታ ዩሊስ።

30 «ጎዳ ኪታንቾይ አይታሙ ላይሳፌ ጉዩ ሲና ዴሪያ ማታን
ዴዒያ ባዞ ቱሺያ ጊዶን ኤዒያ ታማ ላጮ ጊዶን ሙሴስ ቤንቲስ።

31 ሙሴይ ባ ቤዒዳይሳን ማላሌቲዲ፥ ሎይሲ ቤዓናው ቱሺያ
ማቲ ሺቂዲ ዴዒሺን፥ ጎዳ ቃላይ፥ 32 <ታኒ ኔ አዋታ፥ አብራሃሜ
ያሳ፥ ዩሳቃ ያሳ፥ ያይቆባ ያሳ> ያጊሼ ሙሴኮ ዩስ። ሙሴይ ያሻን
ኮኮሪዲ ያላናው ዳንዳዒቤና።

33 «ጎዳይ ሙሴኮ፥ <ኔኔ ኤቂዳ ቢታይ ጊሺ ጊዲያ ጊሾ ኔ
ቶሁዋን ዴዒያ ጫማ ኬሳ። 34 ታኒ ጊብዜን ዴዒያ ታ አሳ
ኡንዔቴሳ ቤዓስ። ኤንታ ዋሱዋ ሲዒዳ ኤንታ አሻናው ዎዳስ።
ሃዒ ሃያ! ታኒ ኔና ጊብዜ ኪታና> ያጊስ።

35 «ኢስራዔሌቲ ሙሴ፥ <ኔና ኑና ሃራይሳኔ ዳይና አሲዳይ አኔ?>
ያጊዲ ኢዒዳይሳ ቱሺያ ጊዶን ኢያው ቤንቲዳ ኪታንቾዋ ባጋራ
ሃራይሳኔ አሼይሳ አሲዲ ያሳይ ኪቲስ። 36 ሙሴይ ኢስራዔሌታ
ጊብዜፌ ኬሲዲ ማላሊሲያባታኔ አራሳባታ ጊብዜ ቤታኒኔ ዞዎ
አባን አሲዲ ኤንታ አይታሙ ላይሲ ባዞ ቤታን ካሌሲስ።

7:20 ኬሳ 2:2 7:21 ኬሳ 2:3-10 7:23 ኬሳ 2:11-15 7:29 ኬሳ
18:3-4 7:30 ኬሳ 3:1-10 7:35 ኬሳ 2:14 7:36 ኬሳ 7:5፤ 14:21፤
ታይ 14:33

37 «ኢስራዔል አሳኮ፥ ለሰላይ ታና ዴንሲዳይሳዳ ሂንቴ ሽሻ ጊደፌ ታ ሜላ ናቤ ሂንቴው ዴንሳና) ያጊዳይ ሄ ሙሴ። 38 ባዞ ቢታን ሸቂዳ ኢስራዔል አሳራ ዴዲዳይሲ፥ ኑ አዋታራኔ ሲና ዴሪያ ቦላ ኢያው አዲዳ ኪታንቸዋራ ዴዲዳ ሙሴይ ኢያ። ያቲዲ፥ ሰላ ዴያ ቃላ ኑስ ኢማናው ኤኪስ።

39 «ሺን ኑ ማይዛቲ ሙሴስ ኪቴታናው ዶሲቦኮና፤ ኢያ ኢዲዲ ጉዬ ጊብዔ ሲማናው አሞቲዶሶና። 40 ቃሲ አሮናኮ፥ ስና ካሌሲያ ሰላታ ኑስ አሳ። አይስ ጊኮ፥ ሃይሲ ኑና ጊብዔፌ ኤሂዳ ሙሴይ፥ ዋኒዳኮ ኑኒ ኤሮኮ) ያጊደሶና። 41 ሄ ዎዴ ማሪ ዳኒሲዲ ኤቃ አሲዶሶና። ሄ ኤቃስ ያርሾ ያርሺዲ ባንታ ኩሼን አሲዳ አሱዋን አፋይቲዶሶና። 42 ሺን ሰላይ ኤንታው ዞኮ ኤሪስ፥ ኤንቲ ሳሎ ያሊንቶታ ጎይናና ሜላ ኤንታ ዩጊ አጊስ። ናቤታ ማፃፋን፥

ሀኪስራዔል አሳው፥ አይታሙ ላይሲ ኩሜሲ

ባዞ ቢታን ሸኪዳ ሚሂያኔ ያርሺዳ ያርሹዋ ታው ያርሺዴቲ?

43 ሂንቴ፥ ሂንቴው ጎይናናው ኪሲዳ ኤቃኔ ሞሎኬ ዱንካኒያ ሬፋና ጊያ ሂንቴ ሰላ ያሊንቶ ሚሲሊያ ቶኪዴታ።

ታኒ ሂንቴና ባቢሎኔፔ

ሂኒ ባጋ ዩዳና) ጌቴቲዲ ፃፌቲስ።

44 «ኑ አዋታስ ባዞ ቢታን ማርካ ዱንካኔይ ዴዔስ። ኢያካ ሰላይ ሙሴ ኪቲዳይሳዳኔ ኢያ ቤሲዳይሳዳ አሲስ። 45 ቃሲ ኑ አዋቲ ሄ ዱንካኒያ ባንታ አዋታፔ ኤኪዲ ሰላይ ካሴ ዩዴሲዳ አይሁዴ ጊዶና አሳ ቢታ አይኪዳ ዎዴ ኢያሱራ ያ ኤኪዲ ጌሊዶሶና። ሄ ዱንካኔይ ዳዊቱ ዎዴ ጋካናዉካ ሄ ቤሳን ዴዲስ። 46 ዳዊቱይ ሰላን ሳቤቲስ። ቃሲ ያይቆባ ጎዳይ ዴዔና ኪሳ ኬፃናው ሰላ ዎሲስ።

47 ሺን ኢያው ኪሳ ኬዲዳይ ሶሎሞኔ።

48 «ሃኖሺን፥ አባፌ ቦላ ሰላይ አሲ ኬዲዳ ኪሳን ዴና። ናቤይ ጊዳይሳ ሜላ፥

49 ሳሎይ ታ አራታ፥

ሳዓይካ ታ ቶሆይ ዩዲያሶ።

ያቲን፥ ታው ሂንቴ አይ ሜላ ኬሲ ኬፃኔ?

ዎይኮ ታኒ ሸምፒያሶይ አዉኔ? 50 ሃ አባ ታ ኩሺያን አሳቢኪና?) ያጌስ ጎዳይ።

7:37 ዛሬ 18:15፣ 18 7:38 ኬሳ 19:1-20:17፣ ዛሬ 5:1-33 7:40 ኬሳ 32:1 7:41 ኬሳ 32:2-6 7:42 አሞ 5:25-27 7:44 ኬሳ 25:9፣ 40 7:45 ኢያ 3:14-17 7:46 2ሳሙ 7:1-16፣ 1ታሪ 17:1-14 7:47 1ካዎ 6:1-38፣ 2ታሪ 3:1-17 7:49 ኢሳ 66:1-2

51 «ሂንቴ ዋኒዳ ሲያና አሴ? ሂንቴ ዎዛናይ ያሳ ቃላ ኤካናው አይስ ኢጊዴ? ሂንቴ ሃይሳይ አይስ ቱሊዴ? ሂንቴ፥ ሂንቴ አዋታሶ ኡባ ዎዴ ጌሻ አያናራ ኤቄቴታ። 52 ናቤታ ጊዶፌ ሂንቴ አዋቲ ጎዶናይ እኔ? ያሳ ናዓይ፥ ጊሎይ ያናይሳ ካሴቲዲ አዲዳይሳታ ዎዲዶሶና። ሃዲ ሂንቴ ኢያ አሲ ኢሚዲ ዎዲዴታ። 53 ሂንቴ ኪታንቸዋ ኩሼፕ ያሳ ሂጊያ ኤኪዴታ፥ ሺን ኪቴቲቤኬታ» ያጊስ።

ኢስጊፋናሴይ ሹቻን ጫዴቲስ

54 ኤንቲ ሄሳ ሲዲዳ ዎዴ ባንታ ዎዛናን ኢስጊፋናሴ ቦላ ዳሮ ዩሎቲዲ፥ ባንታ ሜቴርሻ ሳጊዲ ማንዲዶሶና። 55 ሺን ኢስጊፋናሴይ ጌሻ አያናን ኩሚዲ፥ ሳሎ ፑዴ ግሊዲ፥ ያሳ ቦንቸዋኔ ዩሱሳ ያሳ ኡሻቻ ባጋን ኤቄዳይሳ ቤዲስ። 56 «ሄኮ፥ ታኒ ሳሎይ ዶዩቲን፥ አሳ ናዓይ፥ ያሳ ኡሻቻ ባጋን ኤቄዳይሳ ቤዳይስ» ያጊስ።

57 ቃላ ዶቄ አሲዲ ዋሲሼ፥ ባንታ ሃይሳ አይኪዲ ኢሲፌ ኢያኮ ዎጊዶሶና 58 ኢያ ካታማፕ ጋፃ ኬሲዲ፥ ሹቻን ጫዲዶሶና። ማርካቲ ባንታ ማዑዋ ኢሲ ሳዖላ ጊያ ናዓቴሳ ማታን ዎሲዶሶና።

59 ኢስጊፋናሴይ፥ «ታ ጎዳ ዩሱሳ፥ ታ ሼምፑዋ ኤካ» ያጊዲ ግጊሺን ኤንቲ ኢያ ሹቻን ጫዶሶና። 60 ጉልባቲዲ፥ ባ ቃላ ዶቄ አሲዲ፥ «ታ ጎዳው፥ ሃ ናጋራ ኤንታው አቶ ጋ» ያጊስ። ሄሳ ያጊዲ ሲሚዳ ሜላ ሃይቂ አጊስ።

8

ሳዖሊ አማኒያ አሳ ጎዲስ

1 ሳዖሊ ኢስጊፋናሴ ሃይቄዎን ኡፋይቲስ። ሄ ጋላስ ዩሩሳላሜን ዴዲያ ዎሳ ኬሳን ጊታ ጎዲ ዴንዲስ። ሃዋሬቲ አቲን አማኔይሳቲ ኡባይ ዩሁዳ ቤታኒኔ ሳማሬ ቤታን ላሌቲዶሶና። 2 ኢሲ ኢሲ ያሳ አሳቲ ኢስጊፋናሴ ሞጊዶሶና፤ ቃሲ ኢያው ዳሮ ዩኪዶሶና። 3 ሺን ሳዖሊ ዎሳ ኬሳ ዳይሳናው ኮዩስ። ሶ ሶ ዩዩ ጌሊዲ፥ አማኒያ አዴታኔ ማጫሳታ ጎቺ ጎቺ ኬሲዲ ቃሾ ኬሊ ጌልሴስ።

ዎንጌላይ ሳማሬን ሳባኬቲስ

4 ላሌቲዳ አማኔይሳቲ ቤዳ ቤሳ ኡባን ቃላ አዲዶሶና። 5 ፊልጶሲ ሳማሬ ካታማ ቤዲ ኪሪስቶሳባ አሳስ አዲስ። 6 ዳሮ አሳይ ፊልጶሲ ጊዳይሳ ሲዲዳ ዎዴኔ ኢ አሲያ ማላታታ ቤዲዳ ዎዴ ኢያ አኬኪዲ ሲዲዶሶና። 7 ቱና አያናቲ ዋሲዲ ዳሮ አሳፕ

ኪዩዶሶና፤ ቃሲ ዳሮ ጉንዳቲኔ ዎቤቲ ቢሌቲዶሶና። 8 ሄ ካታማን ዴዲያ አሳይ ዳሮ ኡፋይቲዶሶና።

9 ሺን ሲሞና ጊያ ኢሲ ኡራይ ሄ ካታማን ዴዴስ። ኢ፥ <ባና ጊታ> ጊዲ ሳማሬ አሳ ማሮቴሳን ማላሊሲሺ ጋምዲስ። 10 ጉሳፌ ጊታ ጋካናው ዴዲያ አሳ ኡባይ፥ «ጊታ ያሳ ዎልቃይ ሃይሳ» ጊዲ ኢያባ ሲያሶና። 11 ዳሮ ዎዴፕ ዶሚዲ ማሮቴሺ ሳማሬ አሳ ማላሊሲዳ ጊሾ አሳይ ኢያባ ሲያሶና። 12 ሺን ፊልጶሲ ያሳ ካዎቴሳባኔ ዩሱስ ኪሪስቶሳ ሱንሳባ አዴታሲኔ ማጫታስ አዲን፥ ኡንቲ ኢያባ አማኒዲ ማጭቲዶሶና። 13 ቃሲ ሲሞናካ ባ ሁዌን አማኒዲ ማጭቲዶሶና። ፊልጶሳራ ኢሲፌ ቢዳ ቤሳ ኡባን አሴቲያ ጊታ ማላታታ ቤዲዲ ማላሌቲስ።

14 ዩሩሳላሜን ዴዲያ ሃዋራቲ ሳማሬ አሳይ ያሳ ቃላ ኡኪዳይሳ ሲዲዳ ዎዴ ጳዊሮሳኔ ዮሃንሳ ኤንታኮ ዩዲዶሶና። 15 ጳዊሮሲኔ ዮሃንሲ ቢዲ፥ አማኔይሳቲ ጌሻ አያና ኡካና ሜላ ኤንታው ያሳ ዎሲዶሶና። 16 አይስ ጊኮ፥ ሳማሬ አሳቲ ጎዳ ዩሱሳ ሱንሳ ማላን ማጭቲዶሶና፤ አቲን ኤንታፌ ኢሱዋ ቦላካ ጌሻ አያኒ ዎዲቤና። 17 ሄ ዎዴ ጳዊሮሲኔ ዮሃንሲ ባንታ ኩሺያ ኤንታ ቦላ ዎሲን፥ ኤንቲ ጌሻ አያና ኡኪዶሶና።

18 ሃዋራቲ ባንታ ኩሺያ ኤንታ ቦላ ዎሲን፥ ኤንታው ጌሻ አያናይ ኢሜቲዳይሳ ሲሞኒ ቤዲዳ ዎዴ ጳዊሮሳሲኔ ዮሃንሳስ ሚሼ ኡሂዲ፥ 19 «ታኒካ ታ ኩሺያ ዎሲያ ኡባይ ጌሻ አያና ኡካና ሜላ ሃ ማታ ታውካ ኢሜርኬቲ» ያጊስ።

20 ሺን ጳዊሮሲ ኢያኮ፥ «ኔኒ ያሳ ኢሞታ ሚሼን ሻማናው ቆፒዳ ጊሾ ኔ ሚሼይ ኔራ ዳዮ። 21 ኔ ዎዛናይ ያሳ ሲንሳን ሱሬ ጊዶና ጊሾ ኔው ሃይሳን ጊሾይ ዎይኮ ቃዲ ባዋ። 22 ሂዛ፥ ሃ ኔ ዎዛና ኢታቴሳ ጊሾ ናጋራፕ ሲማ። ኔ ዎዛናን ዴዲያ ኢታ ቆፋ ያሳይ አቶ ጋና ሜላ ያሳ ዎሳ። 23 ጋሶይካ፥ ኔኒ ኢታ ቃናቴኒኔ ናጋራ ቃሹዋን ዴዴይሳ ታኒ ቤዳይስ» ያጊስ።

24 ሲሞኒ ዛሪዲ፥ «ሂንቴ ጊዳይሳፌ ኢሶይካ ታና ጋኮና ሜላ ታው ያሳ ዎሲቱ» ያጊስ።

25 ጳዊሮሲኔ ዮሃንሲ ማርካቲዳፕኔ ጎዳ ቃላ አዲዳፕ ጉዩ ዩሩሳላሜ ሲሚዶሶና። ሳማሬን ዴዲያ ዳሮ ጉታታን ዎንጌላ አዲዶሶና።

ፊልጶሲ ቶጲያ ሞሪና ማጭስ

26 ጎዳ ኪታንቾይ ፊልጶሳኮ፥ «ዴንዳዳ ዩሩሳላሜፕ ጋዛ ኡፊያ ባዞ ቢታ አጊያኮ ባ። ሄ አጌይ ዱጌሃ ባጋራ ዴዴስ» ያጊስ። 27 ፊልጶሲ ዴንዲዲ ቤስ፥ ሂንዴኬ ጊያ ቶጲያ ካዌስ ኢ ሚሼ ኡባ ናጊያ ቶጲያ አሲ ዴዴስ። ኢካ ጎይናናው ዩሩሳላሜ ቤስ።

28 ፓራ ጋሪያን ኡቲዲ፥ ዩሩሳሌም ላይ ባ ሲታ ሲሚሼ ናቢያ ኢሳያሳ ማፃፋ ናባቤስ።

29 ጌሻ አያናይ ፊልጶስ፥ «ሄ ጋሪያኮ ባዳ ኢያ ማቲ ሺቃ» ያገለገለ።

30 ያቲን ፊልጶስ ምጊ ቢዲ ጋኪያ ምዴ ሞሪናይ ናቢያ ኢሳያሳ ማፃፋቴ ናባቤሺን ሲዲዲ፥ «ኔ ናባቤያሲ ኔው ጌሊ?» ያገለገለ።

31 ሞሪናይ፥ «ታው አዲ ጌልሲያ አሲ ባይና ሞኒዲ ጌላኔ?» ያገለገለ። ባራ ጋሪያን ኬዩዲ ኡታና ሜላ ፊልጶስ ዎሲስ። 32 ሞሪናይ ናባቤያ ማፃፋ ኪፊሌይ፥

«ኢ ዶርሳዳ ሹኪታናው ላጌቲስ፤ ዶርሳ ማሪ ባ ኢኪሲያ ሜዴይሳታ ሲንሳን ሲዲ ጌይሳዳ፥ ኢካ ባ ዶና ዶዩቤና።

33 ኢ ካዉዩስ፤ ኢያው ጊሎ ፐርዲ ዳይስ። ኢያ ዴያይ ሃ ሳዓቴ ቃንጌቲዳ ጊሾ ኢያ ሹሻባ አኔ አዳናይ?» ያገለገለ።

34 ሞሪናይ ዛሪዲ ፊልጶስ፥ «ናቤይ አዴባ አዲ? ባባ አዲዬ ምይኮ ሃራ አሳባ አዲ? ታው አዳርኪ» ያገለገለ። 35 ፊልጶስ ዛሪዲ፥ ያሳ ቃላ ሄ ቤሳፌ ዶሚዲ፥ ዩሱሳባ አዲያ ምንጌላ ኢያው አዲስ።

36 ኤንቲ ቢሼ ሃሲ ዴዲያሶ ጋኪዶሶና። ሞሪናይ፥ «ሃሴ ሃይሳ ቤዓ፤ ታ ማጭቶና ሜላ አይቤ ዲጊ?» ያገለገለ።

37 ፊልጶስ ኢያኮ፥ «ኔኔ ኔ ኩሜሳ ምዛናቴ አማኒኮ ዳንዳዓሳ» ያገለገለ።

ኢ ዛሪዲ፥ «ዩሱስ ኪሪስቶሲ ያሳ ናዓ ጊዴይሳ ታኔ አማናይስ» ያገለገለ።

38 ጋሬይ ኤቃና ሜላ ሞሪናይ ኪቲን፥ ናምዓይ ምዲዲ ሃሳን ጌሊዶሶና፤ ፊልጶስ ኢያ ማጭቲስ። 39 ኤንቲ ሃሳፌ ጋፃ ኬዩዳ ምዴ ጎዳ አያናይ ፊልጶስ ቆፖና ኤኪስ። ናምዓንሶ ሞሪናይ ፊልጶስ ቤዒቤና፥ ሺን ባ አጊያ ኡፋይቲሼ ቢስ። 40 ፊልጶስ አዛዎናን ባና ዴሚስ። ቃሲ ቂሳሪያ ያና ጋካናው ካታማታን ዩዩዲ ምንጌላ ማርካቲስ።

9

ሳዎሊ ኪሪስቶሳ አማኒስ
(ሃ.አ 22፡6-16፤ 26፡12-18)

1 ሄ ምዴ ሳዎሊ ጎዳ ካሌይሳታ ምዳናው ማንዲዲ ካሂኔ ሃላቃኮ ቢስ። 2 ጎዳ አጊያ ካሊያ አዴታኔ ማጫታ ዴሚኮ፥ ቃቸሼ

ዮሐንስም ከሃናው፥ ዳማስቆን ደዲያ አይሁዴ ዎሳ ኪሳታስ ዳብዳቤይ የጌታና ሜላ ኢያ ዎሲስ።

3 ኢ ቢዲ፥ ዳማስቆ ካታማ ጋካናው ማቲሺን፥ ቆፖና ሳሎፕ ዎልቃማ ፖጆይ ኢያ ዩሹዋን ፖረስ። 4 ኢ ሳዓን ኩንዲዳሺን፥ «ሳዎላ፥ ሳዎላ፥ አይስ ታና ጎዳይ?» ጊያ ቃላ ሲዲስ።

5 ሳዎላ፥ «ጎዳው፥ ነኒ ኦኔ?» ያጊዲ አይቺስ።
«ታኒ፥ ነኒ ጎዲያ ዮሱሳ» ያጊስ።

6 ሺን ሳዎላ ኮኮሪሼኔ ማላሌቲሼ፥ «ጎዳው፥ ታኒ አይ አሳና ሜላ ኮያይ?» ያጊስ።

ጎዳይ ኢያኮ፥ «ዴንዳዳ ካታማ ጌላ፤ ነኒ አሳናው ቤሲያባይ ያን ኔው አዴታና» ያጊስ።

7 ሳዎላራ አጊያ ቢያ አሳቲ አይኮካ አዴቶና ኤቲ አቲዶሶና። ቃላ ሲዶሶና፥ ሺን አናካ ቤዲቦኮና። 8 ሳዎላ ኩንዲዳ ቤሳፌ ዴንዲዲ ዪሊያ ዎዴ ኢያ አይፌይ ዴሞና ኢዲስ። ሄሳ ጊሾ፥ ኤንቲ ኢያ ኩሺያ አይኪዲ ካሌሲዲ ዳማስቆ ጌልሲዶሶና። 9 ሄቸ ጋላስ ጋካናው ኢ ያላናው ዳንዳዲቤና፤ አይኮካ ሚቤና፤ ኡዩቤና።

10 ዳማስቆን ኢሲ ሃናኒያ ጊያ ዮሱሳ ታማሬይ ዴዔስ። ጎዳይ ቆንጩሳን፥ «ሃናኒያ» ያጊዲ ያጊስ።

ሃናኒይ ዛሪዲ፥ «ታ ጎዳው፥ ሃይሳን ዴዓይስ» ያጊስ።

11 ጎዳይ ኢያኮ፥ «ዴንዳዳ ሱሬ ጌቴቲያ አጊያ ባዳ፥ ዩሁዳ ሶን ሳዎላ ጊያ ቴርሴሴፕ ዩዳ ኡራ ኮያ፤ ሳዎላ ዎሴስ። 12 ቃሲ ሃናኒይ ጌሊዲ፥ ሳዎላ ናምዓንሶ ያላና ሜላ ባ ኩሺያ ኢያ ቦላ ዎሲሺን ቆንጩሳን ቤዲስ» ያጊስ።

13 ሃናኒይ ዛሪዲ፥ «ጎዳው፥ ዮሐንስምን ኔ ጌሻ አሳ ቦላ ሄ ኡራይ አይ ሜላ ኢታባ አሲዳኮ ታኒ ዳሮ አሳፕ ሲዓስ። 14 ቃሲ ዳማስቆን ኔ ሱንሳ ያጌይሳታ ኡባ ቃቻናው፥ ካሂኔ ሃላቃቲ ኢያው ማታ ኢሚዶሶና» ያጊስ።

15 ሺን ጎዳይ ኢያኮ፥ «ሳዎላ አይሁዴ ጊዶና አሳ ሲንሳን፥ ካዎታ ሲንሳኒኔ ኢስራዔሌ አሳ ሲንሳን፥ ታ ሱንሳ ኤሪሳናውኔ ታው አሳናው ዶሬቲዳ ሚሼ ጊዲያ ጊሾ ነኒ ኢያኮ ባ። 16 አይስ ጊኮ፥ ታ ሱንሳ ጊሾ ኢ አይ ሜላ ዋዩ ኤካናው ቤሲያኮ ታኒ ኢያ ቤሳና» ያጊስ።

17 ሃናኒይ ቢዲ፥ ሶ ጌሊዲ፥ ባ ኩሺያ ሳዎላ ቦላ ዎሲዲ፥ «ታ ኢሻ ሳዎላ፥ ነኒ ያ አጊያን ኔው ቤንቲዳ ጎዳ ዮሱሲ፥ ነኒ ያላና ሜላኔ ጌሻ አያናን ኩማና ሜላ ታና ኪቲስ» ያጊስ። 18 ኤሌሲዲ፥ ሳዎላ አይፊያፕ ኢሲ ፖቆ ሜላባይ ዎዲን፥ ሳዎላ ናምዓንሶ ዪሊስ። ቃሲ ዴንዲዲ የማቁቲስ። 19 ካሲ ሚዲ የሊዲ፥ ዳማስቆን ዴዲያ አማኔይሳታራ ጉሳ ጋላስ ጋምዲስ።

ሳዎላ ዳማስቆን ታማርሲስ

20 ኤሌሲዲ ሳዖሊ፥ «ዮሱሲ ያሳ ናዓ» ያጊዲ ዳማስቆን ዴዲያ አይሁዴ ዎሳ ኬሳታን ቃላ ታማርሲስ።

21 ሄሳ ሲዲዳ ኡባይ ማላሌቲዲ፥ «ሃይሲ ዩሩሳላሜን ዮሱሳ ሱንሳ ዪይይሳታ ቃቼይሳ ጊዴይዩ? ቃሲ ሃ ዩዳይ ኤንታ ቃቼዲ፥ ካሂኔ ሃላቃታ ሲንሴ ኤፋናሳ ጊዴይ?» ያጊደሶና።

22 ሺን ሳዖሊ ቃላ አዶን ሚኒ ሚኒ ቢስ። ዮሱሲ፥ ኢ ኪሪስቶሳ ጊዴይሳ ቆንጨሲዲ አዲዳ ጊሾ ዳማስቆን ዴዲያ አይሁዴቲ ኢያው ዛሪያባ ዳዩደሶና።

23 ዳሮ ጋላሳፔ ጉዩ አይሁዴቲ ሺቂዲ፥ ሳዖላ ዎዳናው ዘራቲደሶና። 24 ሺን አይሁዴቲ ባና ዎዳናው ቆፒዳይሳ ሳዖሊ ሲዲስ፥ ኤንቲ ኢያ ዎዳናው ቃማኔ ጋለስ ካታማ ፔንጊያን ናንሶና። 25 ሺን ኢያ ታማሬቲ ኢያ ቃማ ኤፊዲ፥ ጊምቤ ዲርሳ ማስኮቲያራ ዳቾራ ዎዲሲደሶና።

ሳዖሊ ዩሩሳላሜን ታማርሲስ

26 ሳዖሊ ዩሩሳላሜን ጋኪዳ ዎዴ አማኔይሳታራ ጋሄታናው ኮዩስ። ሺን ኢ ኪሪስቶሳ አማኔይሲ ኤንታው ቱማ ዳናና ኢዲን ኢያው ያዩደሶና። 27 ሺን ባርናባሲ ሳዖላ ሃዋሬታኮ ኤፊስ፥ አጌን ጎዳይ ዋኒዲ ቆንጨዳኮኔ ሃሳዩሲዳኮ፥ ቃሲ ሳዖሊ ዳማስቆን ዮሱሳ ሱንሳን ያዮና ዋቲዲ ቃላ አዲዳኮ ኤንታው ጌሺዲ አዲስ። 28 ሳዖሊ ዩሩሳላሜን ዩዩዲ ጎዳ ሱንሳን ያዮና ቃላ አዲሽ፥ ሃዋሬታራ ኢሲፌ ዴዲስ። 29 ቃሲ ሳዖሊ ጊሪኬ ቃላ ሃሳያ አይሁዴታራ አዴቲሽ ፓላሜስ። ሺን ኤንቲ ኢያ ዎዳናው ኮዩደሶና። 30 አማኒያ አሳቲ ሄሳ ሲዲዲ፥ ሳዖላ ቂሳሪያ ኤፊዲ ቴርሴሴ ዩዲደሶና።

31 ዩሁዳን፥ ጋሊላኒኔ ሳማሬ ኡባን ዴዲያ ዎሳ ኬሳቲ ሳሮቴሳን ዴዲደሶና። ቃሲ ሚኒደሶና፤ ጎዳስ ያዩሽ ጌሻ አያና ሚንሴሱዋን ዳሪ ዳሪ ቢደሶና።

ጴጌሮሲ ሊዳኒኔ ዮጵን ታማርሲስ

32 ጴጌሮሲ ቢታ ኡባ ዩዩሽ ሊዳን ዴዲያ አማኒያ አሳታኮ ጋኪስ። 33 ያን ሆስፑን ላይሲ ኩሜሲ ጉንዲዲ አርሳን ዚንዲዲ ዴዲያ ኤኒያ ጊያ አዲያ ዴሚስ። 34 ጴጌሮሲ፥ «ኤኒያ፥ ዮሱስ ኪሪስቶሲ ኔና ፓላና፤ ዴንዳዳ ኔ ሂፃ ዴንሳ» ያጊስ። ኢካ ኤሌሲዲ ዴንዲ ኤቂስ። 35 ሊዳኒኔ ሳሮናን ዴዲያ አሳ ኡባይ ኤኒያ ቤዲዲ፥ ጎዳኮ ሲሚደሶና።

36 ዮጵ ካታማን ኢሲ ፃቢቶ ጊያ አማኒያራ ዴዳውሱ። (ፃቢቶ ጉሳይ ጌንዔ ጉሱ) ኢያ ባ ዴዲዳ ዎዴ ኡባን ሎዖባ አሳሽኔ

ማንቆታ ማዳሽ ዴዓሱ።³⁷ ሄ ዎዴ ኢያ ሃርጋዳ ሃይቁን፤ አሳይ ኢ አሃ ሜጪዲ፤ ፖቂያ ቦላ ኬሲዲ ዚንዲሲዶሶና።³⁸ ሊዲ ዮጴስ ማታ። አማኔይሳቲ ጴጊሮሲ ሊዳን ዴዔይሳ ሲዲዲ፤ «ሃያና ኑኮ ኤሌሳዳ ያ» ያጊያ ኪታ ናምዑ አሳታ ቦላ ኢያኮ ኪቲዶሶና።

³⁹ ሄሳ ጊሾ፤ ጴጊሮሲ ዴንዲዲ፤ ኤንታራ ቢስ። ያ ጋኪን፤ ፖቂያ ቦላ ዴዲያ ኪፊሊያ ኢያ ጌልሲዶሶና። አምዔቲ ጴጊሮሳ ዩሹዋን ኤቂዲ ዩኪሼ ዶርቃ ኤንታራ ፓፃ ዴዓሽ አሲዳ ቃሚሴታኔ አፊላታ ኡባ ጴጊሮሳ ቤሲዶሶና።⁴⁰ ጴጊሮሲ ኤንታ ኡባ ካሬ ኬሲዲ፤ ጉልባቲዲ ያሳ ዎሲስ። ቃሲ አሃኮ ሲሚዲ፤ «ፃቢቴ፤ ዴንዳ» ያጊስ። ፃቢታ ባ አይፊያ ዶያዳ ጴጊሮሳ ቤዓዳ፤ ዴንዳ ኡታሱ።⁴¹ ጴጊሮሲ ኢያ ባ ኩሺያን ማዲዲ ዴንሳ ኤሲስ። ሄሳፊ ጉዩ፤ አማኔይሳታኔ አምዔታ ዩጊዲ፤ ዴንዲዳሮ ኤንታ ሲንሴ ሺሺስ።

⁴² ሃ አዳይ ዮጴ ካታማ ኡባ ጋኪስ። ዳሮ አሳይ ጎዳ አማኒዶሶና።⁴³ ጴጊሮሲ ዮጴን ሲሞና ጊያ ጋልባ ሃሼይሳ ሶን ዳሮ ጋላስ ጋምዲስ።

10

ጴጊሮሳኔ ቆርኔሊዮሳ

¹ ቂሳሪያን፤ «ፃሌ አላ አሳታ» ጌቴቲያ አላንቾታ ጊዶን ኢሲ ቆርኔሊዮሳ ጌቴቲያ ማቶ ሃላቃይ ዴዔስ።² ቆርኔሊዮሲ ባ ሶ አሳራ ያሳ ሚንሱ አማኒያ አሲኔ ያሳ ጎይኒያ አሲ። አይሁዴ ማንቆታካ ዳሮ ማዴስ፤ ቃሲ ያሳ ኡባ ዎዴ ዎሴስ።³ ኢሲ ጋላስ ኡዱፋን ሳቴ ሄራን ያሳ ኪታንቾይ ኢያኮ ዩዲ፤ «ቆርኔሊዮሳ» ጊዲ ዩጊሺን ኢ ቆንጩሳን ጌሺዲ ቤዒስ።

⁴ ቆርኔሊዮሲ ዳጋሚዲ ኪታንቾዋ ቲሺ አሳ ዩሊዲ፤ «ጎዳው፤ ኢ አይቤ?» ያጊስ።

ኪታንቾይ ዛሪዲ፤ «ኔ ዎሳይኔ ማንቆታ ኔ ማዴይሲ ያሳ ሲንሳን ሃሳዩቲስ።⁵ ሃዒ ዮጴ አሴ ኪታዳ፤ ጴጊሮሳ ጊያ ሲሞና ኤሂሳ።⁶ ጴጊሮሲ አባ ዶናን ጋልባ ሃሺያ ሲሞና ሶን ኢማላቴሳ ሲራቲስ» ያጊስ።

⁷ ቆርኔሊዮሲ ባው አዲዳ ኪታንቾይ ቢን፤ ባ አይሌታፔ ናምዓታኔ ያሳ ጎይኒያ ባ ማታ ዎታዳሬታፔ ኢሱዋ ዩጊዲ፤⁸ ኤንታው ኡባባ አዲዲ ዮጴ ኪቲስ።

⁹ ዎንቴሳ ጋላስ ኤንቲ ቢዲ፤ ዮጴ ካታማ ማቲሺን ኡሱፑን ሳቴ ሄራን ያሳ ዎሳናው ጴጊሮሲ ፖቁ ቦላ ኬይስ።¹⁰ ኢ ኮሻቲዲ ካሲ ማናው ኮዩስ፤ ሺን ካሲ ካዲሺን ኢ ቆንጩሳ ቤዒስ።¹¹ ሳሎይ ዶዩቲን፤ ጊታ አፊላ ዳኒያባይ አይዱ ባጋራ አይኬቲዲ ዎዲሺን ኢ ቤዒስ።¹² ኢያን አይዱ ቶሆራ ዴዲያ ሜሄቲ፤ ዎራ ዶዓቲ፤

ኡሎራ ጎሽቲያ ሜዴቴላቲኔ ሳሎ ካፎቲ ኡባይ ዴዔስ። 13 ሄ ዎዴ «ጴጊሮሳ፣ ዴንዳ ኤቃዳ ሹካዳ ማ» ጊያ ቃሊ ኢያኮ ዩስ።

14 ሺን ጴጊሮሳ፣ «ጎዳው፣ አካይ! ታ ቱናባ ኡባራካ ማ ኤሪኬ» ያጊስ።

15 ቃሊ፣ «ዖሳይ ጌሺዳይሳ ኔኔ ቱና ጎፓ» ጊያ ቃሊ ናምዓንዖ ኢያኮ ዩስ። 16 ሄሲካ፣ ሄሹ ቶሆ ሃኒዳፔ ጉዬ ሄ ጊታ አፊላ ዳኔይሲ ኤሌሲዲ ፑዴ ሳሎ ኤኬቲስ።

17 ጴጊሮሳ ባ ቤዒዳ ቆንጩሳ ቢርሼሳይ፣ «አይ ጊዳንዴሻ?» ጊዲ ባ ዎዛናን ቆፒሺን፣ ቆርኔሊዮሲ ኪቲዳ አሳቲ ሲሞና ሶ አይቺ ዴሚዲ ካሬን ኤቂዶሶና። 18 ባንታ ቃላ ጴቂ አሲዲ፣ «ጴጊሮሳ ጊያ ሲሞኒ ኢማላቴሳን ዴዔይ ሃይሳኔ?» ያጊዲ አይቺዶሶና።

19 ጴጊሮሳ ቆንጩሳን ቤዒዳባ ቆፋ ቦላ ዴዒሺን፣ ጌሻ አያኒ ኢያኮ፣ «ሄኮ፣ ሄሹ አሳቲ ኔና ኮዮሶና። 20 ዴንዳዳ ዎዳ፣ ታኒ ኤንታ ኪቲዳ ጊሾ ሲጴና ኤንታራ ባ» ያጊስ።

21 ጴጊሮሳ አሳታኮ ዎዲዲ፣ «ሂንቴ ኮዬይ ታና፣ አይስ ዩዴቲ?» ያጊስ።

22 ኤንቲ ዛሪዲ፣ «ኑና ማቶ ሃላቃይ ቆርኔሊዮሲ ኪቲስ። ኢ ጊሎ፣ ዖሳ ጎይኒያ አሲኔ አይሁዴ አሳ ኡባን ዳሮ ቦንቼቲዳ አሲ። ቆርኔሊዮሲ፣ ኔና ባ ሶ ኤሂሲዲ ቃላ ኔፔ ሲዓና ሜላ ጌሻ ኪታንቾይ ኢያው አዲስ» ያጊዶሶና። 23 ጴጊሮሳ አሳታ ሶ ጌልሲዲ ሞኪስ።

ዎንቴላ ጋላስ፣ ዴንዲዲ ኤንታራ ቢስ። ዮጴ ካታማን ዴዒያ አማኔይሳታፔ ኢሶቲ ኢሶቲ ኢያራ ኢሲፌ ቢዶሶና። 24 ዎንቴላ ጋላስ፣ ቂሳሪያ ጋኪዶሶና። ቆርኔሊዮሲ ባ ዳቦታኔ ባ ማታ ላጌታ ኢሲፌ ዩጊ ሺሺዲ፣ ጴጊሮሳ ናጌስ። 25 ጴጊሮሳ ሶ ጌላና ሃኒሺን፣ ቆርኔሊዮሲ ኢያራ ጋሄቲዲ ኢያ ሲንላን ኩንዲዲ ኢያው ጎይናናው ኮዬስ። 26 ሺን ጴጊሮሳ፣ «ዴንዳ፣ ታካ ታ ሁዔን ኔ ሜላ አሴ» ያጊዲ ኢያ ዴንሳስ።

27 ጴጊሮሳ ቆርኔሊዮሳራ አዴቲሼ ሶ ጌሊያ ዎዴ ዳሮ አሳይ ሺቂዳይሳ ዴሚስ። 28 ኢ አሳኮ፣ «አይሁዴ አሲ ሃራ ዴሬራ ኢሲፋናው ዎይኮ ጋሄታናው ዎጋ ጊዶናይሳ ሂንቴ ኤሬታ። ሺን ታኒ አናካ ቱና ዎይኮ ጌሺ ጊዴና ጎና ሜላ ዖሳይ ታና ቢሲስ። 29 ሄሳ ጊሾ፣ ሂንቴ ታኮ ኪቲን ኢያይ ባይና ያስ። ሃሂ ታና አይስ ዩጊሲዳኮ ታው አዲቴ» ያጊስ።

30 ቆርኔሊዮሲ፣ «ታኒ ሃቺ አይዱ ጋላላፔ ካሴ ሃኖዴ ኡዱፋን ሳቲ ዎሳ ዎሲሺን፣ ጳሊያ ማዖ ማዒዳ አሲ ታ ሲንላን ኤቂስ። 31 ኢ ታኮ፣ «ቆርኔሊዮሳ፣ ዖሳይ ኔ ዎሳ ሲዒስ፣ ኔኒ ማንቆታ ማዲዳይሳካ ሃሳይስ። 32 ሂዛ፣ አሴ ዮጴ ኪታዳ፣ ሲሞን ጴጊሮሳ ጌይሳ ዩጊሳ። ኢ፣ ሲሞና ጊያ ጋልባ ሃሺያ ኡራ ሶን አባ ዶናን

ሲራተስ) ያጊስ።³³ ሄሳ ጊሾ፥ ታኒ ኔኮ ኤሌሳዳ ኪታስ፤ ኔ ሎዎ ያዳሳ። ሂዛ፥ ያሳይ ኔና ኪቲዳባ ኡባ ሲጻናው ሃጺ ኑኒ ኡባይ ሃይሳን ጎዳ ሲንሳን ዴዎስ» ያጊስ።

ጴጊሮሳ ሃሳያ

³⁴ ካሊዲካ፥ ጴጊሮሲ፥ «ያሳይ አሳ ሶምዎ ቤጊዲ አሴ አሳፔ ሻኬና።³⁵ ሺን አሴ ኡባ እና ጊዲኮካ ባው ያዩይሳኔ ሂሎ አሶ አሴይሳን ያሳይ ኡፋይቲይሳ ታኒ ቱማ አኬካስ።³⁶ ያሳይ፥ ኡባ ጎዳ ጊዲዳ ዩሱስ ኪሪስቶሳ ባጋራ ሳሮቱሳ አዲሼ ሃ ዎንጊላ ኢስራዔሌ አሳስ ኪቲዳይሳ ሂንቱ ኤሬታ።³⁷ ዮሃንሲ ሂንታቱባ ጋሊላን ሳባኪዳ ዎዲያፔ ዶሚዲ ዩሁዳ ቢታ ኡባ ጋካናው ሃኒዳባ ሂንቱ ኤሬታ።³⁸ ያሳይ ናዚሬቲ ዩሱሳስ ጌሻ አያናኔ ዎልቃ ኢሚስ። ያሳይ ኢያራ ዴጊያ ጊሾ ሎዎባ ኢ አሲሼ 9ላሄ ኩሼን ሃሬቲዳ ኡባ ፓሲሼ ዩዩስ።

³⁹ «አይሁዴ ቢታኒኔ ዩሩሳላሜን ኢ አሲዳ ኡባባስ ኑኒ ማርካታ። ኤንቲ ማስቃሊያ ቦላ ካቂዲ ኢያ ዎዲዶሶና።⁴⁰ ሺን ያሳይ ሄኻንሶ ጋላሳን ሃይቆፔ ኢያ ዴንሲዲ አሳስ ቆንጫና ሜላ አሲስ።⁴¹ ሄ ቆንጩሳይ ያሳይ ኮይሮ ዶሪዳ ማርካታሳፌ አቲን አሳ ኡባስ ጊዴና። ኢ ሃይቆፔ ዴንዲዳፔ ጉዩ ኢያራ ሚዳኔ ኡዩዳ።⁴² ኑኒ ዎንጊላ አሳስ አዳና ሜላኔ ፓፃ ዴዔይሳታ ቦላኔ ሃይቂዳይሳታ ቦላ ፒርዳናው ያሳይ ሹሚዳይ ዩሱሳ ጊዴይሳ ማርካታና ሜላ ኑና ኪቲስ።⁴³ ያሳይ ኢያ አማኒያ ኡባ ናጋራይ፥ ኢያ ሱንሳን አቶ ጌቲቲይሳ ናቤቲ ማርካቶሶና» ያጊስ።

አይሁዴ ጊዶና አሳቲ አማኒዲ ጌሻ አያና ኤኪዶሶና

⁴⁴ ጴጊሮሲ ቡሮ ሄ አዳ አንጎናሺን ቃላ ሲጊያ ኡባ ቦላ ጌሻ አያኒ ዎዲስ።⁴⁵ ጴጊሮሳራ ዮዲፌ ዩዳ አማኒያ ቃፃሬቲዳ አይሁዴ ኡባይ፥ አይሁዴ ጊዶናይሳታ ቦላ ጌሻ አያኒ ጉኪዳ ጊሾ ማላሌቲዶሶና።⁴⁶ ጋሶይካ፥ ኤንቲ ዱማ ዱማ ዶናን ሃሳዩሺኒኔ ያሳ ጊታቱሳ ሳቢሺን ሲጊዶሶና።

ሄ ዎዴ ጴጊሮሲ ዛሬዲ፥⁴⁷ «ሃይሳቲ ቃሲ ኑ ሜላ ጌሻ አያና ኤኪዳይሳቲ ፃማቆቶና ሜላ ሃሴ ዲጋናይ አኔ?» ያጊስ።⁴⁸ ኤንቲ ዩሱስ ኪሪስቶሳ ሱንሳን ፃማቆታና ሜላ ኤንታ ኪቲስ። ሄሳፌ ጉዩ፥ ኤንቲ ባንታራ ጉሳ ጋላስ ኡታና ሜላ ጴጊሮሳ ዎሲዶሶና።

10:34 ዛሬ 10:17

1 ሃዋሬቲኔ ዩሁዳ ኡባን ዴቢያ አማኔይሳቲ፥ አይሁዴ ጊዶናይሳቲካ ያሳ ቃላ ኤኪዳይሳ ሲቢዶሶና። 2 ጴጊሮሲ ዩሩሳላሜ ቢዳ ዎዴ ቃፃሬቲዳ አማኔይሳቲ፥ 3 ኢያኮ፥ «ኔኔ ቃፃሬቲባናይሳታኮ ገላዳ ኤንታራ ካሲ አይስ ማዲ?» ያጊዶሶና።

4 ሺን ጴጊሮሲ ሃኒዳባ ኮይሮፕ ዶሚዲ ማራን ማራን አዲስ፡ 5 «ታኒ ዮጴ ካታማን ያሳ ዎሳሼ ቆንጩሲ ቤዓስ። ጊታ አፊላ ዳኒያባይ አይዱ ባጋራ አይኬቲዲ ሳሎፕ ዎጲሼ ታኮ ዩስ። 6 ታኒ ቲሺ አሳ ኢያ ጊዶ ዩሊያ ዎዴ አይዱ ቶሆራ ዴቢያ ሜሄታ፥ ዎራ ዶዓታ፥ ኡሎራ ጎሼቲያ ሜዴቴሳታኔ ሳሎ ካፍታ ቤዓስ። 7 ጴጊሮሳ፥ ዴንዳ፥ ሹካዳ ማ፡ጊያ ቃላ ሲዓስ።

8 «ሺን ታኒ፥ ጎዳው፥ አካይ፥ ቴናባይ ዎይኮ ጊዮናባይ ኡባካ ታ ዶናኮ ሸቂ ኤሬና» ያጋስ።

9 «ጠሳይ ገሺዳይሳ ኔኒ ቴና ጎፓ» ያጊያ ቃሊ ናምዓንሶ ሳሎፕ ዩስ።

10 «ሄሲ ሄሹ ቶሆ ሃኒን፥ ወርሴሳን ኡባባይ ሳሎ ፑዴ ኤኬቲስ። 11 ሄ ሳቴንካ ሄሹ አሳቲ ቂሳሪያፕ ታኮ ኪቴቲዲ ታኒ ዴቢያ ኬሳ ጋኪ አጊዶሶና። 12 ሲዶና ኤንታራ ባና ሚላ አያናኢ ታው አዲስ። ቃሲ ሃ ኡሱፑን ኢሻቲ ዮጴፊ ታራ ቂሳሪያ ቢዳይሳታራ ቆርኔሊዮሳ ሶ ገሊዳ። 13 ኪታንቾይ ኢያ ሶን ኤቂዲ፥ ጥጴ ኪታዳ ጴጊሮሳ ጌቴቲያ ሲሞና ዩጊሳ። 14 ኔና ኔ ሶ አሳ ኡባ አሺያ ቃላ ኢ ኔው አዳና፥ ጊዳይሳ ቆርኔሊዮስ ኑስ አዲስ።

15 «ታኒ ሃሳ ዶሚያ ዎዴ ገሻ አያናይ ኮይሮ ኑ ቦላ ዎጲዳይሳዳ ኤንታ ቦላካ ዎጲ አጊስ። 16 ሄ ዎዴ ጥሃኒሲ ሃሳን ፃማቂስ፥ ሺን ሃንቴ ገሻ አያናን ፃማቂታና» ያጊዳ ጎዳ ቃላይ ታው ቆፊቲስ።

17 ያሳይ ኑስ ጎዳ ዩሱስ ኪሪስቶሳ አማኒዳይሳታስ ኢሚዳ ኢሞታ አይሁዴ ጊዶናይሳታስካ ኢሚኮ፥ ያቲን ያሳ ዲጋናው ታኒ አኔ?» ያጊስ።

18 ኤንቲ ሄሳ ሲቢዳ ዎዴ ባንታ ፓላማ አጊዲ፥ «ሄሳ ጊዲኮ፥ ያሳይ አይሁዴ ጊዶናይሳቲካ ናጋራፕ ሲሚዲ ዴዎን ዳናዳ ቃዳ ኢሚስ» ያጊዲ ያሳ ጋላቲዶሶና።

አንጾኪያ ዎሳ ኬሳ

19 ኢስጊፋኖሴ ሃይቆስ ጋሲዳ ጎዳ ጋሶን ላሌቲዳ አማኔይሳቲ ቃላ አይሁዴታ ፃላላስ አዲሼ ሲሮፊንቄ፥ ቆጲሮሳኔ አንጾኪያ ጋካናው ዩዩዶሶና። 20 ሺን ቆጲሮሳፕኔ ቄሬናፕ ዩዳ ኢሲ ኢሲ አማኒያ አሳቲ አንጾኪያ ቢዲ፥ ጎዳ ዩሱሳ ዎንገላ ጊሪኬ አሳስካ አዲዶሶና። 21 ጎዳ ዎልቃይ ኤንታራ ዴዔስ፤ ቃሲ ዳሮ አሳይ አማኒዲ ጎዳኮ ሲሚዶሶና።

22 ሄ አዳ ዩሩሳላሜን ዴዲያ ምሳ ኬሳይ ሲዲዳ ጊሾ ባርናባሳ አንዎኪያ ኪቲስ። 23 ባርናባሲ አንዎኪያ ቢዳ ምዴ ምሳ አጾ ኬሃቴሳ አሱዋ ቤዲዲ ኡፋይቲስ። ኤንቲ ኡባይ ባንታ ኩሜሳ ምዛናን ጎዳን ሚኒዲ ዳና ሜላ ኤንታ ዘሪስ። 24 ባርናባሲ ጌሻ አያናይኔ አማኖይ ኩሚዳ ሎዎ አሲ ጊዲያ ጊሾ ዳሮ አሳይ ጎዳ አማኒዶሶና።

25 ሄሳፌ ጉዩ፥ ባርናባሲ ሳዎላ ኮያናው ቴርሴሴ ቢስ። 26 ያን ሳዎላ ዴሚዳ ምዴ አንዎኪያ ኤኪዲ ዩስ። ባርናባሲኔ ሳዎሊ ምሳ ኬሳ አሳራ ላይሳ ኩሜሳ ኡቲዲ ዳሮ አሳ ታማርሲዶሶና። አማኒይሳቲ አንዎኪያን «ኪሪስታኔ» ጌቲዲ ኮይሮ ዩጌቲዶሶና።

27 ሄ ምዴ ኢሲ ኢሲ ናቤቲ ዩሩሳላሜፕ አንዎኪያ ምዲዶሶና። 28 ኤንታ ጊዶፌ አጋቦሳ ጌይሲ ዴንዲዲ ቢታ ኡባን ጊታ ኮሺ ኬያናይሳ አያና ምልቃን ቲንቢቲ ኦዲስ። ሄሲ ሃኒዳይ ሮሜ ካወዋ ቃላወዲዮሳ ምዴና። 29 አማኒይሳቲ ሁዔን ሁዔን ባንታ ምልቃ ሜላ ሚሼ ኬሲዲ ዩሁዳን ዴዲያ አማኒይሳታስ ማዴ ዩዳናው ቆፋ ቃቻዶሶና። 30 ኤንቲ ሄሳዳ አሲዲ፥ ሚሺያ ባርናባሳ ቦላኔ ሳዎላ ቦላ ምሳ ኬሳ ጪማታስ ዩዲዶሶና።

12

ምሳ ኬሳ ቦላ ምልቃማ ጎዲ ጋኪስ

1 ሄ ምዴ ካምይ ሄሮዲሲ * ምሳ ኬሳ አሳፕ ባጋ ጎዳ ዶሚስ። 2 ዮሃኒሳ ኢሻ ያይቆባ ማሻን ምዲሲስ። 3 ሄሲ አይሁዴታ ኡፋይሲዳይሳ ቤዲዲ፥ ጉጂዲ ጴጊሮሳካ አይሲስ። ሄሲ ሃኒዳይ ፓሲካ ባሌ ቦንቺያ ጋላሳታና። 4 ጴጊሮሳ አይኪዲ ቃቻስ። ፓሲካ ቦንቺያ ጋላሳታፕ ጉዩ ዴሪያ ሲንሴ አሳናው ቆፕዲ፥ አይዱ አይዱ ምታዳሬቲ ኢያ ናጋና ሜላ ታማኔ ኡሱፑን ምታዳሬታስ አሲ ኢሚስ። 5 ሄሳ ጊሾ፥ ጴጊሮሲ ቃሾ ኬሳን ናጌቴስ። ሺን ምሳ ኬሳ አሳይ ኢያው ሚንሴዲ ምሳ ምሶሶና።

ኪታንቾይ ጴጊሮሳ ቃሾ ኬሳፌ ኪሲስ

6 ሄሮዲሲ ጴጊሮሳ አሳ ሲንሴ ሺሻናፕ ካሴ ቃማ ጴጊሮሲ ናምዑ ባጋራ ናምዑ ምታዳሬታራ ሳንሳላታን ቃሹቲዲ ኤንታ ጊዶን ጴስኪስ። ናጌይሳቲ ቃሾ ኬሳ ፔንጌታን ኤቂዲ ናንሶና። 7 አኪኮና ዴዲሺን ጎዳ ኪታንቾይ ቆንጪስ። ቃሾ ኬሳን ፖዶይ ፖዲስ። ኪታንቾይ ጴጊሮሳ ሚያ ቦቺ ባርኪሲዲ፥ «ኤሌ ዴንዳ»

11:28 ሃ.አ 21:10 * 12:1 ካምይ ሄሮዲሲ፡ ሃይሲ ካምይ ሄሮዲሲ፡ ሄሮዲሳ አጊርጳ ጊያ ኮይሩዋ። ኢ፥ 37-44 ማሮቴሳ ላይሳ ጋካናው ሃሪስ። ኢ ካወዋ ሄሮዲሳስ ናዓ ናዓ 12:4 ኬሳ 12:1-27

ሃዋሬታ ኦሱዋ 12:827ሃዋሬታ ኦሱዋ 12:24

ያገሰ። ኢራካ ሳንሳላታይ ኢያ ኩሺያፕ ዎዲ አገሰ። ⁸ ኪታንቾይ ኢያኮ፣ «ኔ ማዑዋ ማዓ፣ ኔ ጫማካ አላ» ያገሰ። ጳጊሮሲ ሄሳዳ አሲስ፤ ኪታንቾይ፣ «ኔ ላፃና ማዓዳ ታና ካላ» ያገሰ።

⁹ ጳጊሮሲ ቃሾ ኬሳፌ ኬዩዲ ኪታንቾዋ ካሊስ። ኢያው ቆንጩሳ ቤዒያባ ዳኒሲፕ አቲን ኪታንቾይ አሲያባይ ቱማ ዳኒቤና። ¹⁰ ኪታንቾይኔ ጳጊሮሲ ኮይሩዋኔ ናምፃንሶ ዎታዳሪያ አዲዲ ካታማ ኤፊያ ቢራታ ፔንጊያኮ ጋኪዶሶና። ፔንጊይ ኤንታው ባርካ ዶዩቲ አገሰ። ኤንቲ ኬዩዲ ኢሲ አጊያራ ቢሺን ኪታንቾይ አክኮና ጳጊሮሳፕ ሻኬቲ አገሰ።

¹¹ ጳጊሮሳስ ዎዛኒ ሲጣን፣ «ታና ጎዳይ ባ ኪታንቾዋ ኪቲዲ፣ ሄሮዲሳ ኩሼፔኔ ናጊዲ ኡቲዳ አይሁዴ አሳ ኡባፌ አሺዳይሳ ሃዒ ቱማ ኤራስ» ያገሰ።

¹² ኢ ሄሳ አኬኪዳ ዎዴ ዳሮ አሳይ ኢሲፌ ሽቂዲ ዎሳ ዎሲያ ቤሳ፣ ማርቆሳ ጊያ ዮሃኒሳ አዬ ማይራሚ ሶ ቤስ። ¹³ ያን ካሬን ኤቂዲ ዌገስ። ኢሲ ሮዳ ጊያ አሳንቺያ ፔንጊያ ዶያናው ያሱ። ¹⁴ ሮዳ ጳጊሮሳ ቃላ ጊዲዳይሳ ኤሪዳ ዎዴ ኡፋይሳን ኩማዳ ካሪያ ዶዩና ጉዬ ዎፃ ባዳ፣ «ጳጊሮሲ ካሬን ኤቂስ» ያጋዳ አሳስ አዳሱ።

¹⁵ አሳይ ኢኮ፣ «ኔኒ ጎያይ!» ያገደሶና። ሮዳ ጳጊሮሳ ጊዲዳይሳ ጌሻዳ አዳሱ። ኤንቲ፣ «ሄሲ ኢያ ናጊያ ኪታንቾዋ» ያገደሶና።

¹⁶ ሺን ጳጊሮሲ ካሬን ኤቂዲ ዌጊዲ አጎና ኢዊን አሳይ ካሪያ ዶዩዲ ኢያ ቤዒዲ ማላሌቲዶሶና። ¹⁷ ሺን ኤንቲ ሲዒ ጋና ሜላ ጳጊሮሲ ባ ኩሺያን ማሊዲ ጎዳይ ቃሾ ኬሳፌ ኢያ ዋቲ ኬሲዳኮ ኤንታው ቆንጩሲ አዲዲ፣ «ሃይሳ ያይቆባሲኔ አማኒያ አሳታስ አዲቴ» ጊዲ ያፔ ኬዩዲ ሃራሶ ቤስ።

¹⁸ ሳዒ ዎንቲያ ዎዴ «ጳጊሮሲ አው ቤዴ» ጊዲ ዎታዳሬቲ ዎሊ ጊዶን ዳሮ ካጪዶሶና። ¹⁹ ሄሮዲሲ ጳጊሮሳ ኮዩሲን፣ ኢ ዳዩዳ ዎዴ ናጊይሳታ ቆሪዲ፣ ኤንታ ዎዳና ሜላ ኪቲስ። ሄሳፌ ጉዬ፣ ሄሮዲሲ ዩሁዳፕ ቂሳሪያ ዎዲዲ ያን ጉሳ ዎዴ ኡቲስ።

ሄሮዲሳ ሃይቁዋ

²⁰ ሄሮዲሲ ጊሮሳ አሳ ቦላኔ ሲዶና አሳ ቦላ ዳሮ ሃንቁቲስ። ኤንታ ቢታይ ካሲ ሄሮዲሳ ቢታፌ ዴሚያ ጊሾ ኤንቲ ኢሲፌ ጊዲዲ ኢያ ዋሪና ቢላስዎሳ ባንታው ጩማ አሲዲ ጊጋናው ሄሮዲሳኮ ቢዶሶና።

²¹ ሄሮዲሲ ሱንሲዳ ጋላሳን ባ ካዎቴሳ አፊላ ማዒዲ፣ አራታ ቦላ ኡቲዲ አሳስ አዲስ። ²² አሳይ፣ «ሄሲ ዎሳ ቃላ፣ አሳ ቃላ ጊዴና» ያገደዲ ዋሲዶሶና። ²³ ሄሮዲሲ ዎሳ ቦንቺቦና ጊሾ ኢራካ ጎዳ ኪታንቾይ ኢያ ዴቺን ጉፁኔን ሜቴቲዲ ሃይቁስ።

²⁴ ሺን ዎሳ ቃላይ ዲጩሼኔ ዳልጊሼ ቤስ።

25 ባርናባሲኔ ሳዖሊ ባንታ አሱዋ ፖሊዲ ማርቆሳ ጊያ ዮሃንሳ ሳንታራ ኤኪዲ ዩሩሳላሜፔ ሲሚዶሶና።

13

ባርናባሲኔ ሳዖሊ ኪቴቲዶሶና

1 አንዮኪያን ዴዲያ ዎሳ ኬሳን ናቤቲኔ አስታማሬቲ ዴዶሶና። ኤንቲ ባርናባሳ፣ ካሬሲ ጌቴቲያ ሲሞና፣ ቁሬናፔ ዩዳ ሉኪዮሳ፣ ካወዋ ሄሮዲሳራ ዲጪዳ ሚናሄኔ ሳዖላ። 2 ኤንቲ ጎዳ ጎይኒሺኒኔ ያሚሺን ጌሻ አያናይ። «ታኒ ዌጊዳ አሱዋስ ባርናባሳኔ ሳዖላ ታውዱማዬቴ» ያጊስ።

3 ሄሳ ጊሾ፣ ኤንቲ ያሚዳቴኔ ዎሲዳፔ ጉዬ ባንታ ኩሺያ ኤንታ ቦላ ዎሲዲ ዩዲዶሶና።

ባርናባሲኔ ሳዖሊ ቆጲሮሳ ቢዶሶና

4 ሄሳ ጊሾ፣ ጌሻ አያኒ ኤንታ ኪቲስ። ሴሌወቄ ቢዶሶና፤ ያፔ ማርካቤን ገሊዲ ቆጲሮሳ ሃሳን ቴቄቲዳ ቢታ ቢዶሶና። 5 ኤንቲ ሲልማና ጋኪዲ አይሁዴ ዎሳ ኬሳታን ያሳ ቃላ አዲዶሶና። ዮሃንሲ

* ማዲሼ ኤንታራ ዴዴስ።

6 ኤንቲ ቆጲሮሳ ሃሳን ቴቄቲዳ ቢታ ካንሲዲ ጳፉ ጋኪያ ዎዴ ኢሲ ዎርዳንቾ ናቢያ ባር-ዮሱሳ ጊያ አይሁዴ ማሩዎ ዴሚዶሶና።

7 ሄ ማሮይ ዴሪያ አይሲያ ሳርጊዮስ ጳዉሎሳ ጊያ አኬካንቾ አዲያራ ዴዴስ። ሳርጊዮስ ጳዉሎሲ ባርናባሳኔ ሳዖላ ባኮ ዌጊዲ ያሳ ቃላ ሲዓናው ኮዩስ። 8 ሺን ጊሪኬ ዶናን ማሩዋ ሱንሳይ «ኤልማሳ» ጌቴቲስ። ኢ ዴሪያ ሃሬይሲ አማኖና ሜላ ዲጋናው ኮዩዲ ባርናባሳራኔ ጳዉሎሳራ ኤቄቲስ።

9 ሺን ጳዉሎሳ ጊያ ሳዖሊ ጌሻ አያናን ኩሚዲ ማሩዋ ጫዲ ዌሊዲ፣ 10 «ላ፣ ዓላሄ ናዓው፣ ኢታቴሲ ኡባይ ኩሚዳይሶ፣ ዌሎቴሳ ኡባስ ሞርኪያው፣ ሱሬ ጎዳ አጊያ ሚርቄይሳ አጊኪ? 11 ሄኮ፣ ሃዲ ጎዳ ኩሼይ ኔ ቦላ ዴዴስ። ኔኒ ቆቄ ጊዳና፣ ጉላ ዎዴስ አዋ ፖዖ ቤዓካ» ያጊስ።

ኢራ ጫጋናይኔ ጳማይ ኢያ አይፊያ ጎዜን፣ ባ ኩሺያ አይኪዲ ካሌሲያ አሲ ኮዩሼ ዩዩስ። 12 ዴሪያ ሃሬይሲ ሄሳ ቤዲዳ ዎዴ ጎዳባ ታማርሴይሳን ማላሌቲዲ አማኒስ።

ባርናባሲኔ ጳዉሎሲ ጲሲዲያ አንዮኪያ ቢዶሶና

13 ጳዉሎሲኔ ኢያራ ዴዴይሳቲ ጳፉፔ ዴንዲዲ፣ ጲንፊሊያን ዴዲያ ጴርጌ ማርካቤራ ቢዶሶና። ዮሃንሲ ኤንታሬ ቫኬቲዲ

* 13:5 ዮሃንሲ፡ ሃ ቤሳን ዓፌቲዳ ዮሃንሲ፣ ሃዋሪያ ዮሃንሳ ጊዶናሺን ዮሃንስ ማርቆሳ ጌቴቲያ ማርቆሳ ዎንጌላ ዓፌዳይሳ።

ዩሩሳሌም ሲሚስ። 14 ሺን ኤንቲ ጳርጌሬ አዲዲ ጳሊሲያን ዴሲያ አንዎኪያ ጋኪዶሶና። ሳምባታ ጋሳስ አይሁዴ ዎሳ ኬሲ ጌሊዲ ኡቲዶሶና። 15 ሙሴ ሂጌይኔ ናቤታ ማፃፋይ ናባቤቲዳፕ ጉዩ አይሁዴ ዎሳ ኬሳ ሃላቃቲ። «ኑ ኢሻቶ፣ አሳ ሚንጮሲያ ቃሊ ሂንቴው ዴሲያኮ አሳስ አዴርኬቲ» ያጊዲ ኤንታኮ ኪቲዶሶና።

16 ጳውሎስ ዴንዲ ኤቂዲ ባ ኩሼ ማሊዲ፣ «ኢስራዴሌ አሳታው፣ ቃሲ ዎሳ ጎይኒያ አይሁዴ ጊዶና አሳው፣ ሲዲቴ። 17 ሃ ኢስራዴሌ አሳ ዎሳይ፣ ኑ ማይዛታ ዶሪስ። ጊብዜ ቢታን ኢማላቴሳን ኤንቲ ዴሲሺን፣ ኤንታ ዳርሲዲ ባ ጊታ ዎልቃን ጊብዜ ቢታፊ ኤንታ ኬሲስ። 18 ባዞ ቢታን አይታሙ ላይሳ ሜላ ኤንታ ዳንዳሲስ። 19 ካናኔ ቢታን አይሁዴ ጊዶና ላፑን ካዎቴሳታ ዲጊዲ ኤንታ ቢታ ባ አሳ ላቲሲስ። 20 ሄሳፌ ጉዩ፣ ናቢያ ሳሙዴላ ዎዴ ጋካናው አይዱ ዪታኔ ኢሻታሙ ላይሳ ሜላ አይሲያ ዳይናታ ኤንታው ኢሚስ። 21 ሄሳፌ ጉዩ፣ ኤንቲ ባንታው ካዎ ኢማና ሜላ ዎሲን፣ ዎሳይ ቢኒያሜ ሸሻፕ ቴሴ ናዓ፣ ሳዎላ አይታሙ ላይሲ ካዎታና ሜላ ኤንታው ኢሚስ። 22 ዎሳይ ሳዎላ ሻሪዳፕ ጉዩ ኤንታ ቦላ ዳዊቴ ካዎሲስ። ዎሳይ ዳዊቴባ ማርካቲሼ፣ <ታኒ ኮያ ኡባ ታ ዎዛና ሜላ አሲያ ኢሴዩ ናዓ ዳዊቴ ዴማስ> ያጊስ።

23 «ዎሳይ፣ <ታኒ ዳዊቴ ሸሻፕ ኢስራዴሌ ዴሪያ አሼይሳ ኤሃና> ጊዳይሳ ሜላ ዩሱሳ ኤሂስ። 24 ዩሱሲ ያናፕ ሲንጮ ኢስራዴሌ አሳ ኡባይ ባንታ ናጋራፕ ሲሚዲ ፃማቁታና ሜላ ዮሃኒሲ ቃላ አዲስ። 25 ቃሲ ዮሃኒሲ ባ አሱዋ ዉርሳና ሃኒሼ አሳኮ፣ <ታና አና ጊዲ ቆፕቲ? ታኒ ሂንቴ ናጊያ ኪሪስቶሳ ጊዲኬ፣ ሺን ታኒ ኢያ ጫማ ቢርሻናው ታው ቤሶናይሲ ታፕ ጉዩራ ዩስ> ያጊስ።

26 «ኢሻቶ፣ አብራሃሜ ሸሻቶ፣ ቃሲ ሃይሳን አይሁዴ ጊዶናሺን ዎሳስ ያዩይሳቶ፣ ሃ አቶቴሳ ቃላይ ኑስ ኪቴቲስ። 27 አይስ ጊኮ፣ ዩሩሳሌምን ዴሲያ አሳይኔ ኤንታ ሃላቃቲ ዩሱሳ ኤሪቦኮና። ሳምባታ ኡባን ናባቤቲያ ናቤታ ቃላ አኬኪቦና ጊሾ ኢያ ቦላ ፐርዲዲ ናቤቲ አዲዳ ቃላ ፖሊዶሶና። 28 ዩሱሳ ዎዲሳናው ኢሲ ጋሶይካ ዳይን ጳሊዎሲ ኢያ ዎዳና ሜላ ዎሲዶሶና። 29 ኤንቲ ዩሱሳባይ ጌሻ ማፃፋን ፃፌቲዳባ ኡባ

13:17 ኬሳ 1:7፤ ኬሳ 12:51 13:18 ታይ 14:34፤ ዛሬ 1:31 13:19 ዛሬ 7:1፤ ኢያ 14:1 13:20 ዛሬ 2:16፤ 1ሳሙ 3:20 13:21 1ሳሙ 8:5፤ 10:21 13:22 1ሳሙ 13:14፤ 16:12፤ ማዝ 89:20 13:24 ማር 1:4፤ ሉቃ 3:3 13:25 ማቶ 3:11፤ ማር 1:7፤ ሉቃ 3:16፤ ዮሃ 1:20፤ 27 13:28 ማቶ 27:22-23፤ ማር 15:13-14፤ ሉቃ 23:21-23፤ ዮሃ 19:15

ፖሊዳ ዎዴ ማስቃሊያ፤ ኢያ ዎዲሲዲ ሞጊዶሶና። 30 ሺን ሦሳይ ሃይቆፔ ዩሱሳ ዴንሲስ። 31 ሄሳፌ ጉዩ፤ ኢ ባራ ጋሊላፔ ዩሩሳላሜ ዩዳይሳታስ ዳሮ ቶሆ ቤንቲስ። ኤንቲ ሃዲ ኢያባ አሳስ ማርካቶሶና።

32 «ሦሳይ ኑ አዋታስ ኢማና ጊዳ ዎንጌላ ኑኒ ሂንቴው አዶስ።

33 ዳዊቱይ ባ ማዘሙሬ ማፃፋን ናምዓንሶ ሼምፑዋን፤

«ኔኒ፤ ታ ናዓ፤

ታኒ ሃቺ ኔና ዩላስ»

ጌቲቲዲ ገፌቲዳ ዩሱሳ፤ ሦሳይ ሃይቆፔ ዴንሲዲ ኑ ማይዛታስ ኢማና ጊዳይሳ ኑስ ኤንታ ናይታስ ፖሊስ። 34 ኢ ዎቆና ሜላ ሦሳይ ሃይቆፔ ኢያ ዴንሶን ኤሪሳናው፤

«ታኒ ዳዊቱስ ኢማና ጊዳ

አማኔቲዳ ጌሻ አንጁዋ ሂንቴው ኢማና» ያጊዲ አዲስ።

35 ሄሳ ጊሾ፤ ማዘሙሬ ማፃፋን ሃራሶን ቃሲ፤

«ኔ ጌሻ ናዓ አሃ ዎቂሳካ» ያጌስ።

36 «ዳዊቱይ ባ ዎዴ ሦሳ ቆፋ ፖሊዳፔ ጉዩ ሃይቂዲ ባ አዋታራ ሞጌቲዲ ዎቂስ። 37 ሺን ሦሳይ ሃይቆፔ ዴንሲዳይሲ ዎቂቤና።

38 «ሄሳ ጊሾ፤ ታ ኢሻቶ፤ ናጋራ አቶቴሳይ ዩሱሳ ባጋራ ካሲቲዲ ሂንቴው አዴቲዳይሳ ኤሪቲ። ሙሴ ሂጌይ ናጋራፔ ሂሊሳናው ዳንዳዔና። 39 ሺን ዩሱሳ አማኒያ ኡባይ ናጋራፔ ሂሌስ። 40 ሄሳ ጊሾ፤ ናቤቲ ጊዳይሲ ሂንቴ ቦላ ጋኮና ሜላ ናጌቲቲ።

41 «ሦሳይ ጊዳባ ሌቂሴይሳቶ! ቤዲቲ! ማላሌቲቲ! ዳዩቲ!

አኒካ አዲን፤ ሂንቴ አማኖና አሱዋ

ታኒ ሂንቴ ዎዲያን አሳና» ያጊስ።

42 ጳውሎሲኔ ባርናባሲ አይሁዴ ዎሳ ኬሳፌ ኬዩሺን፤ ካሊያ ሳምባታን ሄሳ ጉጂዲ አዳና ሜላ አሳይ ኤንታና ዎሲዶሶና።

43 ሺቆይ ላሌቲዳፔ ጉዩ ዳሮ አይሁዴቲኔ አይሁዴታ አማኑዋን ጌሊዲ ሦሳ ጎይኒያ ዳሮቲ ጳውሎሳኔ ባርናባሳ ካሊዶሶና። አማኒዳይሳቲ ሦሳ አጶ ኬሃቴሳን ሚኒዲ ዳና ሜላ ኤንታ ዘሪዶሶና።

44 ካሊያ ሳምባታን ካታማን ዴዲያ አሳፔ ዳሮቲ ሦሳ ቃላ ሲዓናው ሺቂዶሶና። 45 ሺን አይሁዴቲ ዳሮ አሳ ቤዲዳ ዎዴ ጳውሎሳ ቃናቲዲ ኢያ ሃሳያ ኢዲዲ ኢያ ጫዩዶሶና።

46 ጳውሎሲኔ ባርናባሲ ያዮና፤ «ሦሳ ቃላይ ኮይሮቲዲ ሂንቴው አዴታናው ኮሼስ። ሺን ሂንቴ ቃላ ኢዲዲ ሜሪና ዴዑዋ ኤካናው

13:29 ማቶ 27:57-61፤ ማር 15:42-47፤ ሉቃ 23:50-56፤ ዮሃ 19:38-42
13:31 ሃ.አ 1:3 13:33 ማዘ 2:7 13:34 ኢ.ሳ 55:3 13:35 ማዘ
16:10 13:41 ኢ.ብ 1:5

ኮስ ቤሴና ጊዲ ሂንቴ፥ ሂንቴ ሁዔን ፐርዲዳ ጊሾ ሂዛ ኮኒ አይሁዴ ጊዶናይሳታኮ ሲሞስ።⁴⁷ ጋሶይካ ጎዳይ፥

«አላሜ ኩሜሳይ ኔ ባጋራ አታና ሜላ፥ ታኒ ኔና አይሁዴ ጊዶና ዴሪያስ ፖፖ አሳስ» ያጊዲ ኑና ኪቲስ» ያጊዶሶና።

⁴⁸ አይሁዴ ጊዶናይሳቲ ሄሳ ሲዒዳ ዎዴ ኡፋይቲዲ ያሳ ቃላ ቦንቺዶሶና። ቃሲ ሜሪና ዴዑዋስ ዶሬቲዳ ኡባይ አማኒዶሶና።

⁴⁹ ጎዳ ቃላይ ሄ ቢታ ኡባ ጋኪስ።⁵⁰ ሺን አይሁዴቲ፥ አይሁዴ ጊዶና ያሴ ጎይኒያ ዱሬ ማጫሳታኔ ካታማን ዴዒያ ጊታ አሳታ ጳውሎሳ ቦላኔ ባርናባሳ ቦላ ዴንጴሲዶሶና። ሄ አሳቲ ኤንታ ጎዳ ዶሚዲ ባንታ ቢታሬ ኬሲዶሶና።⁵¹ ሺን ጳውሎሳቲ ለርናባሳ ሊዲይሳታስ ማላ ጊዳና ሜላ ባንታ ቶሁዋፔ ባና ፐቲዲ ኢቆኒዮኔ ካታማ ቢዶሶና።⁵² ቃሲ አንዎኪያን ዴዒያ አማኔይሳቲ ጌሻ አያናኒኔ ኡፋይሳን ኩሚዶሶና።

14

ጳውሎሲኔ ባርናባሲ ኢቆኒዮኔ ቢዶሶና

¹ ከሴይሳዳካ፥ ጳውሎሲኔ ባርናባሲ ኢቆኒዮኔን አይሁዴታ ዎሳ ኬሲ ጌሲዲ ዳሮ አይሁዴቲኔ አይሁዴ ጊዶናይሳቲ አማናና ጋካናው ቃላ አዲዶሶና።² ሺን አማኒቦና አይሁዴቲ፥ አይሁዴ ጊዶናይሳታ ዎዳና ላሚዲ ኢሻታ ቦላ ዴንጴሲዶሶና።³ ሃዋሬቲ ያን ዳሮ ዎዴ ጋምዒዶሶና። ኤንቲ ያዮና ጎዳባ አዲዶሶና። ጎዳይ ማላታታኔ አራሳባ ኤንቲ አሳና ሜላ ኤንታው ማታ ኢሚዲ ባ አጾ ኬሃቴላ ቃላይ ቱማ ጊዴይሳ ቆንጨሲስ።⁴ ሺን ሄ ካታማ አሳይ ሻኬቲዲ፥ ባጋይ አይሁዴታራ ባጋይ ቃሲ ሃዋሬታራ ጊዲስ።

⁵ አይሁዴ ጊዶናይሳቲኔ አይሁዴቲ ባንታ ሃላቃታራ ኢሲሬ ጊዲዲ ሃዋሬታ ቆሃናውኔ ሹቻን ጫዳናው ኮዩዶሶና።⁶ ሃዋሬቲ ሄሳ ኤሪዲ፥ ሊስዲሬኔ ዳርቤ ጊያ ሊቃዮኒያ ካታማታኔ ኤንታ ሄራን ዴዒያ ቢታ ባቃቲዶሶና።⁷ ያን ዎንጌላ አዲዶሶና።

ጳውሎሲኔ ባርናባሲ ሊስዲሬኔ ዳርቤን

⁸ ዩሌቶሳፔ ዶሚዲ ናምዑ ቶሆይ ዎቢን ሃሙቲ ኤሮና ኢሲ አዴይ ሊስዲሬን ዴዔስ።⁹ ሄ አዴይ ጳውሎሲ አዲሺን ኡቲዲ ሲዔስ። ጳውሎሲ ኢያ ጫዲዲ ዪሊያ ዎዴ ፓዓናው ኢያው አማኖይ ዴዔይሳ ቤዒዲ፥¹⁰ ባ ቃላ ጵቁ አሲዲ፥ «ሲቲ ጋዳ ኔ ቶሁዋን ኤቃ» ያጊስ። ያቲን፥ ጉፐ ዴንዲ ኤቁዲ ሃሙላ ዶሚስ።

13:47 ኢሳ 42:6፤ 49:6 13:51 ማቶ 10:14፤ ማር 6:11፤ ሉቃ 9:5፤ 10:11

11 ጳውሎስ አሲዳይሳ አሳይ ቤሂዲ ባንታ ቃላ ጵቁ አሲዲ ሊቃዎንያ ድናን፣ «ዎሳቲ አሴ ዳኒዲ ኑኮ ዎዲዶሶና» ያጊዶሶና።
 12 ባርናባሳ፣ «ዲያ» ጊዲ፣ ጳውሎስ ሃሳያን ዋናቲያ ጊሾ ኢያ፣ «ሄርሜሳ» ጊዲ ሱንሲዶሶና። 13 ካታማፔ ጋዋን ዴሂያ ኤቃ ዲያ ኬሳ ካሂኔይኔ አሳይ ኮርማታኔ አሌቆ ጨሻታ ሃዋሬታስ ያርሻናው ኮዬዲ ካታማ ፔንጌ ኤሂዶሶና።

14 ሺን ባርናባሲኔ ጳውሎስ ሄሳ ሲሂዳ ዎዴ ኤንቲ አሳናው ቆፒዳይሳ ኢሂዲ ባንታ ማዑዋ ፔዲዶሶና። አሳ ጊዶ ዎሂ ጌሊዲ፣ 15 ባንታ ቃላ ጵቁ አሲዲ፣ «አሳው፣ ሃይሳ አይስ አሌቲ? ኑካ ሂንቴ ሜላ አሴ። ሃ ፓሶናባፔ ሳሉዋኔ ሳዓ፣ አባኔ ኤንታ ጊዶን ዴሂያ ኡባባ ሜዲዳ ዴዎ ዎሳኮ ሂንቴ ሲማና ሜላ ሂንቴው ኑኔ ዎንጌላ አዶስ። 16 ኢ ቤኒ አሳ ባንታ አጊያ ባና ሜላ ዩዲ አጊስ። 17 ሺን ኢራ ሳሉዋፔ ቡኪሲስ፣ ካሳካ ዎዴን ዎዴን ኢሚስ፣ ካሲ ኢሚዲ ሂንቴና ዳሮ ኡፋይሲስ፣ ያቲዲ ሂንቴው ሎዎባ አሲዲ ባው ማርካ ዳይሲቤና» ያጊዶሶና። 18 ሃዋሬቲ ሄሳ ጊዲ ባንታው አሳይ ያርሾና ሜላ ዋዬዲ ዲጊዶሶና።

19 አንዎኪያፔኔ ኢቆኒዮኔፔ ዩዳ አይሁዴቲ፣ አሳ ባንታ ባጋ ዛሪዲ ሹቻን ጳውሎሳ ጫዲዶሶና። ኤንታው ኢ ሃይቂዳባ ዳኒን ካታማፔ ጋዋ ጎቺ ኤፊዲ ዩጊዶሶና። 20 ሺን አማኔይሳቲ ዩዲ፣ ኢያ ዩሹዋን ኤቂዳሺን ኢ ዴንዲዲ ካታማ ጌሊስ። ዎንቴላ ጋላስ ባርናባሳራ ኢሲፌ ዳርቤ ቤስ።

ጳውሎሲኔ ባርናባሲ ሶሪያ አንዎኪያ ሲሚዶሶና

21 ኤንቲ ዳርቤ ካታማን ዎንጌላ አዲዲ ዳሮታ አማንሲዳፔ ጉዩ ሊስዒራ፣ ኢቆኒዮኔኔ ጳሲዲያ አንዎኪያ ሲሚዶሶና። 22 ያን አማኔይሳታ ሚንፊሲሽኔ ኤንቲ አማኖን ሚኒዲ ዴዓና ሜላ ዞሪሽ፣ «ዎሳ ካዎቴላ ጌላናው ኑኔ ዳሮ ዋዬ ኤካናው ቤሴስ» ያጊዲ ታማርሲዶሶና። 23 ቃሲ ዎሳ ኬሳታስ ሁዔን ሁዔን ጨማታ ዶሪዶሶና። ዎሚዳፔፔ ዎሲዳፔ ጉዩ ኤንቲ አማኒዳ ጎዳስ ኤንታ ሃዳራ ኢሚዶሶና።

24 ጳሲዲያ ቤታ ካንሲዲ አዲዲ ጳንፊሊያ ቤዶሶና። 25 ጴርጌን ቃላ አዲዳፔ ጉዩ አፃሊያ ቤዶሶና። 26 ያፔ ኤንቲ ባንታ ፖሊዳ አሱዋስ ዎሳ አዶ ኬሃቴሳስ ኤንታ ሃዳራ ኢሚዳ አንዎኪያ ማርካቤራ ሲሚዶሶና።

27 አንዎኪያ ጋኪዳ ዎዴ ዎሳ ኬሳ አሳ ሺሺዲ ዎሳይ ኤንታራ አሲዳ አሱዋ ኡባኔ አይሁዴ ጊዶና አሳይ አማናና ሜላ ኤንታው ዋቲ ፔንጌ ዶዩዳኮ አዲዶሶና። 28 ሄሳን አማኔይሳታራ ዳሮ ዎዴ ጋምዒዶሶና።

15

ዮሩሳሌም ሺቁዋ

¹ ኢሲ ኢሲ አሳቲ ዩሁዳፔ አንጾኪያ ቢዲ፥ «ሙሴ ዎጋሶ ሂንቴ ቃግሬቶና ኢዲኮ አታናው ዳንዳዔኬታ» ጊዲ አማኔይሳታ ታማርሶ ዶሚዶሶና። ² ሄሲ ጳውሎሳኔ ባርናባሳ ኤንታራ ዳሮ ፓላማናዳኔ ካጫናዳ አሲስ። ሄሳ ጊሾ፥ አንጾኪያን ዴዒያ ኢሲ ኢሲ አሳቲ ጳውሎሳኔ ባርናባሳራ ዮሩሳሌም ቢዲ ሃዋሬታራኔ ጨማታራ ጋሄቲዲ ሄ አዳ ቢላና ሜላ ቆፋ ቃቺዶሶና።

³ ዎሳ ኬሳይ ኤንታ ኪቲን ቢዶሶና። ኤንቲ ሲሮፊንቄ ሳማሬራ አጲሼ አይሁዴ ጊዶናይሳቲ ዶሳኮ ዋኒዲ ሲሚዳኮ አዲዶሶና። ሄሲ አማኔይሳታ ኡባ ዳሮ ኡፋይሲስ። ⁴ ኤንቲ ዮሩሳሌም ጋኪዳ ዎዴ ዎሳ ኬሳይ፥ ሃዋሬቲኔ ጨማቲ ኤንታ ሞኪዶሶና። ዶሳይ ባንታራ አሲዳባ ኡባ አዲዶሶና። ⁵ ሺን ፋሪሳዌታ ባጋፌ አማኒዳ ኢሲ ኢሲ አሳቲ ዴንዲ ኤቁዲ፥ «አይሁዴ ጊዶናሺን አማኒዳ አሳቲ ቃግሬታናዉኔ ሙሴ ሂጊያ ናጋናው ቤሴስ» ያጊዶሶና።

⁶ ሃዋሬቲኔ ጨማቲ ሄሳ ዘሬታናው ሺቁዶሶና። ⁷ ዳሮ ሃሳዬዳፔ ጉዬ፥ ጴጌሮሲ ዴንዲ ኤቁዲ፥ «ታ ኢሻቶ፥ አይሁዴ ጊዶናይሳቲ ዎንጊላ ቃላ ታ ዶናፔ ሲዒዲ አማናና ሜላ ካሴቲዲ ታና ዶሳይ ሂንቴ ጊዶፌ ዶሪዳይሳ ሂንቴ ኤሬታ። ⁸ አሳ ዎዛና ኤሪያ ዶሳይ ጊሻ አያና ኑስ ኢሚዳይሳዳ ኤንታዉካ ኢሚዲ ቱማይስ።

⁹ አማኖን ኤንታ ዎዛና ጊሺዳ ጊሾ ኑ ጊዶኒኔ ኤንታ ጊዶን ዳማቴሴ ዎሲቤና። ¹⁰ ሄሳ ጊሾ፥ ኑ አዋቲኔ ኑኒ ቶካናው ዳንዳዒቦና ቃምባራ አማኔይሳታ ሞርጌን ዎሲዲ ሃዒ አይስ ዶሳ ፓጩቲ? ¹¹ ጎዳ ዮሱስ ኪሪስቶሳ አጶ ኬሃቴሳን ኤንቲ አቲዳይሳዳ ኑካ አቲዳይሳ አማኖስ» ያጊስ።

¹² አሳይ ሲዒ ጊዲ፥ ባርናባሲኔ ጳውሎሲ አይሁዴ ጊዶና አሳ ጊዶን ባንታ ባጋራ ዶሳይ አሲዳ ማላታታኔ አራሳባ ኡባ አዲሺን ሲዶሶና።

¹³ ኤንቲ ሃሳዩ አንጊዳፔ ጉዬ ያይቆቢ፥ «ኢሻቶ፥ ታ ጊይሳ ሲዒቴ። ¹⁴ ዶሳይ አይሁዴ ጊዶናይሳታ ጊዶፌ ባ አሴ ዶራናው ኮዬዲ ኤንታና ኮይሮ ዋቲዲ ቆፒዳኮ ሲሞኒ አዲስ። ¹⁵ ናቤታ ቃሳይ ሃይሳራ ጊኔስ። ጊሻ ማፃፋን፥

¹⁶ ሃይሳፌ ጉዬ፥ ታኒ ሲማና፥
ኩንዲዳ ዳዌቱ ካዎቴሳ ዴንላና፥
ላሴቲዳ ኬሳካ ዛራ ኤሳና፥

¹⁷ አቲዳ አሳ ኡባይ ታኮ ያና፥

15:1 ሌዌ 12:3 15:7 ሃ.አ 10:1-43 15:8 ሃ.አ 2:4፤ 10:44 15:16 አዎ 9:11-12

ታኒ ዩጊዳ አይሁዴ ጊዶና አሳ ኡባይ ታና ኮያና። 18 ቤኒፔ ደማዳ ሄሲ ኤሬታና ሜላ አሲዳ ምሳይ፥ ታኒ ያጋይስ) ያጌስ።

19 «ሄሳ ጊሾ፥ ታ ቆፋይ ምሳኮ ሲሚያ አይሁዴ ጊዶናይሳታ ኑኒ ዋይሶናኮ ሎዎ። 20 ሺን ኤንቲ ኤቃስ ያርሼቲዲ ቱኒዳባ ሞና ሜላ፥ ላይማቶና ሜላ፥ ባዉታ ሞና ሜላኔ ሱሲ ኡዮና ሜላ ኤንታው ኑኒ ዳብዳቤ ዓፋናው ኮሼስ። 21 ሙሴ ሂጌይ ቤኒፔ ደሚዲ ሳምባታን ሳምባታን አይሁዴ ምሳ ኬሳታን ናባቤቲሼ ካታማ ኡባን ሳባኬቴስ» ያጌስ።

22 ሄሳፌ ጉዬ፥ ሃዋራቲኔ ጨማቲ ምሳ ኬሳ አሳ ኡባራ ኢሲፌ ባንታ ጊዶፌ ጉላ አሳታ ዶሪዲ ጳውሎሳራኔ ባርናባሳራ አንዎኪያ ዩዳናው ቆፋ ቃቺዶሶና። ኤንቲ ዳሮ ቦንቼቲዳ ናምቦ አሳታ ባርሳባሳ ጌቲቲያ ዩሁዳኔ ሲላሴ ዶሪዶሶና። 23 ሃይሳዳ ጌቲቲ ዓፌቲዳ ዳብዳቤያ ኤንታ ቦላ ዩዲዶሶና፡ «ኑኒ ሃዋራቲኔ ጨማቲ ሂንቲ ኢሻቲ፥ አንዎኪያን፥ ሶሪያኒኔ ኪልቂያን ዴዲያ አይሁዴ ጊዶና ኢሻታስ ኑ ሳሮሉዋ ኪቶስ።

24 «ኑኒ ኪቶና አሳቲ ኑ ጊዶፌ ቢዲ፥ ሂንቲ ቃፃሬታናዉኔ ሂጊያ ናጋናው ቤሴስ) ጊዲ፥ ሂንቲና ዋይሲዳይሳኔ ዩሎዩዳይሳ ሲዲዳ። 25 ኑኒ ዶሲያ ባርናባሳኔ ጳውሎሳ ዶሬቲዳ አሳታራ ኢሲፌ ሂንቲኮ ኪታናው ኢሲ ዎዛናን ኑ ቆፋ ቃቺዳ። 26 ኤንቲ ኑ ጎዳ ዩሱስ ኪሪስቶሳ ጊሾ ባንታ ዴዎዋ አሲ ኢሚዶሶና። 27 ሄሳ ጊሾ፥ ኑኒ ዓፌዳይሳ ኤንቲ ባንታ ዶናን ጉጂዲ ሂንቲው አዳና ሜላ ዩሁዳኔ ሲላሴ ኪቲዳ።

28 «ሃ ኮሼይሳታፔ አቲን ሃራ ቶሆ ሂንቲና ቶሶና ሜላ ኑኒ ጌሻ አያናይ አዳ ቃቺዳ። 29 ኤቃስ ያርሼቲዲ ቱኒዳባ ሞፒቲ፥ ሱሉ ኡዮፒቲ፥ ባዉታ ሞፒቲ፥ ላይማቶፒቲ። ሃ ኡባፌ ሂንቲ፥ ሂንቲ ሁዲያ ናጊኮ ሎዎባ አሴታ» ያጌዶሶና።

30 ሄሳ ጊሾ፥ ኪቲቲዳይሳቲ ሞይዜቲዲ አንዎኪያ ቢዲ አማኒያ አሳ ሺሺዲ፥ ዳብዳቤ ኢሚዶሶና። 31 ኤንቲ ሄ ሚንሴሲያ ዳብዳቤያ ናባቤዳ ዎዴ ኡፋይቲዶሶና። 32 ቃሲ ዩሁዳኔ ሲላሴይ ባንታ ሁዲን ናቤ ጊዲያ ጊሾ አማኔይሳታ ሎይሲ ዞሪዲ ሚንሴሲዶሶና። 33 ኤንቲ አንዎኪያን ጉላ ጋላስ ኡቲዳፔ ጉዬ ኢሻቲ ሎዎራ ሞይዚን ባንታና ኪቲዳይሳታኮ ሲሚዶሶና። 34 * [ሺን ሲላሴይ ያን አታናው ኮዩስ።]

35 ቃሲ ጳውሎሲኔ ባርናባሲ ሃራ ዳሮ አሳታራ ኢሲፌ ጎዳ ቃላ ታማርሲሼኔ ዎንጌላ አዲሼ አንዎኪያን ጋምዲዶሶና።

15:20 ኬሳ 34፡15-17፤ ሎዌ 17፡10-16፤ 18፡6-23 * 15:34 ኢሲ ኢሲ ማፃፋታን ፓይዶ 34 ባዎ።

ጳውሎስን ባርናባሲ ሻኬቲዶሶና

³⁶ ጉሳ ጋላሳፕ ጉዩ ጳውሎስ ባርናባሳኮ፥ «ኑኒ ኅዳ ቃላ አዲዳ ካታማ ኡባን አማኔይሳቲ ዋኒዲ ዴዒያኮ ጉዩ ሲሚሼ ምዋሳና» ያጊስ። ³⁷ ባርናባሲ ማርቆሳ ጌቴቲያ ዮሃንሳ ባንታራ ኤፋናው ኮዩስ። ³⁸ ሺን ጳውሎስ ማርቆሳ ባንታራ ኤፋናው ኮዩቤና። ጋሶይካ፥ ኢ ጲንሬሲያን ሻኬቲዲ ኤንታራ አላናው ቢቤና። ³⁹ ኤንታ ጊዶን ኢታ አሺ ኬዩን ኢሶይ ኢሱዋሬ ሻኬቲዶሶና። ባርናባሲ ማርቆሳ ኤኪዲ ማርካቤራ ቆጲሮሳ ቢስ። ⁴⁰ ሺን ጳውሎስ ሲላሴ ዶሪስ፤ አማኔይሳቲ ጳውሎሳ ዶሳ አዶ ኬሃቴላስ ሃዳራ ኢሚዳፕ ጉዩ ኢ ኬዩዲ ቢስ። ⁴¹ ያቲዲ፥ ምሳ ኬሳታ ሚንቬሲሼ ሶሪያራኔ ኪልቂያራ አዲስ።

16

ጊሞቲዮሲ ጳውሎሳራኔ ሲላሴራ ጋሄቲስ

¹ ጳውሎስ ዳርቤኔ ሊስጊራ ቢስ። ያን ጊሞቲዮሳ ጊያ አማኒያ አሲ ዴዔስ። ኢያ አያ አማኒያ አይሁዴ ማጫስ፥ ኢያ አዋይ ጊሪኬ አሲ። ² ሊስጊራኒኔ ኢቆኒዮኔን ዴዒያ አማኔይሳቲ ጊሞቲዮሳሳ ሎይሲዲ ማርካቲዶሶና። ³ ጳውሎስ ጊሞቲዮሳ ባራ ኤፋናው ኮዩዲ፥ ኢያ አዋይ ጊሪኬ አሲ ጊዲዳይሳ ሄ ቤሳን ዴዒያ አይሁዴ ኡባይ ኤሪያ ጊሾ ኢያ ቃግሪስ። ⁴ ኤንቲ ካታማታራ ቢሼ ዩሩሳላሜን ዴዒያ ሃዋሬቲኔ ጨማቲ ምሲዳ ሂጊያ አማኔይሳቲ ናጋና ሜላ ኤንታው አዲሼ አዲዶሶና። ⁵ ሄሳ ጊሾ፥ ምሳ ኬሳቲ አማኖን ሚኒሼ፥ ታይቦንካ ጋላስ ጋላስ ዳሪ ዳሪ ቢዶሶና።

ጳውሎስ ማቆዶኒያ ባናዳ ዌጌቲስ

⁶ ኢሲያን ቃላ አዶና ሜላ ጌሻ አያናይ ኤንታ ዲጊዳ ጊሾ ጲርጌራኔ ጋላቲያ ቢታራ አዲዶሶና። ⁷ ኤንቲ ሚሲያ ዛዋ ጋኪዳ ምዴ ቤቲኒያ ባናው ኮዩዶሶና። ሺን ዩሱሳ አያናይ ኤንታ ዲጊስ። ⁸ ሄሳ ጊሾ፥ ኤንቲ ሚሲያ ማታራ አዲሼ ጊሮዳዳ ምዲዶሶና። ⁹ ጳውሎስ ቃማ ቆንጩሳን ኢሲ ማቆዶኒያ አሲ ባኮ፥ «ማቆዶኒያ ፒናዳ ኑና ማዳርኪ» ያጊሼ ኤቂዲ ምሲሺን ቤዒስ። ¹⁰ ቆንጩሳ ኢ ቤዒዳፕ ጉዩ ኤሌሲዲ ኑኒ ማቆዶኒያ ባናው ኮዩዳ። ሄሲካ፥ ምንገላ ያን ዴዒያ አሳስ አዳናው ዶሳይ ኑና ዌጊዳይሳ ኤሪዳ ጊሾሳ።

ሊዲያ ኪሪስቶሳ አማናሱ

¹¹ ጊሮዳፕ ዴንዲዲ ማርካቤን ጌሊዲ ሳሞቲራቄ ቢዳ፥ ምንጭሳ ጋላስ ናጵሌ ቢዳ። ¹² ያፕ ዴንዲዲ ማቆዶኒያ ቢታን

ዴዲያ ፊልጲሲዩሳ ጊያ ኮይሮ ካታማ ቢዳ። ቃሲ ፊልጲሲዩሲ ሮሜ አሳይ ዴዲያ ካታማ። ኑኒ ሄ ካታማን ጉላ ጋላስ ኡቲዳ።

13 ሳምባታ ጋላስ ካታማ፤ ጋፃን ሻፋ ዶናን አይሁዴቲ ያሳ ዎሲያ ቤሲ ዴዴይሳ ኤሪዲ ያ ቢዳ። ሄ ቤሳን ሺቂዳ ማጫሳስ ቃሳ አዲዳ።

14 ኑና ሲዲያ አሳ፤ ኢሲ ሊዲያ ጌቴቲያ ቲያቲሮና ካታማ፤ ዩዳ። ያሳ አማኒዳ ዘዎ አፊላ ዛልዲያ። ማጫሲያ ዴዳወሱ። ጳውሎሲ አዴይሳ ኢያ ሲዳና ሜላ ያሳይ ኢ ዎዛና ዶዩስ።

15 ሊዲያ ባ ሶ አሳራ ኢሲፊ ፃማቂቲዳ፤ ጉዩ ኑኮ። «ሂንቴ ታና ጎዳ ቱማ አማናሱ ጊኮ ታ ሶ ዩዲቲ» ጋዳ ሚንሳዳ ዎሳሱ።

ጳውሎሲኔ ሲላሲ ቃሼቲዶሶና

16 ኑኒ ያሳ ዎሲያ ቤሳ ቢሺን ኢታ አያኒ ኢ ቦላ ዴዲዲ ካይሲያ ኢሲ ጌላዎ አይሌይ ኑራ ጋሄታሱ። ኢያ ካያዳ ዳሮ ሚሼ ባ ጎዳታስ ኤሃወሱ። 17 ጳውሎሲኔ ኑና ካሳዳ። «ሃይሳቲ ኡባፊ ቦላ ያሳ አይሌታ! ኤንቴ ሂንቴ አታና አጊያ አዴይሳታ» ጋዳ ዋሳሱ።

18 ኡባ ጋላስ ሄሳዳ ጋወሱ። ሺን ጳውሎሲ ዩሎቲዲ ጉዩ ሲሚዲ። ሄ አያና። «ዩሱስ ኪሪስቶሳ ሱንሳን ኢ፤ ጌዩ ኪቲስ። ኢራካ ኢታ አያናይ ኢ፤ ጌዩ አጊስ።

19 ሺን ኢ ጎዳቲ ባንታው ሚሼ ዴሚያ አጊይ ዳዩዳይሳ ቤዲዲ። ጳውሎሲኔ ሲላሲ አይኪዲ። ዳባባ ዳይናታ ሲንፊ ጎቺ ኤፊዶሶና። 20 ዳይናታ ሲንፊ ኤንታ ኤፊዲ። «ሃይሳቲ አይሁዴ አሲ ጊዲሼ ኑ ካታማ አሳ ዳሮ ዋይሶሶና። 21 ኑኒ ሮሜ ቢታ አሲ ጊዲሼ ኤካናወኔ አሳናው ዎጋ ጊዶናባ ታማርሶሶና» ያጊዶሶና።

22 አሳይ ኢሲ ባጋ ጊዲዲ። ጳውሎሳ ቦላኔ ሲላሲ ቦላ ዴንዲዶሶና። ዳይናቲ ኤንታ ማዑዋ ቃሪዲ ፃምዓን ኤንታ ሾጫና ሜላ ኪቲዶሶና። 23 ኤንታ ዳሮ ዋዲዳ፤ ጉዩ ቃሾ ኪሳ ጌልሲዶሶና። ቃሾ ኪሳ ናጌይሲ ኤንታ ሚንሲ ናጋና ሜላ ኪቲዶሶና። 24 ቃሾ ኪሳ ናጌይሲ ሄ ኪታ ኤኪዲ። ጳውሎሲኔ ሲላሲ ቃሾ ኪሳስ ቆልዓ ጌልሲስ። ኤንታ ቶሁዋ ዱጊስ

25 ሺን ጊዲ ቢላሄ ጊዲያ ዎዴ ጳውሎሳራኔ ሲላሲራ ዎሲሼኔ ማዘሙሬ ዩዲሼ ያሳ ጋላቶሶና። ቃሾ ኪሳን ዴዲያ ሃራ አሳቲካ ኤንቴ ጊያባ ሲዎሶና። 26 ቆፖና ቃሾ ኪሳ ባሶይ ቃፃና ጋካናው ቢታ ቃዎይ ሃኒስ። ሄ ሳቴንካ ፔንጌ ኡባይ ዶዩቲ አጊስ። ቃሼቲዳ አሳ ኡባ ሳንሳሳታይ ቢርሼቲ ዎዲስ። 27 ቃሾ ኪሳ ናጌይሲ ዲስኮፊ ባርኪዳ ዎዴ ቃሾ ኪሳ ፔንጌ ኡባይ ዶዩቲዳይሳ ቤዲዲ ቃሾ አሳይ ኪሲ ኤኪ ቢዳባ ዳኒን ባና ዎዳናው ማሼ ኤኪስ። 28 ሺን ጳውሎሲ ቃሳ ዶቁ አሲዲ «ኑ ኡባይ ሃይሳን ዴዲያ ጊሾ ኔኒ ኔና ቆሆፓ» ያጊስ።

29 ቃሾ ከላ ናጌይሲ ያምጥ ዎሲ ኤኪዲ ኤሌሲዲ ጋሲ ዎጊስ። ኮኮሪሼ ጳውሎሳ ሲገላጌ ሲላሴ ሲገላጌ ጉፋኒስ። 30 ኤንታ ካራ ኪሲዲ፣ «ታ ጎዳቶ፣ ታኒ አታናው አይ አሳናው ቤሲ?» ያጊስ።

31 ጳውሎሳራኔ ሲላሴራ ኢያኮ፣ «ጎዳ ዩሱስ ኪሪስቶስ አማና፤ ኔራኔ ኔ ሶ አሳራ አታና» ያጊዶሶና። 32 ኤንቲ ኢያሲኔ ኢያ ሶን ዴዲያ ኡባስ ጎዳ ቃላ አዲዶሶና። 33 ቃማ ሄ ሳቴንካ ቃሾ ከላ ናጌይሲ ኤንታ ኤፊዲ ኤንታ ማዱንሳ ሜጨስ። ኤሌሲዲ ባ ሶ አሳ ኡባራ ማቆቲስ። 34 ጳውሎሳኔ ሲላሴ ባ ሶ ኤፊዲ ኤንታው ካሲ አሲስ። ኢ ባ ሶ አሳ ኡባራ ያሳ አማኒዳ ጊሾ ኡፋይቲስ።

35 ሳዳይ ዎንቲን ዳይናቲ፣ «ሄ አሳታ ቢላ» ያጊዲ ፖሊሴ ሃላቃታ ኢያኮ ኪቲዶሶና። 36 ቃሾ ከላ ናጌይሲ፣ «ሂንቱ ቢሴታና ሜላ ዳይናቲ ኪቲዶሶና። ሂዛ፣ ኪዩዲ ሳሮ ቢቴ» ያጊዲ ሄ ኪታ ጳውሎሳስ አዲስ።

37 ሺን ጳውሎሲ ሄ ፖሊሴ ሃላቃታኮ፣ «ኑኒ ሮሜ አሲ * ጊዲሺን ኤንቲ ኑና ፐርዲ ባይና አሳ ሲገላጌ ዋዲዲ፣ ቃሾ ከላን ዩጊዶሶና። ሃዲ ኑና ጌማን ኪዩዲ ቦ ጎና? ሃኔና፣ ኤንቲ ባንታ ሁዔን ዩዲ ኑና ኪሶ» ያጊስ።

38 ፖሊሴ ሃላቃቲ ዳይናታስ ሄሳ አዲን፣ ጳውሎሳራኔ ሲላሴራ ሮሜ ቢታ አሲ ጊዲዳይሳ ሲዲዳ ዎዴ ያዩዶሶና። 39 ሄሳ ጊሾ፣ ዳይናቲ ዩዲ ኤንታኮ፣ «ኑኒ ሂንቱና ቆሂዳ» ጊዶሶና። ቃሾ ከላፌ ካራ ኤንታ ኪሲዲ፣ ካታማፔ ኪዩዲ ባና ሜላ ዎሲዶሶና። 40 ጳውሎሳራኔ ሲላሴራ ቃሾ ከላፌ ኪዩዲ ሊዲያ ሶ ቢዶሶና። ያን አማኔይሳታራ ጋሄቲዲ ኤንታ ሚንጩሲዲ ኪዩዲ ቢዶሶና።

17

ጳውሎሲ ቴሴሎንቄን ታማርሲስ

1 ጳውሎሳራኔ ሲላሴራ አምፊጳሊሳራኔ አጳሎኒያራ አዲዲ ቴሴሎንቄ ቢዶሶና። ያን አይሁዴ ዎሳ ኪሲ ዴዴስ። 2 ጳውሎሲ ካሲይሳዳ ያ ጊሊስ። ያን ሄሹ ሳሚንታ ያሳ ቃሳፔ አሳስ አዲስ። 3 ኪሪስቶሲ ዋዩ ኤካናዉኔ ሃይቆፔ ዴንዳናው ቤሴይሳ ኤንታው ቆንጨሲዲ አዲሼ፣ «ዩሱሲ ሃ ታኒ ሂንቱው አዴይሲ ኪሪስቶሳ» ያጊስ። 4 ኤንታፌ ኢሶቲ ኢሶቲ አዳይ ቱማ ጊዴይሳ ማዲዲ ጳውሎሳራኔ ሲላሴራ ኢሲፊዶሶና። ሄሳዳካ፣ ያሳ ጎይኒያ ዳሮ ጊሪኬ አሳይኔ ዳሮ ቦንቹቲዳ ማጫሳቲካ ኤንታራ ኢሲፊዶሶና።

* 16:37 ሮሜ አሲ፡ ጳውሎሲ ሮሜ አሲ ያጊዲ ባና ያጊዳይ ሄ ዎዴ አይሁዴ ቢታ ሃራይ ሮሜ ካዎቱላ ጊዲዳ ጊሾሳ። ሄ ዎዴ ሮሜ ቢታን ዴዲያ አሳይ ፐርዲ ባይና ጋራፌቶና።

5 ሺን አይሁዴቲ ቃናቲዲ ኢሲ ኢሲ አሶይ ባይና ኢታ አሳታ አጌፔ ሺሺዶሶና። ካታማን ቡቁሲ ኬሲዶሶና፤ ጳውሎሳኔ ሲላሴ አሳስ አሲ ኢማናው ኮዩዲ ያሶና ኬሳ ቴቂዶሶና። 6 ጳውሎሳኔ ሲላሲ ኤንታው ቤንቶና ኢዲን፣ ያሶና ኢሲ ኢሲ አማኔይሳታ ካታማ ሃላቃታኮ ንቺ ኤፊዲ፣ «ሃይሳቲ ቢታ ኡባ ቡቁይሳቲ ሃዲ ኑኮ ዩዶሶና። 7 ያሶኒ ኤንታ ባ ሶን ዎሲስ። ሃይሳቲ፣ «ዩሱሳ ጊያ ሃራ ካዎይ ዴዔስ» ጊዲ ቁሳሬ ኪታ ሜንሶሶና» ያጊዲ ዶቁ ጊዳ ቃላን አዲዶሶና።

8 ሺቂዳ አሳይኔ ካታማ ሃላቃቲ ሄሳ ሲዲዲ ሃናናባ ጳዩዶሶና።
9 ሃላቃቲ ያሶናኔ ሃራታ ዋሴን ቢርሺዶሶና።

ጳውሎሲ ቤሪያን ታማርሲስ

10 አማኔይሳቲ ጳውሎሳኔ ሲላሴ ቃማራ ቤሪያ ዩዲዶሶና። ቤሪያ ታኪዲ፣ አይሁዴ ዎሳ ኬሲ ጌሊዶሶና። 11 ቤሪያ አሳቲ ቴሴሎንቄ አሳታፔ አዲዳ ሱሬታ። ኤንቲ ቃላ ኩሜሳ ዎዛናፔ ኤኪዶሶና፤ ጳውሎሲ ጊዳይሲ ቱማ ጊዴይሳ ሻኪ ኤራናው ጋላስ ጋላስ ጌሻ ማፃፋታ ፃናዎሶና። 12 ሄሳ ጊሾ፣ ኤንታፌ ዳሮቲ፣ ጊሪኬታፔካ ቦንፔቲዳ ዳሮ ማጫሳቲኔ ዳሮ አዴቲ አማኒዶሶና።

13 ሺን ቴሴሎንቄን ዴዲያ አይሁዴቲ ጳውሎሲ ዎሳ ቃላ ቤሪያንካ አዲዳይሳ ሲዲዳ ዎዴ ቤሪያ ዩዲ አሳ ቡቁዶሶና። 14 ሄሳፌ ጉዩ፣ አማኔይሳቲ ኤሴሲዲ ጳውሎሳ አባ ማቲ ዩዲዶሶና። ሺን ሲላሴይኔ ዊሞቲዮሲ ቤሪያን አቲዶሶና። 15 ጳውሎሳ ሞይዚዳ አሳቲ አቴና ጋሲዶሶና። ሄ አሳቲ ሲላሴይኔ ዊሞቲዮሲ ባንታው ዳንዳዔቲዳ ሜላ ኤሴሲዲ ባኮ ያና ሜላ ጳውሎሲ ኪቲዳ ኪታ ኤኪዲ ቤሪያ ሲሚዶሶና።

ጳውሎሲ አቴና ቢስ

16 ጳውሎሲ አቴናን ሲላሴይኔ ዊሞቲዮሳ ናጊሼ፣ ካታማን ኤቂ ኩሚዳይሳ ቤዲዲ ዩሎቲስ። 17 ሄሳ ጊሾ፣ አይሁዴ ዎሳ ኬሳን አይሁዴታራኔ ዎሳ ንይኒያ አይሁዴ ጊዶና አሳታራ ቃሲ ባራ ጋሄቲያ አሳታራ ኡባ ዎዴ ፓላሜስ። 18 ኤጲቆሮሳኔ ኢስቶይኬ ጌቲቲያ ጩጋታፔ ኢሲ ኢሲ ኤራንቾቲ ጳውሎሳራ ፓላሚዶሶና። ኤንታፌ ኢሶቲ ኢሶቲ፣ «ሃ ዮያማይ አይ አዳናው ኮዩ?» ያጊዶሶና።

ሃራቲ ጳውሎሲ ዩሱሳባኔ ሃይቆፔ ኢ ዴንዲዳይሳ ባንታው አዲዳ ጊሾ «አራሳ ዎሳታባ አዲያ ዳኔስ» ያጊዶሶና።

19 ጳውሎሳ አይኪዲ አርዮስፓንሳ ጊያ ሺቆ ቤሳ ኤፊዲ፣ «ሃ ኔኒ ታማርሲያ አራሳባይ አይቤኮ ኑና ኤሪሲኪ?» 20 አይስ ጊኮ፣ ኔኒ ኑስ አራሳባ አዳሳ፤ ሂዛ ሄሲ አይቤኮ ኑኒ ኤራናው ኮዮስ»

ያጊደሶና። 21 አቴና አሳ ኡባይኔ ያን ዴዲያ ኢማሳቲ አራሳባ አዴቶናኔ ሲያና ፔዎኮና።

22 ጳውሎሲ አርዮስፓጎሳን ሺቂዳ አሳ ሲንሳን ኤቂዲ፥ «አቴና አሳው፥ ሂንቴ ያሳታስ ኡባባን ዳሮ ያዩይሳ ታኒ ቤዓይስ። 23 ታኒ ሂንቴ ካታማራ ዩያሼ ሂንቴ ጎይኒያ ቤሳታ ቤዒያ ዎዴ <ኤሬቶና ያሳስ> ጌቱቲ ገሬቲዳ ያርሾ ቤሳ ዴማስ። ሃ ሂንቴ ኤሮናሺን ጎይኒይሳ ታኒ ሂንቴው አዳይስ። 24 ሳዓኔ ሳዓን ዴዲያ ኡባባ ሜዲዳ ያሳይ፥ ሳሉዋኔ ሳዓ ጎዳይ፥ አሲ ኪዒዳ ኪሳን ዴና። 25 ኢ ዴዎ፥ ሼምፕኔ ኡባባ አሳ ኡባስ ኢሚያ ጊሾ ፓጩ ዴዲያ አሳዳ አሳ ማዴ ኮዩና። 26 ያሳይ አሳ ዜሬሲ ኡባ ኢሲ አዲያሬ ሜዲዲ ቤታ ኡባን ዎሲስ። ያቲዲ ኤንቲ ዴዓና ዎዲያሲኔ ቤሳስ ዛዋ ኢሚስ። 27 ኢ ሄሳ አሲዳይ አሲ ኢያ ኮያና ሜላኔ ፒልጊዲ ዴማና ሜላሳ፥ ሃኒኮካ ኢ ኑፔ ጌሚቤና። 28 ሂንቴሬ ኢሲ ኢሲ ዩዴይሳቲ፥ <ኑኒ ኢያ ናይታ> ጊዳይሳዳ፥ <ኑኒ ኢያን ፓግ ዴዎስ፥ ቃዎስ።> 29 ሂዛ፥ ኑኒ ያሳ ናይታ ጊዲያ ጊሾ <ያሳይ አሳ ሂላቴላኒኔ ቆፋን ዎርቃሬ ዎይኮ ቤራፔ ዎይኮ ሹቻሬ አሴቲዳባ ዳኔስ> ያጊዲ ቆፓናው ቤቤና። 30 ሄሳ ጊሾ፥ ያሳይ ካሴ ዎዴ አሳይ ኤሮና አሲዳይሳ አጊዲ አዲስ፥ ሺን ሃዒ ኡባሰን ዴዲያ አሲ ኡባይ ናጋራፔ ሲማና ሜላ ኪቴስ። 31 አይስ ጊኮ፥ ያሳይ ባ ዶሪዳ አዲያን ሳዓን ዴዲያ አሳ ኡባ ቦላ ዒሎ ፒርዳ ፒርዳናው ቃማ ጊጊሲ ዎሲስ። ኢያ ሃይቆፔ ዴንሲዲ ሄሳ አሳ ኡባስ ቱማዩስ» ያጊስ።

32 ኤንታሬ ኢሲ ኢሲ አሳቲ ሃይቆፔ ዴንዶባ ጳውሎሳፔ ሲዒዲ፥ ኢያ ቦላ ቁልቂሲዶሶና። ሺን ሃራቲ፥ «ኑኒ ሄሳ ኔፔ ጉጂዲ ሲዓናው ኮዮስ» ያጊደሶና። 33 ሄሳ ጊሾ፥ ጳውሎሲ ኤንታ ጊዶሬ ኪዩስ። 34 ሺን ኢሲ ኢሲ አዴቲ ጳውሎሳራ ጋሄቲዲ አማኒዶሶና። ኤንታ ጊዶሬ አርዮስፓጎሳን ሺቂቁን ዴዲያ ዲዮናስዮሳ ጊያ አዴይ፥ ዳማርሶ ጊያ ኢሲ ማጫሲያኔ ሃራቲ ዴዎሶና።

18

ጳውሎሲ ቆሮንቶሳ ቢስ

1 ሄሳሬ ጉዩ፥ ጳውሎሲ አቴናፔ ኪዩዲ፥ ቆሮንቶሳ ቢስ። 2 ያን አቂላ ጊያ ጳንዎሳን ዩሌቲዳ ኢሲ አይሁዴ አሲ ዴሚስ። አይሁዴ አሳ ኡባይ ሮማፔ ኪያና ሜላ ካዎይ ቃላዉዲዮሲ ኪቲዳ ጊሾ ጉሳ ዎዴፔ ካሴ ኢ ባ ማቼ ጲሪስቂላራ ገሌፔ ዩስ። ጳውሎሲ ኤንታራ ጋሄታናው ቢስ። 3 ኢያ አሶይ ኤንታይሳዳ ዱንካኔ ሲኮ ጊዲያ

17:24 1ካዎ 8:27፤ ኢሳ 42:5፤ ሃ.አ 7:48

ጊሾ ኤንታራ ኡቲዲ ኢሲፌ አሲስ።⁴ ጳውሎሲ ሳምባታ ኡባን አይሁዴታኔ ጊሪኬታ አማንሳናው አይሁዴ ዎሳ ኬሳን ፓላሜስ።

⁵ ሲላሴይኔ ዊሞቲዮሲ ማቄዶኒያፔ ዩዳ ዎዴ ጳውሎሲ ባ ኩሜሳ ዎዲያ ኢሚዲ አይሁዴታስ ዩሱሲ ኢ፥ ኪሪስቶሳ ጊዲ ቃላ አዲስ።⁶ ሺን ኤንቲ ጳውሎሳ ኢዊዲ ኢያ ጫዩን ጳውሎሲ ባ ማዑዋፔ ባና ቆቆሬሼ፥ «ሂንቱ ጎሜይ ሂንቱና አይኮ፤ ታኒ ሄሳን ዴዊኬ። ሂዛፔ ጉዩ፥ ታኒ አይሁዴ ጊዶና አሳኮ ባይስ» ያጊስ።

⁷ ያፔ ኬዩዲ ዎሳ ጎይኒያ ቲቶስ ዮስዎሳ ጊያ ኡራ ሶ ቢስ። ዮስዎሳ ኬሳይ አይሁዴ ዎሳ ኬሳ ማታን ዴዌስ።⁸ አይሁዴ ዎሳ ኬሳ ሃላቃይ ቃሪስጳሲ ባ ሶ አሳ ኡባራ ጎዳ አማኒስ። ቆሮንቶሳ አሳታፔካ ዳሮቲ ዎሳ ቃላ ሲዊዳ ዎዴ አማኒዲ ማቄቲዶሶና።

⁹ ጎዳይ ኢሲ ቃማ ጳውሎሳስ ቆንጫዲ፥ «ያዮፋ፤ አዳ፥ ሲዊ ጎፓ።¹⁰ ታኒ ኔራ ዴዌይስ። ታው ሃ ካታማን ዳሮ አሲ ዴዊያ ጊሾ ኔና ቆሂዲ ኢታባን ዩጋና አሲ አኒካ ባዋ» ያጊስ።¹¹ ሄሳ ጊሾ፥ ጳውሎሲ ዎሳ ቃላ አሳ ታማርሲሼ ኢሲ ላይሲኔ ኡሱፑን አጌና ኤንታራ ኡቲስ።

¹² ጋሊዮሲ አካያ ቢታ አይሲያ ዎዴ አይሁዴቲ ኢሲፌ ጳውሎሳ ቦላ ዴንዲዲ ፐርዳ ኬሲ ኢያ ኤፌዲ፥¹³ «ሃ አይይ ሂጊያ ኢዊዲ፥ አሳይ ዎሳ ጎይናና ሜላ አሴስ» ያጊዶሶና።

¹⁴ ጳውሎሲ ሃሳያና ሃኒሺን፥ ጋሊዮሲ አይሁዴታኮ፥ «አይሁዴቶ፥ ሄሲ ኢታ አሶ ዎይኮ ናቆ ጊዲያኮ ታኒ ሂንቱባ ዳንዳዳዳ ሲዓናው ቤሴስ።¹⁵ ሺን ቃላስ፥ ሱንሳሲኔ ሂንቱ ሂጊያስ ሂንቱ ፓላሚያባ ጊዲኮ ሂንቱ፥ ሂንቱው ቢሊቴ፤ ሄሳ ታኒ ፐርዲኬ» ያጊስ።¹⁶ ያቲዲ፥ ኤንታ ፐርዳ ኬሳፌ ካሬ ኬሲስ።¹⁷ ሄሳፌ ጉዩ፥ ጊሪኬ አሳ ኡባይ አይሁዴ ዎሳ ኬሳ ሃላቃ ሶስቲኒሳ አይኪዲ ፐርዳ ኬሳ ሲንሳን ዋዲዶሶና። ሺን ጋሊዮሲ ሄሳ ፓፃባ ጊቤና።

ጳውሎሲ አንዎኪያ ቢስ

¹⁸ ጳውሎሲ ዳሮ ጋላስ ቆሮንቶሳን ኡቲዳፔ ጉዩ አማኒያ አሳ ሳሮሲዲ፥ ጳሪስቂሊራኔ አቂላራ ማርካቤራ ሶሪያ ቢስ። ሺን ኢ ባናፔ ሲንሴ ባው ጋሶይ ዴዊያ ጊሾ ከንኪሪያ ካታማን ባ ሁዲያ ቡሉሴቲስ።¹⁹ ኤንቲ ኤፌሶና ጋኪዳ ዎዴ ጳውሎሲ ጳሪስቂሎኔ አቂላ ያን አጊስ። ሺን ባው አይሁዴ ዎሳ ኬሲ ጌሊዲ አይሁዴታራ አዴቲስ።²⁰ ኤንቲ ባንታራ ዳሮ ዎዴ ኡታና ሜላ ጳውሎሳ ዎሲዶሶና ሺን ኢ ኢዊስ።²¹ ኤንታፌ ሻኬቲሼ፥ «ታኒ ያ ባሊያ ዩሩሳላሜን ቦንቻናው ቤሴስ። ሺን ዎሲ ጊኮ ሂንቱኮ

18:18 ታይ 6:18

ሲማዳ ያና» ያጊዲ ኤፌሶናፔ ማርካቤራ ቢስ። ²² ቁሳሪያ ጋኪዳ ዎዴ ዩሩሳላሜ ቢዲ ዎሳ ኬላ አሳ ሳሮሲዳፔ ጉዩ አንዎኪያ ቢስ።

²³ ያን ጉሳ ዎዴ ጋምዲዳፔ ጉዩ አማኒያ አሳታ ኡባ ሚንጬሲሼ ጋላቲያራኔ ጲርጌራ አዲስ።

አጲሎሲ ኤፌሶናኔ ቆሮንቶሳን

²⁴ ኢስኪንዲሪያን ዩሌቲዳ ኢሲ አጲሎሳ ጊያ አይሁዴ አሲ ኤፌሶና ቢስ። ኢ አዳ ኤሪያ አሲኔ ዎሳ ቃላ ዳሮ ኤሪያ አሲ። ²⁵ ኢ ጎዳ አጊያ ታማሪዲ፥ አያናን ፀጌቲዲ ዩሱሳባ ሱሬ ታማርሴስ። ጊዶሺን፥ ዮሃኒሳ ሂንቃቲያ ሃላላ ኤሬስ። ²⁶ ኢ አይሁዴ ዎሳ ኬሳን ያዮና ታማርሴስ። ጲሪስቂሊኔ አቂሊ ኢ አዴይሳ ሲዲዳ ዎዴ ኢያ ባንታራ ሶ ኤሬዲ ዎሳ አጊያ ካሴይሳፌ ጌሺዲ ኢያው አዲዶሶና።

²⁷ አጲሎሲ አካያ ባናው ኮዩን ኤፌሶናን ዴዲያ አማኒያ አሳይ ኢያ ቆፋ ኤኪዲ አካያን ዴዲያ አማኔይሳቲ ኢያ ሞካና ሜላ ኤንታው ዳብዳቤ ሃሬዶሶና። ኢ ያ ጋኪዳ ዎዴ ዎሳ አዶ ኬሃቴሳ ባጋራ ዩሱስ ኪሪስቶሳ አማኒዳይሳታ ዳሮ ማዲስ። ²⁸ አይስ ጊኮ፥ ዩሱሲ ኢ ኪሪስቶሳ ጊዴይሳ አይሁዴታስ ዎሳ ቃላፔ ቆንጨሲዲ ዴሪያ ሲንሳን ሚንሳ አዲዲ ኤንታ ላሲስ።

19

ጳውሎሲ ኤፌሶና ቢስ

¹ አጲሎሲ ቆሮንቶሳን ዴዲሺን፥ ጳውሎሲ ቆሞ ባጋራ አዲዲ ኤፌሶና ቢስ። ያን ኢሲ ኢሲ አማኒያ አሳታ ዴሚስ። ² ኤንታኮ፥ «ሂንቴ አማኒዳ ዎዴ ጌሻ አያና ኤኪዴቲ?» ያጊዲ አይቺስ።

ኤንቲ፥ «አካይ፥ ኤኪቡኮ፤ ሃሪ አቶሺን፥ ጌሻ አያኒ ዴዲያባካ ሲዲቦኮ» ያጊዶሶና።

³ ጳውሎሲ ኤንታኮ፥ «ያቲን፥ አይቢን ሃማቄቲዴቲ?» ያጊስ። ኤንቲ፥ «ኑኒ ዮሃኒሳ ሂንቃቲያን ሃማቄቲዳ» ያጊዲ ዛሪዶሶና።

⁴ ጳውሎሲ፥ «ዮሃኒሲ ባፔ ጉዩራ ያ ዩሱስ ኪሪስቶሳን አሳይ አማናና ሜላ አሳስ አዲሼ፥ ናጋራፔ ሲሞ ቤሲያ ሂንቃቲያን ሃማቄስ» ያጊስ።

⁵ ኤንቲ ሄሳ ሲዲዳ ዎዴ ጎዳ ዩሱስ ኪሪስቶሳ ታማሬ ጊዳናው ሃማቄቲዶሶና። ⁶ ጳውሎሲ ባ ኩሺያ ኤንታ ቦላ ዎሲዳ ዎዴ ጌሻ አያኒ ኤንታ ቦላ ዎዲን፥ ዱማ ዱማ ዶናን አዴቲዶሶና፤ ቃሲ ቲንቢቲ አዲዶሶና። ⁷ ሄ ቤሳን ታማኔ ናምሳ ጊዲያ አሳቲ ዴዶሶና።

19:4 ማቶ 3:11፤ ማር 1:4፤ 7-8፤ ሉቃ 3:4፤ 16፤ ዮሃ 1:26-27

8 ጳውሎስ አይሁዴ ዎሳ ኬላ ጊሊዲ፣ ያሳ ካዎቴሳባ ያዮና ፓላሚሽኔ ሎይሲ ቆንጨሲሽ ኤንታራ ሄኹ አጌና ጋካናው ጋምዲስ። 9 ሺን ኤንታሬ ኢሶቲ ኢሶቲ ዱቤ ጊዲዲ ዳሮ አሳ ሲንሳን ጎዳ አጊያ ጫዬዲ አማኖና ኢዲዶሶና። ጳውሎስ አማኔይሳታ ኤንታሬ ሻኪ ኤኪዲ ያራኖሳ ጊያ ቲሚርቴ ኬሳን ኡባ ዎዴ ኤንታ ታማርሲስ። 10 ጳውሎስ ናምዑ ላይሲ ጋካናው ቃላ አዲስ። ሄሳ ጊሾ፣ ኢሲያን ዴዲያ አሳ ኡባይ፣ አይሁዴቲኔ አይሁዴ ጊዶናይሳቲ ጎዳ ቃላ ሲዲዶሶና።

የሳይ ጳውሎስ ኩሽን አሲዳ ማላታታ

11 የሳይ ጳውሎስ ኩሽን ዎልቃማ ማላታታ አሲስ። 12 ሄሳ ጊሾ፣ አሳይ ኢያ ቦላ ቦቹዳ ማራቢያ ዎይኮ ማዑዋ ሃርጋንቾታስ ኤፎሶና። ኤንቲካ ፓዎሶና፤ ቱና አያናቲካ ኤንታሬ ኬዮሶና።

13 ቱና አያናታ ኬሲሽ ዩያ አይሁዴታፕ ኢሶቲ ኢሶቲ፣ «ጳውሎስ ሳባኪያ ዩሱሳ ሱንሳን ኬዩቴ ጊዲ ሂንቴና ኪቶስ» ያጊዲ፣ ቱና አያናቲ አይኪዳ አሳታ ቦላ ጎዳ ዩሱሳ ሱንሳ ያጊዶሶና 14 ካሂኔ ሃላቃ አስቁዌ ጊያ ኢሲ አይሁዴ አዲያስ ሄሳ አሲያ ላፑን ናይቲ ዴዎሶና።

15 ሺን ቱና አያናይ ኤንታኮ፣ «ታኒ ዩሱሳካ ጳውሎሳካ ኤራይስ፣ ሺን ሂንቴ አናንቴ?» ያጊስ።

16 ቱና አያናይ አይኪዳ አዴይ ኤንታ ቦላ ጉፒ ዎዲዲ፣ ኤንታ ማዱንዲሲዲ፣ ሄ ኬሳፌ ካሎ ባቃታና ጋካናው ዎልቃሚስ።

17 ኤፌሶናን ዴዲያ አይሁዴቲኔ አይሁዴ ጊዶናይሳቲ ኡባይ ሄሳ ሲዲዲ ዳሮ ያዩዶሶና። ጎዳ ዩሱሳ ሱንሳይ ዳሮ ቦንፔቲስ።

18 አማኔይሳታፕ ዳሮቲ ባንታ አሲዳ ኢታ አሱዋ ፓሚሽኔ ቆንጨን አዲሽ ዮሶና። 19 ቢቴይሳታፕ ዳሮቲ ባንታ ማፃፋታ ሺሺዲ አሳ ኡባ ሲንሳን ፀ-ጊዶሶና። ሄ ማፃፋታ ጋቲያ ቆዳይ ኢሻታሙ ሙኩሉ ቢራ ሳንቲሜ * ጊዲስ። 20 ሄሳዳ ሃኒዲ ያሳ ቃላይ ዲጨሽኔ ዳልጊሽ ቢስ።

ኤፌሶና ካታማን አሺ ዴንዲስ

21 ሄሲ ፖሌቲዳፕ ጉዩ ጳውሎስ፣ «ታኒ ዩሩሳላሜ ባ ሲማዳ ሮሜካ ባናው ቤሴስ» ያጊዲ ማቁዶኒያራኔ አካያራ አዲዲ ዩሩሳላሜ ባናው ቆፋ ቃቺስ። 22 ቃሲ ባና ማዴይሳታፕ ናምዓታ ሂሞቲዮሳኔ ኤራስዎሳ ማቁዶኒያ ኪቲዲ፣ ባው ኢሲያን ጉሳ ዎዴ ጋምዲስ።

23 ሄ ዎዴ ጎዳ አጊያ ጊሾ ኤፌሶናን ዎልቃማ ካቺ ኬዩስ። 24 ኢሲ ቢራ አሲያ ዲሜዲሮሳ ጊያ ኡራይ አርዌሚሲ ኤቃ ኬላ

* 19:19 ቢራ ሳንቲሜ፣ ማቶሳ 26:15 ጸሊቴ።

ሚሲሊያ ቢራፔ አሲዲ ዳሮ ዎዴ ዴሜስ።²⁵ ሄሳ ጊሾ፣ ሄሳ ሜላ አሶ አሴይሳታ ኢሲፌ ሺሺዲ፣ «አሳው፥ ኑ ዱሬቴላይ ሃ አሱዋን ጊዴይሳ ሂንቴ ኤሬታ።²⁶ ሃይሲ ጳውሎሲ፣ «አሳ ኩሼን አሴቴዳይሳቲ ያሳታ ጊዶኮና) ያጊዲ፣ ኤፌሶናኒኔ ጉሳ ቢታታፔ አቲን ኩሜሳ ኢሲያ ኡባን ዴዲያ ዳሮ አሳ አዲ አማንሲዳይሳኔ ባሌሲዳይሳ ሂንቴ ቤዲዴታኔ ሲዲዴታ።²⁷ ሜቶ ጊዲዳይ፣ ኑ አሶይ ካዴቴይሳ ሃላላ ጊዶናሺን ኢሲያኒኔ ቢታ ኡባን ዴዲያ አሲ ጎይኒያ ጊታ ያሴ አርዌሚሲ ኬሳይ ቦንቼቶና አቴይሳኔ ኢ ጊታቴላይካ ኩንዳናይሳ» ያጊስ።

²⁸ አሳይ ሄሳ ሲዲዳ ዎዴ ሼኔን ፀጌቲዲ፣ «ኤፌሶና አርዌሚሳ ጊታ» ያጊዲ ዋሲዶሶና።²⁹ ሄ ዋሶይ ካታማ ኡባ ጋኪስ። ጳውሎሳራ ሃሙቲያ ማቀዶኒያ አሳታ፣ ጋዮሳኔ አርስባሮኮሳ አይኪዲ ጎቺሼ ካሳ ቤሳ ዎሊዶሶና።³⁰ ጳውሎሲካ አሳይ ሺቂዳሱዋ ጌላናው ኮዩስ፣ ሺን አማኔይሳቲ ኢያ ዲጊዶሶና።³¹ ኢሲያ ቢታ ሃላቃታፔ ጳውሎሳ ላጌ ጊዲዳ ኢሶቲ ኢሶቲ ጳውሎሳኮ ኪቲዲ፣ «ካሳ ቤሳ ቆንጮን ኬያዳ ቤንቶፋ» ጊዲ ኢያ ዎሲዶሶና።

³² ሺቂዳ አሳስ ሃናናባይ ዳይስ፤ ዳሪያ ባጋ አሳይ ሃሪ አቶሺን አይስ ሺቂዳኮ ኤሮና ጊሾ ኢሶይ ኢሲባስ ዋሲያ ዎዴ ሃንኮይ ሃራባስ ዋሴስ።³³ አይሁዴቲ ኢስኪንዲሬ ጊያ አዲያ አሲ ቤሲን፣ ኢሲ ኢሲ አሳይ ኢ ጋናባ አዲዲ ኢያ ሲንጴ አሲዶሶና። ኢ አሳይ ሲዲ ጋና ሜላ ባ ኩሺያን ማሊ ቤሲዲ፣ አሳስ ሞቴታናው ኤቂስ።

³⁴ ሺን ኢስኪንዲሬይ አይሁዴ አሲ ጊዲዳይሳ አሳይ ኤሪዳ ዎዴ ናምፀ ሳቴ ጊዳናይሳ ሜላ ኡባይ ኢሲ ቃላን፣ «ኤፌሶና አርዌሚሳ ጊታ» ያጊዲ ዋሲዶሶና።

³⁵ ዉርሴላን ካታማ ሃፌይ አሳ ሲዲ አሲዲ፣ «ኤፌሶና አሳው! ኤፌሶና ካታማይ ጊታ አርዌሚሲ ኤቃ ኬሳኔ ሳሎፔ ዎዲዳ፣ ኢ ሹቻ ሚሲሊያ ናጌይሳ ጊዴይሳ ኤሮና አሲ ባዋ።³⁶ ሃይሳ ካሺ ጊያ አሲ ባይና ጊሾ ሂንቴ ሲዲ ጋናዉኔ ዲርጊዲ አይኮ አሶና አጋናው ቤሴስ።³⁷ ሂንቴ ሃ አሳታ፣ ኤቃ ኬሳ ሚሼ ካይሶቲሶናይሳታኔ ኑ ያሳታ ጫይቦናይሳታ ኤሂዴታ።³⁸ ሄሳ ጊሾ፣ ዲሜሂሮሲኔ ኢያራ ዴዲያ አሳንቾቲ አሳ ሞታናው ኮይኮ፣ ፐርዳ ኬሳይ ዶያ ዴዴስ፤ ዳይናቲካ ዴዎሶና፤ ኡንቲ ሞታናው ዳንዳዎሶና።³⁹ ሺን ሂንቴ ሃራ አዳ ኮይኮ፣ ሻንጎ ሺቆን አዳይ ቤዴቶ።⁴⁰ ሄሳ ጊዶና ኢዊኮ ሃቺ ሃኒዳባስ ሮሜ ካዎቴላይ ኑና አይቻና። ሃ ቡቁላስ ጋሶይ ባይና ጊሾ ኑኒ ጋሶ አዳናው ዳንዳዎኮ»⁴¹ ያጊዲ ሺቂዋ ላሊስ።

1 ዋሶይ ደጩዳጅ ጉዩ ጳውሎሲ አማኒያ አሳታ ዩጊሲዲ ኤንታ ዞሪዳጅ ጉዩ ሳርሲዲ ማቀደኒያ ባናው ከዩስ። 2 ኢ አዲያ ቢታታን ደዒያ አማኒያ አሳ ቃላ አዲዲ ሚንጮሲዳጅ ጉዩ ጊሪኬ ቢታ ቢስ። 3 ኢ ያን ሄዥ አጌና ኡቲዲ፣ ማርካቤራ ሶሪያ ባናው ቆፒዲ ደዒሺን፣ አይሁዴቲ ባና ዎዳናው ኮዩይሳ ኤሪዲ ማቀደኒያራ ጉዩ ሲማናው ኮዩስ።

4 ጳውሎሳ ሞይዚዳይሳቲ ቤሪያጅ ጳርሁሳ ናዓ ሶጳዊሮሳ፣ ቴሴሎንቄሬ አርስባሮኮሳኔ ሲኮንዱሳ፣ ደርቤሬ ጋዮሳ፣ ኢሲያጅ ቴኪቆሳ፣ ሂሮሬሞሳኔ ሂሞቲዮሳ። 5 ሄሳቲ ሲንጮ ቢዲ ኑና ሂሮዓዳን ናንሶና። 6 ኑኒ ኡይሳ ባሊያ ቦንቺዳጅ ጉዩ ፊልጲሲዮሳጅ ማርካቤራ ደንዲዲ፣ ኢቻሻንሶ ጋላሳን ኤንታ ሂሮዓዳን ጋኪዲ ያን ላፑን ጋላስ ጋምዒዳ።

ጳውሎሲ ሂሮዓዳን

7 ሳሚንታሬ ኮይሮ ጋላሳን ኑኒ ኡይሳ ሚንሳናው ሺቂዲ ደዒሺን፣ ጳውሎሲ ዎንቴሴ ባናው ቆፒዳ ጊሾ ኤንታው ቃላ አዲሼ ጊዲ ቢላሄ ጋካናው አዳ አዱሲስ። 8 ኑኒ ሺቂዲ ኡቲዳ ፖቂያን ዳሮ ፖዶይ ደዒኔስ። 9 ኤዊዊኮሳ ጊያ ኢሲ ናዓቴሳይ ማስኮቴ ዳላ ኡቲዲ፣ ባና ዶጊዲ ዲስኪስ። ጳውሎሲ አዳ አዱሲዳ ዎይ ኤዊዊኮሲ ዲስኮ ኤይዲ ሄዥንሶ ፖቂያጅ ኩንዲዲ ሃይቂዳይሳ አሳይ ደንሲስ። 10 ሺን ጳውሎሲ ዎዲዲ፣ ኢያ ቦላ ጉፋኒስ። ኢያ ኢዲሚዲ፣ «ኢ ሃይቂቤና፣ ሂርጎሬቴ» ያጊስ። 11 ሄሳሬ ጉዩ፣ ፑዴ ፖቂያ ቦላ ከይዲ ኡይሳ ሜንሲዲ ሚስ። ሳዒ ዎንታና ጋካናው አሳስ አዲዳጅ ጉዩ ደንዲዲ ቢስ። 12 ሄ ፓዊዳ ናቴሳ ሶ ኤሬዲ ዳሮ ኡፋይቲዶሶና።

ጳውሎሲ ሂሮዓዳጅ ሚሊዌ ቢስ

13 ሺን ጳውሎሲ ባና ያጅ ሞካና ሜላ ኑስ አዲዳ ጊሾ ካሴቲዲ ማርካቤያኮ ቢዲ፣ አሶሳ ባናው ደንዲዲ። አይስ ጊኮ፣ ኢ ቶሆን ባናው ቆፒዳ ጊሾ ኑና ሄሳሶ ኪቲስ። 14 ኢ ኑራ አሶሳን ጋሄቲን ማርካቤያን ኢያ ኤኪዲ ሚሊኒኔ ቢዳ። 15 ዎንቴሳ ጋላስ ያጅ ደንዲዲ ማርካቤራ ኪዮሳ ሲንጮን ደዒያ ቤሳ ጋኪዳ፤ ቃሲ ዎንቴሳ ጋላስ ሳሞሳ ፒኒዲ ካሊያ ጋላስ ሚሊዌ ጋኪዳ። 16 ጳውሎሲ ኢሲያን ዳሮ ጋምዶና ኤሬሶና ማታራ አዳናው ቆፒስ። ባው ዳንዳዔቲኮ ጳንዌቆስዌ ባሊያ ጋላስ ዩሩሳላሜ ጋካናው ኤሶቴስ።

ጳውሎሲ ኤሬሶና ጨማታ ዞሪስ

17 ጳውሎሲ ሚሊዌጅ ኤሬሶና ኪቲዲ ዎሳ ኬሳ ጨማታ ዩጊሲስ። 18 ዎሳ ኬሳ ጨማቲ ኢያኮ ዩን፣ ኤንታኮ ሃይሳዳ

ያጊስ፡ «ታኒ ኢሲያ ጌሊዳ ኮይሮ ጋላሳፔ ዶሚዳ ሂንቴራ ዴዲዳ ዎዴ ኡባን ዋና ዴዲዳኮ ሂንቴ ኤሬታ።¹⁹ አይሁዴቲ ዱላቲዲ ታ ቦላ ሜቶ ጋሲኮካ ታኒ አሽኬቴላኒኔ ዳሮ አፉላን ጎዳስ አላስ።²⁰ ዳባባንካ ሂንቴ ኬላን ኬላን ሂንቴና ታማርሲሼ ሂንቴና ማዲያባፔ ኢሲባካ ፓጩሳቢኬ።²¹ ታኒ አይሁዴታሲኒ አይሁዴ ጊዶናይሳታስ ናጋራፔ ያሳኮ ሲማና ሜላኔ ኑ ጎዳ ዩሱሳ አማናና ሜላ ማርካታስ።

²² «ያን ታና አይቢ ጋካኔኮ ኤሪኬ፥ ሺን ሃዲ ታኒ ጌሻ አያናስ ኪቴታዳ ዩሩሳላሜ ባይስ።²³ ጌሻ አያናይ ቃሾይኔ ዋዩይ ታና ናጌይሳ ካታማ ኡባን ታው ማርካቲስ።²⁴ ሺን ታ ዎላ ፖላናውኔ ጎዳ ዩሱስ ኪሪስቶሳፔ ኤኪዳ አሱዋ፥ ያሳ አጾ ኬሃቴሳ ዎንጌላ ማርካቴይሳ ፖላናው ታ ሼምፒው ፓሶናባዳ ቆዳይስ።

²⁵ «ታኒ ሃዲካ ያሳ ካዎቴሳ ማርካታሼ ሂንቴ ኡባ ጊዶን ዩያስ። ሂዛፔ ጉዩ ሂንቴፌ አኒካ ታና ቤያናይሳ ኤራይስ።²⁶ ሄሳ ጊሾ፥ ሂንቴፌ ኢሲ ኡራይ ዳዩኮካ ታ አይሼቶናይሳ ሃቺ ሂንቴው ጌሻዳ አዳይስ።²⁷ አይስ ጊኮ፥ ያሳይ አላናው ቆፒዳባ ኡባ ሂንቴው አይቢባካ አሾና አዳስ።

²⁸ «ባ ናዓ ሱላን ዎዚዳ ያሳ ዎሳ ኬላ ናጊቴ። ጌሻ አያናይ ሂንቴና ሃላቃ አሲዲ ዶሪዳ ወዲያሲኔ ሂንቴ ሁዲያስ ናጌቲቴ።²⁹ ታኒ ቢዳፔ ጉዩ፥ ወዲያስ ቃጴቶና ኢታ ሱዱሜቲ ሂንቴ ጊዶ ጌላናይሳ ታ ኤራይስ።³⁰ አማኔይሳታ ባንታ ጌዶ ካሌላናው ዎርዶ ታማርሲያ አሳቲ ሂንቴ ጊዶፌ ዴንዳና።³¹ ሄሳ ጊሾ፥ ታኒ ሄዡ ላይሲ ቃማኔ ጋላስ አፉላን ሂንቴና ሁዴን ሁዴን ሚንጴሲዳይሳ ቆፒሼ ናጌቲቴ።

³² «ሃዲካ ሂንቴና ሚንላናውኔ ጌሻ አሳራ ላቲሳናው ዳንዳዲያ ያሳሲኔ ኢያ አጾ ኬሃቴሳ ቃላስ ሂንቴና ሃዳራ ኢማይስ።

³³ «ታኒ እፔካ ቢራ ዎይኮ ዎርቃ ዎይኮ አፊላ አሞታቢኬ።³⁴ ታኒ ታ ኩሼን አላዳ ታናኔ ታራ ዴዴይሳታ ኮሺዳባ ማዲዳይሳ ሂንቴ፥ ሂንቴ ሁዴን ኤሬታ።³⁵ ሂንቴ ሃይሳዳ ዳቡሪዲ አሲሼ ዳቡራንቾታ ማዳናይሳኔ ጎዳ ዩሱሲ፥ «ኤኬይሳፌ ኢሜይሲ አንጄቲዳይሳ» ጊዳ ቃላ ሂንቴ ቆፓናው ቤሴይሳ ታኒ ሂንቴና ኡባባን ቤሳስ» ያጊስ።

³⁶ ጳውሎሲ ሄሳ አዲ አንጊዲ ኤንታ ኡባራ ጉልባቲዲ ያሳ ዎሲስ።³⁷ ኤንቲ ኡባይካ ጳውሎሳ ኢዲሚዲ ዩኪዲ ዩሪዶሶና።³⁸ ኢ ዛሪዲ፥ «ታና ቤዔኬታ» ያጊዳ ቃላይ ኤንታ ዳሮ አዛንሲስ። ኤንቲ ማርካቢያ ጋካናው ኢያ ሞይዚዶሶና።

21

ጳውሎሲ ዩሩሳላሜ ቢስ

¹ ኑኒ ኤፌሶና ጨማታፔ ሻኬቲዳ ሜላ ቆሴ ቢዳ። ምንቴሳ ጋላስ ሮዳ ጋኪዲ ያፔ ጳገራ ቢዳ። ² ሲሮፊንቄ ፒኒያ ማርካቤ ዴሚዲ ኢያን ገሊዲ ባናው ዴንዲዳ። ³ ኑኒ ቆጲሮሳ ቤግናው ዳንዳዲያ ሶ ዩዲ፣ ቆጲሮሳ ሃዲሮሳ ባጋ አጊዲ ሶሪያ ቢዳ። ማርካቤይ ባ ጫና ያን ምሳናው ኮዩዳ ጊሾ ዊሮሳ ቢዳ። ⁴ ያን አማኒያ አሳታ ዴሚዲ ኤንታራ ላፑን ጋላስ ኡቲዳ። ጳውሎሲ ዩሩሳላሜ ቦና ሜላ ኤንቲ ኢያው አያናን አዲዶሶና። ⁵ ኑኒ ኤንታራ ኡቲያ ምዴይ ወሪን ኬዩዲ ቢዳ። ኤንቲ ኡባይ ባንታ ማጫሳታራኔ ባንታ ናይታራ ኢሲፌ ካታማፔ ካሬ ኬሲዲ ኑና ሞይዚዶሶና። ኑኒ አባ ዶናን ጉልባቲዲ ያሳ ምሲዳ። ⁶ ሄሳፌ ጉዩ፣ ምሊ ሳሮሲዲ ኑ ማርካቤያን ገሊዳ፤ ኤንቲ ባንታ ሶ ሲሚዶሶና።

⁷ ኑኒ አባ አጊያ አንጊዲ፣ ዊሮሳፔ ጳጌሌማይሳ ጋኪዳ። ያን አማኒያ አሳታ ሳሮሲዲ፣ ኤንታ ማታን ኢሲ ጋላስ ፔዲዳ። ⁸ ምንቴሳ ጋላስ ኬዩዲ፣ ቂሳሪያ ቢዳ። ሳባኪያ ፊልጳሳ ሶ ጋኪዲ ኢያ ማታን ኡቲዳ። ኢ ዩሩሳላሜን ካሴ ዶሬቲዳ ሳፑናታፔ ኢሱዋ። ⁹ ፊልጳሳስ ናቤ ጊዲዳ አይዱ ገላያ ናይቲ ዴዎሶና።

¹⁰ ኑኒ ኡንዴና ጋላስ ያን ኡቲዲ ዴዲሺን አጋቦሳ ጊያ ናቤይ ዩሁዳፔ ቂሳሪያ ዩስ። ¹¹ ኑኮ ዩዲ ጳውሎሳ ሳቂያ ኤኪዲ ባ ኩሺያኔ ባ ቶሁዋ ቃቺዲ፣ «ጌሻ አያናይ ሃ ሳቂያ ጎዳ፣ ዩሩሳላሜን አይሁዴቲ ሃይሳዳ ቃቺዲ፣ አይሁዴ ጊዶና አሳስ አሲዲ ኢማና ያጌስ» ያጊስ።

¹² ኑኒ ሄሳ ሲዲዳ ምዴ ኑኔ ያን ዴዲያ አሳቲ ጳውሎሲ ዩሩሳላሜ ቦና ሜላ ምሲዳ። ¹³ ሺን ጳውሎሲ ዛሪዲ፣ «ሂንቱ ሃይሳዳ ዩኪሼ አይስ ታ ምዛና ሹጊሴቲ? ታኒ፣ ጎዳ ዩሱሳ ሱንሳ ጊሾ ቃሹቴሳ ግላላ ጊዶናሺን ዩሩሳላሜን ሃይቃናዉካ ጊጌታስ» ያጊስ።

¹⁴ ኑ ዞሪያ ኢ ኤኮና ኢዲን፣ «ጎዳ ሼኔይ ሃኖ» ያጊዲ ሲዲ ጊዳ።

¹⁵ ያን ጉሳ ምዴ ጋምዲዳፔ ጉዩ ጊጌቲዲ ዩሩሳላሜ ባናው ኬዩዳ። ¹⁶ ቂሳሪያን ዴዲያ አማኒያ አሳታፔ ጉሳቲ ኑራ ቢዶሶና። ኤንቲ ኑኒ ሺምፓናሱዋ ሚናሶና ጊያ ቆጲሮሳ አዲያ ሶ ኤፊዶሶና። ሚናሶኒ ኮይሮ አማኒዳ አሳፔ ኢሱዋ።

ጳውሎሲ ዩሩሳላሜ ጋኪስ

17 ኑኒ ዩሩሳላሜ ጋኪዳ ዎዴ አማኒያ አሳቲ ኑና ኡፋይሳን ሞኪዶሶና። 18 ዎንቴሳ ጋላስ ጳውሎሲኔ ኑኒ ያይቆባራ ጋሄታናው ቢዳ። ዎሳ ኬሳ ጪማቲ ኡባቲካ ያን ዴዎሶና። 19 ጳውሎሲ ኤንታ ሳሮሲዳፔ ጉዩ አይሁዴ ጊዶና አሳ ጊዶን ባ ባጋራ ያሳይ ኦሲዳባ ኡባ ኤንታው አዲስ።

20 ኤንቲ ሄሳ ሲዲዳ ዎዴ ያሳ ጋላቲዲ ጳውሎሳኮ ሃይሳዳ ያጊዶሶና፡ «ኑ ኢሻው፥ አይሁዴታ ጊዶን አፑን ሙኩላቲ ያሳ አማኒዳኮ ኔ ቤዓሳ፤ ኤንቲ ኡባይካ ሂጊያ ሚንሱ ናንሶና። 21 ኔኒ አይሁዴ ጊዶናይሳታ ቢታን ዴዲያ አይሁዴ ኡባይ ባንታ ናይታ ቃዖሮና ሜላ፥ አይሁዴታ ዎጋ ካሎና ሜላኔ ሙሴ ሂጊያ ኢፃና ሜላ ኔኒ ታማርሴይሳ ዩሩሳላሜን ዴዲያ አይሁዴቲ ሲዲዶሶና። 22 ያቲን አይቢ ሎዎ? ኔኒ ዩዳይሳ ዳሮቲ ሲዓና።

23 «ሄሳ ጊሾ፥ ኑኒ ኔው አዴይሳ ሲዓ፤ ጋሶይ ዴዲያ አይዱ አሳቲ ኑ ማታን ዴዎሶና። 24 ኤንታ ኤካዳ ኤንታራ ጌያ፤ ቃሲ ኤንቲ ባንታ ሁዲያ ሜዴታና ሜላ ኤንታው ሚሼ ኢማ። ኤንቲ ካሴ ኔባ ሲዲዳይሲ ቱማ ጊዶናይሳኔ ኔኒ ኔ ሁዔንካ ሂጊ ናጊያ አሲ ጊዴይሳ ኡባይ ኡራና።

25 «ሺን አማኒዳ አይሁዴ ጊዶና አሳታ ጊዲኮ፥ ኤንቲ ኤቃስ ያርሹቲዳባ ሞና ሜላ፥ ሱሱ ኡዮና ሜላ፥ ባወታ ሞና ሜላኔ ላይማቶና ሜላ፥ ኑኒ አዳ ቃቺዲ፥ ኤንታው ዳብዳቤ ፃፊዳ» ያጊዶሶና።

26 ሄሳፌ ጉዩ፥ ጳውሎሲ ዎንቴሳ ጋላስ አሳታ ኤኪዲ፥ ኤንታራ ጌዩስ። ኢ ባንታ ጌያ ጋላሳይ አዉዴ ፖሎቲያኮ ኤሪሳናው ባንታ ያርሹዋ አዉዴ ያርሻኔኮ ኤሪሳናው ያሳ ኬሲ ጌሊስ።

ጳውሎሲ አይኬቲስ

27 ላፑን ጋላሳይ ዉራና ሃኒሺን፥ ኢሲያፔ ዩዳ አይሁዴቲ ያሳ ኬሳን ጳውሎሳ ቤዲዲ፥ አሳ ኡባ ዴንፎሲዲ ጳውሎሳ አይኪዶሶና። 28 «ኢስራዔሌ አሳው፥ ኑና ማዲቲ፤ ሃ ኡራይ፥ ኑ ዴሪያ፥ ኑ ሂጊያኔ ሃ ያሳ ኬሳ ኢፃና ሜላ አሳ ኡባ ታማርሴስ። ሄሲካ ጊዶና ኢፃን አይሁዴ ጊዶናይሳታ ያሳ ኬሲ ጌልሲዲ፥ ሃ ጌሻ ቤሳ ቱኒሲስ» ያጊዲ ዋሲዶሶና። 29 ኤንቲ ሄሳ ጊዳይ ካሴ ኤፌሶና ጊሮሬሞሳ ጳውሎሳራ ካታማን ቤዲዳ ጊሾ ሃዲ ጳውሎሲ ያሳ ኬሲ ኢያ ኤኪ ጌሊዳባ ኤንታው ዳኒስ።

30 ካታማ ኡባይ ቡቄቲስ፤ አሳ ኡባይ ሺቄዲ ጳውሎሳ አይኪዲ ያሳ ኬሳፌ ካሬ ጎቺዶሶና። ያሳ ኬሳ ፔንጌቲ ኤሴሲዲ ጎርዴቲዶሶና። 31 አሳይ ጳውሎሳ ዎዳና ሃኒሺን፥ «ዩሩሳላሜ ካታማይ ኩሜሲ ቡቄቲስ» ጊያ አዳይ ሮሜ ሻላቃኮ ጋኪስ።

32 ሻላቃይ ዎታዳሬታኔ ማቶ ሃላቃታ ኤኪዲ ዎጊሼ ዩስ። አሳይ ሻላቃኔ ዎታዳሬታ ቤዒዳ ዎዴ ጳውሎሳ ዋዴይሳ አጋጊዶሶና።

33 ሄ ዎዴ ሻላቃይ ሺቂዲ፣ ጳውሎሳ አይኪዲ፣ ናምዑ ሳንሳላታን ቃሼታና ሜላ ኪቲስ። ያቲዲ፣ ኢ እኔኮኔ አይ አሲዳኮ አሳ አይቺስ። 34 አሳፔ ባጋይ ኢሲባ ጊዲ ዋሲያ ዎዴ ሃራቲ ሃራባ ጊዲ ዋሴስ። ዋሶይ ዳሪዳ ጊሾ ሻላቃይ ቱማ ሻካንው ዳንዳዔቶና ኢዲን፣ ዎታዳሬቲ ጳውሎሳ ባንታ ዴዲያሶ ኤፋና ሜላ ኪቲስ። 35 ጳውሎሲ ዩዲ ኬያ ዴሳ ጋኪያ ዎዴ አሳ ሱጌሳ ጊሾ ዎታዳሬቲ ኢያ ቶኪዶሶና። 36 ዳሮ አሳይ፣ «ኢ ሃይቆ!» ያጊዲ ዋሲሼ ካሎሶና።

ጳውሎሲ ሞቱዋስ ዛሮ ኢሚስ

37 ዎታዳሬቲ ጳውሎሳ ባንታ ዴዲያሶ-ዋ ጌልሳና ሃኒሺን፣ ጳውሎሲ ሻላቃኮ፣ «ታኒ ኔው ኢሲባ አዶ?» ያጊስ።

ኢ ጳውሎሳኮ፣ «ኔኒ ጊሪኬ ዶና ኤራይ? 38 ኔኒ ሃይሳፌ ሲንሴ ቡቁሲ ሜዲዲ ሼምፖ ዎዲዳ አይዱ ሙኩሉ አሳታ ኤኪዲ ባዞ ጌሊዳ ጊብዔ ኡራ ጊዲኪ?» ያጊስ።

39 ሺን ጳውሎሲ፣ «ታኒ፣ ኪልቂያን ዴዲያ ኤራቲዳ ቴርሴሴ ካታማን ዩሌቲዳ አይሁዴ አሲ። ሃያና ታና አዲሳርኪ?» ያጊስ።

40 ሻላቃይ ኢያኮ፣ «አዳ» ያጊን ጳውሎሲ ዴሳ ቦላ ኤቂዲ፣ አሳይ ሲዒ ጋና ሜላ ባ ኩሺያን ማሊስ። አሳይ ሲዒ ጊን ኢብራይስጵ ዶናን ሃይሳዳ ያጊስ።

22

1 «ታ ኢሻቶ፣ ታ አዋቶ፣ ታኒ ሃዒ ሂንቴው ኢሚያ ዛሩዋ ሲዒቴ።» 2 ጳውሎሲ ኤንታው ኢብራይስጵ ዶናን አዴይሳ ሲዒዲ ካሴይሳፌ አሲዲ ሲዒ ጊዶሶና። ኢ ካሊዲ፣

3 «ታኒ ኪልቂያን ዴዲያ ቴርሴሴን ዩሌታዳ ሃ ካታማን ዲጫስ። ታ አስታማራይካ ጋማሊያሌ፤ ታኒ ኑ አዋታ ሂጊያ ሚንሳ ታማሪዳ፣ ሃቺ ሂንቴ ኡባይ ሃኔይሳዳ ያሳስ ሚሼቲያ አይሁዴ አሲ። 4 ታኒ ሃ አጊያ ካሊያ ማጫታኔ አዴታ አይካዳ ቃሾ ኬሳን ዩጋሼን ኤንታ ዎዲሳና ጋካናው ዋዩ ቤሲዳ አሲ። 5 ሄሳዳካ፣ ካሂኔ ሃላቃይኔ ሻንጎ ኡባይ ታባ ማርካታናው ዳንዳዔስ። ታኒ ዳማስቆን ዴዲያ ኤንታ ኢሻታስ ኤንታፌ ዳብዳቤ ኤካዳ ያን ዴዲያ አሳቲ ቃሼቲዲ ሴሬታና ሜላ ዩሩሳላሜ ኤንታ ኤሃናው ያ ባስ።

6 «ታኒ ባዳ ዳማስቆ ማቲዳ ዎዴ ሴታ ጋላስ ቆፖና ሳሎፔ ጊታ ፖዎይ ታ ዩቸዋን ፖሊስ። 7 ታኒ ሳዓን ኩንዳ ዴሲሺን፣ <ሳዎላ፣ ሳዎላ፣ ታና አይስ ጎዳይ?> ጊያ ቃላ ሲዓስ። 8 ታኒ ዛራዳ፣ <ጎዳው፣ ነኒ አኔ?> ያጋስ።

ኢ ዛራዳ፣ <ታኒ፣ ነኒ ጎዳያ ናዚሬቴ ዩሱሳ?> ያጊስ። 9 ታራ ዴዴይሳቲ ፖዑዋ ቤሲዶሶናፔ አቲን ታው አዴይሳ ቃላ አኬኪቦኮና።

10 «ታኒ፣ <ጎዳው፣ ታ አይ አሶ?> ያጋስ።

«ጎዳይ ታኮ፣ <ዴንዳዳ ዳማስቆ ባ፣ ነኒ አላና ሜላ ዎሳይ ቆፒዳባ ኡባይ ያን ኔው አዴታና?> ያጊስ። 11 ሄ ዎልቃማ ፖዑዋ ጋስን ታ አይሬይ ቆቂን፣ ታራ ዴሲያ አሳቲ ታ ኩሺያ አይኪዳ፣ ታና ጎቺን ዳማስቆ ጋካስ።

12 «ዳማስቆን ዴሲያ አይሁዴ ኡባይ ዳር ቦንቺያ ኢሲ ሃናኒያ ጊያ አዴይ፣ ኑ ሂጊያ ቦንቺይሲኔ ዎሳ ሚንሲ ዎሴይሲ ዴዴስ። 13 ሃናኒይ ታኮ ዩዳ፣ ታ ማታን ኤቂዳ፣ <ታ ኢሻው ሳዎላ፣ ዩላ?> ያጊስ። ኤሌሳዳ ታኒ ኢያ ዩላ አጋስ።

14 «ኢ ታኮ፣ <ኑ አዋታ ዎሳይ ነኒ ኢያ ሽኒያ ኤራና ሜላ፣ ኢያ ዒሎ ናዓ ቤዓና ሜላኔ ኢያ ዶናፔ ቃላ ሲዓና ሜላ ካሴቲዳ ኔና ዶሪስ። 15 ነኒ ቤሲዳባኔ ሲሲዳባ አሳ ኡባ ሲንሳን ኢያው ማርካታና። 16 ሃሲ አይስ ጋምዓይ? ዴንዳዳ ዓማቂታ፣ ኢያ ሱንሳ ዩጋዳ ኔ ናጋራፔ ሜጩታ?> ያጊስ።

17 «ታኒ ጉዩ ዩሩሳሌሜ ሲማዳ ዎሳ ኬሳን ዎሲሺን፣ ታው ቆንጩሲ ቤንቲስ። 18 ቆንጩሳን ጎዳይ ታኮ፣ <ኔ ታው ማርካቲያ ማርካቴሳ አሳይ ኤኮና ጊሾ ኤሌሳዳ ዩሩሳሌሜ ኬያ?> ያጊሺን ቤዓስ።

19 «ታኒ፣ <ጎዳው፣ አይሁዴ ዎሳ ኬሳ ኡባን ኔና አማኔይሳታ አይካዳ ዎዲዳይሳኔ ቃሾ ኬሳን ዩጊዳይሳ ኤንቲ ኤሮሶና። 20 ኤንቲ ኔ ማርካ ኢስባፋኖሴ ዎዲያ ዎዴ ታኒ ሄ አዳን ኢሲፋስ። ቃሲ ኤንታ ማታን ኤቃዳ ኢያ ዎዴይሳታ ማዑዋ ናጋይስ?> ያጊስ።

21 «ጎዳይ ታኮ፣ <ታኒ ኔና አይሁዴ ጊዶና አሳኮ ሃሆሶ ኪቲያ ጊሾ ዴንዳዳ ባ?> ያጊስ።

ጳውሎሲ ሮሜ አሲ ጊዴይሳ ቆንጩሲስ

22 ጳውሎሲ ሄ ቃላ አዲዲ አንጋና ጋካናው አሳይ ኢ ጌይሳ ሲዎሶና። ሄሳፌ ጉዩ፣ ባንታ ቃላ ዶቁ አሲዳ፣ «ሃይሳ ቢታፌ ዳይሳ! ኢ ዳናው ቤሴና» ያጊዶሶና።

23 ኤንቲ ዎጫሚሺን፣ ባንታ ማዑዋ ቦላ ሆሊሺኒኔ ባና ቦላ ላሊሺን፤ 24 ሻላቃይ ቤሲዳ ዎታዳሬቲ ጳውሎሳ ባንታ ዴሲያሱዋ

ኤፋና ሜላ ኪቲስ። ቃሲ አሳይ አይስ ሄሳዳ ዎጫሚዳኮ ኤራናው ኮዬዲ ጳውሎሳ ሊሶን ጋራሬዲ ፒልጋና ሜላ ኤንታ ኪቲስ።
25 ሺን ዎታዳሬቲ ጳውሎሳ ዳፎን ሚንሲ ቃቺዲ ጋራፋና ሃኒያ ዎዴ ጳውሎሲ ባ ማታን ኤቂዳ ማቶ ሃላቃኮ። «ሮሜ አሲ * ፒርዲ ባይና ጋራሬይሲ ሂንቴው ዎጌ?» ያጊስ።

26 ማቶ ሃላቃይ ሄሳ ሲዲዳ ዎዴ ሻላቃኮ ቢዲ። «ሃ አዴይ ሮሜ አሲ። ኔኒ አይ አሳናው ቆፓይ?» ያጊዲ አይቺስ።

27 ሻላቃይ ጳውሎሳኮ ሺቂዲ። «ኔኒ ሮሜ አሴ? አኔ ታው አዳ» ያጊስ።

ጳውሎሲ። «ኤ» ያጊስ።

28 ሻላቃይ ዛሪዲ። «ታኒ ሃ ጋዴቴላ ዳሮ ሚሼን ሻማስ» ያጊስ።

ሺን ጳውሎሲ። «ታ ሃ ጋዴቴላ ዩሌቴላን ዴማ ኤካስ» ያጊስ።

29 ሄሳ ጊሾ። ጳውሎሳ ፒልጋናው ቆፒዳይሳቲ ኢራ ኢያፕ ሻኬቲዶሶና። ሻላቃይ ሮሜ አሲ ሳንላላታን ቃቺዳይሳ ኤሪዳ ዎዴ ያዩስ።

ጳውሎሲ አይሁዴ ሻንን ሲንሴ ሺቂስ

30 ዎንቴላ ጋላስ ሻላቃይ። አይሁዴቲ ጳውሎሳ አይስ ሞቲዳኮ ጊሼ ኤራናው ኮዩስ። ካሂኔ ሃላቃቲኔ ሻንን ኡባይ ሺቃና ሜላ ኪቲስ፤ ቃሲ ጳውሎሳ ቃሾፕ ቢሊሲዲ ኤንታ ሲንላን ኤሲስ።

23

1 ጳውሎሲ ሺቂዋ ጫዲ ጸሊዲ። «ታ ኢሻቶ። ታኒ ሃቺ ጋካናው ዶሳ ሲንላን ታ ዴዎ ኡባን ሎዎ ዎዛናን ዴዓስ» ያጊስ።

2 ካሂኔ ሃላቃይ ሃናኔይ። ጳውሎሳ ዶናን ባቃና ሜላ ኢያ ማታን ኤቂዳይሳታ ኪቲስ። 3 ሄ ዎዴ ጳውሎሲ ኢያኮ። «ሳ ኔ ቦቂንቴ ቲዩዳ ጎዳ ዳኔይሶ። ዶሳይ ኔና ባቃና። ኔኒ ታ ቦላ ሂጊያሳ ፒርዳናው ኡታዳ ዴዓሽ ሂጊይ ባይና ታና ባቃና ሜላ ኪታይ?» ያጊስ።

4 ጳውሎሳ ማታን ኤቂዳይሳቲ ኢያኮ። «ኔ ዶሳ ካሂኔ ሃላቃ ጫያይ?» ያጊዶሶና።

5 ጳውሎሲ። «ታ ኢሻቶ። ኢ ካሂኔ ሃላቃ ጊዲዳይሳ ታኒ ኤራቢኬ፤ አይስ ጊኮ ዶሳ ቃላን። (ኔ ዴሪያ አይሴይሳ ቦላ ኢታ ቃሳ ሃሳዮፓ) ጌቴቲ ዓፌቲስ» ያጊስ።

6 ሺን ጳውሎሲ ሄ ቤሳን ዴዲያ አሳፕ ባጋቲ ሳዱቃዌታ። ባጋቲ ፋሪሳዌታ ጊዴይሳ ቤዲዲ። «ታ ኢሻቶ። ታኒ ፋሪሳዌኔ

* 22:25 ሮሜ አሲ፡ 16:37 ጸሊቴ። 23:3 ማቶ 23:27-28 23:5 ኪሳ 22:28

ፋሪሳዊ ናዓ፤ <ሃይቂዳይሳቲ ሃይቆፔ ዴንዳና> ጋዳ ታኒ ኡፋይሳን ናጊያ ጊሾ ኤንቲ ታ ቦላ ፐርዶሶና» ያጊዲ ኦዲስ።

7 ጳውሎሲ ሄሳ ጊዳ ዎዴ ፋሪሳዊታ ጊዶኒኔ ሳዱቃዊታ ጊዶን አሺ ኬዬን ሻኬቲዶሶና። 8 አይስ ጊኮ፣ ሳዱቃዊቲ፣ «ሃይቂዳ አሲ ዴንዴና፤ ኪታንቾይካ አያኒካ ባዋ» ያንሶና። ሺን ፋሪሳዊቲ ናምዓይካ ዴዔይሳ አማኖሶና። 9 ጊታ ካቺ ኬዬስ፤ ፋሪሳዊታ ባጋ ጊዲዳ ሂጌ አስታማሬቲ ዴንዲ ኤቂዲ፣ «ሃ ኡራ ቦላ አይቢ ባላካ ዴሚቦኮ፤ ኢያው አያኒ ዎይኮ ኪታንቾይ ሃሳዮና አጌና» ያጊዲ ፓላሚዶሶና።

10 አሻይ ዳሪን አሳይ ጳውሎሳ ሻቂሬሶና ሜላ ጊዲ፣ ሻላቃይ ባ ዎታዳሬቲ ዎዲዲ ኤንታ ጊዶሬ ኢያ ኤሌሲ ኬሲዲ ባንታ ዴዒያሱዋ ኤፋና ሜላ ኪቲስ።

11 ሄ ቃማ ንዳይ ጳውሎሳ ማታን ኤቂዲ፣ «ጳውሎሳ፣ ኔኒ ታው ዩሩሳላሜን ማርካቲዳይሳዳ ሮሜንካ ማርካታናው ቤሴስ፤ ሚና፤ አይኮይ ባዋ» ያጊስ።

ጳውሎሳ ዎዳናው ማቂቲዶሶና

12 ዎንቴሳ ጋላስ አይሁዴቲ፣ «ጳውሎሳ ዎዶና ዴዒሼ ሞኮ ኡዮኮ» ጊዲ ጫቂዶሶና። 13 ጳውሎሳ ቦላ ሄሳ ማቂቲዳ አሳቲ አይታማፔ ዳርሶና። 14 ኤንቲ ካሂኔ ሃላቃታኮኔ ዴሪያ ጩማታኮ ቢዲ፣ «ኩኒ ጳውሎሳ ዎዶና ዴዒሼ ካሲ ጊያባ ሞኮ ጊዲ ጫቂዳ። 15 ሂዛ፣ ሂንቴኔ ሻንጎይ ኢያባ ጌሺዲ ፐልጊያባይ ዴዒያ ዳኒሲዲ፣ ጳውሎሳ ሂንቴኮ ኤሃና ሜላ ሻላቃ አይቺቴ። ኩኒ ኢ ሃ ሺቁዋ ጋካናፔ ሲንሴ ኢያ ዎዳናው ጊጊዲ ኡቲዳ» ያጊዶሶና።

16 ሺን ጳውሎሳ ሚቼ ናዓይ ሄ ማቁዋ ሲዒዳ ዎዴ ቢዲ ዎታዳሬቲ ዴዒያሱዋ ጌሲዲ፣ ጳውሎሳስ ኦዲስ። 17 ጳውሎሲ ማቶ ሃላቃታፔ ኢሱዋ ዩጊዲ፣ «ሃ ናዓይ ሻላቃስ ኦዲያባይ ዴዒያ ጊሾ ኢያ ሻላቃኮ ኤፋ» ያጊስ።

18 ማቶ ሃላቃይ ናዓ ሻላቃኮ ኤፊዲ፣ «ቃሾ ኬሳን ዴዒያ ጳውሎሲ ታና ባኮ ዩጊዲ፣ ሃ ናዓይ ኔው ኦዲያባይ ዴዒያ ጊሾ ኢያ ኔኮ ኤሃና ሜላ ታና ዎሲስ» ያጊስ።

19 ሻላቃይ ናዓ ኩሺያ አይኪዲ፣ ዱማ ካሬ ኬሲዲ፣ «ኔኒ ታው አዳናባይ አይቤ?» ያጊዲ አይቺስ።

20 ናዓይ ሻላቃኮ፣ «አይሁዴቲ ጳውሎሳባ ካሴፔ ሚንሲ ፐልጋናው ኮዩዳባ ዳኒሲዲ ኔኒ ዎንቶ ኢያ ሺቁዋ ኤሃና ሜላ ኔና ዎሳናው ዞሬታ ቃቺዶሶና። 21 ሺን ኔኒ ኤንቲ ጊያባ ሲያፓ። አይስ ጊኮ፣ አይታማፔ ዳሪያ አሳቲ ጳውሎሳ ዎዶና ዴዒሼ <ካሲ

23:6 ሃ.አ 26:5፤ ፊል 3:5 23:8 ማቶ 22:23፤ ማር 12:18፤ ሉቃ 20:27

ሞኮ፣ ሃሴ ኡዮኮ፣ ጊዲ ጫቂዲ፣ ቆሴቲዲ ኢያ ናጎሶና። ሃዲ ኔ ጊያባ ሃላላ ሲጎናው ናጎሶና» ያጊስ።

22 ሻላቃይ ዛሪዲ፣ «ሃ ኦዳ ኔ ታው አዲዳይሳ ሃራ አዴስካ አዶፓ» ያጊዲ ናዓ ጉዬ ዩዲስ።

ጳውሎሲ ዴሪያ አይሲያ ፊልኪሳ ሲንሴ ሺቂስ

23 ሻላቃይ ማቶ ሃላቃታፕ ናምዓታ ዩጊዲ፣ «ቃማሬ ሄዥ ሳቴን ቂሳሪያ ባናው፣ ናምዑ ዩቱ ዎታዳሬታ፣ ሳፕን ታው ፓራ አሳታኔ ናምዑ ዩቱ ቶራንቾታ ጊጊሲቴ። 24 ዴሪያ አይሲያ ፊልኪሳኮ ጳውሎሳ ሳሮ ጋሳናው ቶጋ ሜሄ ጊጊሲቴ» ያጊዲ ኤንታ ኪቲስ።

25 ሻላቃይ ፊልኪሳስ ሃይሳዳ ጊያ ዳብዳቤ ሃፊስ።

26 «ቃላዲዮሳ ሉሲዮሳፕ ዴሪያ አይሲያ ቦንቾ ፊልኪሳስ፣ ሳሮይ ኔው ጊዶ። 27 አይሁዴቲ ሃ ኡራ አይኪዲ ዎዳና ሃኒሺን፣ ኢ ሮሜ ቢታ አሲ ጊዶይሳ ኤራዳ ዎታዳሬታራ ጋካዳ ኢያ አሻስ።

28 ኤንቲ ኢያ አይስ ሞቲያኮ ኤራናው ኮያዳ ኤንታ ሺቂቀን ኢያ ሺሻስ። 29 ኤንቲ ባንታ ሂጊያስ ኢያ ሞቲዳይሳሬ አቲን ኢያ ዎዲሲያባ ዎይኮ ቃሺሲያባ ጊዶናይሳ ታ ዴማስ። 30 ኤንቲ ሃ ኡራ ቦላ ማቂቲዳ ዘጊርሳይ ታና ጋኪን፣ ታኒ ኤሴሳዳ ኢያ ኔኮ ዩዳስ። ኢያ ሞቲይሳቲ ኔ ሲንሳን ቢዲ ሞታና ሜላ ኪታስ» ያጊስ።

31 ሄሳ ጊሾ፣ ዎታዳሬቲ ኪቲቲዳይሳዳ ጳውሎሳ ኤኪዲ፣ ቃማ አንቲጳጊሪሳ ጋሲዶሶና። 32 ዎንቴሳ ጋላስ ፓራ አሳቲ ኢያራ ባና ሜላ አሲዲ ቶሆ አሳቲ ጉዬ ሲሚዶሶና። 33 ቶጋይ ቂሳሪያ ጋኪዲ ዳብዳቤያ ዴሪያ አይሴይሳስ ኢሚዲ፣ ጳውሎሳ ኢያ ሲንሴ አሲዶሶና። 34 ዴሪያ አይሴይሲ ዳብዳቤያ ናባቢዳፕ ጉዬ «ጳውሎሳ፣ ኔ አው አውራጃ አሴ?» ጊዲ ኢያ አይቺስ። ኢ ኪልቂያ አሲ ጊዶይሳ ኤሪዳ ዎዴ 35 «ታኒ ኔባ ኔና ሞቲይሳቲ ያ ዎዴ ሲጎና» ያጊስ። ዎታዳሬቲ ጳውሎሳ ሄሮዲሳ ኪሳን ናጋና ሜላ ኪቲስ።

24

ጳውሎሳ አይሁዴቲ ሞቲዶሶና

1 ኢቻሹ ጋላሳፕ ጉዬ ካሂኔ ሃላቃይ፣ ሃናኔይ፣ ጨማታራኔ ዩርዌሉሳ ጊያ ኢሲ ሃባቃራ ቂሳሪያ ቢስ። ኤንቲ ዴሪያ አይሴይሳ ቦላ ጳውሎሳ ሞቲዶሶና። 2 ጳውሎሲ ዩጌቲዲ ጌሊዳ ዎዴ ዩርዌሉሲ ኢያ ሃይሳዳ ያጊዲ ሞቲስ።

«ቦንቾ ፊልኪሳ፣ ኑኒ ኔ ባጋራ ዳሮ ሳሮቴሳ ዴሚዳ፣ ኔ ሎዎ አይሱዋን ኑ ቢታይ ዳሮ ሳሜቲስ። 3 ቦንቾ ፊልኪሳ፣ ኑኒ አዉንካ አዉዴ ጊዲን ዳሮ ጋላታን ሄሳ ኤኮስ። 4 ታኒ ኔና ጋምዲሶናሺን

ኔኒ ኔ ከሃቴሳን ኑባ ቃንሳን ሲጻፍ ሜላ ኔና ዎሳይስ። ⁵ ሃ ኡራይ ዱቤ ጊዲዲ ቢታ ኡባን ዴጊያ አይሁዴታ ጊዶን ቡቁሲ ሜዲዲ ናዚራዌታ ባጋ አሳ ካሌሴይሳ ጊዶይሳ ኤሪዳ። ⁶ ሃሪ አቶሺን፣ ዎሳ ኪሳ ቱኒሳና ሃኒሺን ኑኒ ኢያ አይኪዳ፤ ኑ ሂጊያዳ ኢያ ቦላ ፐርዳናው ቆፐዳ። ⁷ ሺን ሻላቃ ሉሲዮሲ ዩዲ፣ ዎልቃን ኑ ኩሼፕ ኢያ ዎሲ ኤኪስ። ⁸ ኢያ ሞቴይሳቲካ ኔኮ ያና ሜላ ኪቲስ። ኔኒ ኔ ሁዔን ሃ ኡራ ፐልጋዳ ኑኒ ኢያ ሞቲያ ሞቴዋ ኡባ ኤራናው ዳንዳግሳ» ያጊስ።

⁹ አይሁዴቲካ፣ «ሃ አዳይ ቱማ» ጊዲ ኢያ ቆፋ ማጊዶሶና።

ጳውሎሲ ሞቴዎስ ዛሮ ኢሚስ

¹⁰ ዴሪያ አይሴይሲ ጳውሎሳ አዳ ጊዲ ማሊስ። ጳውሎሲ ሃይሳዳ ጊዲ ዛሪስ፡ «ኔኒ ዳሮ ዎዴፕ ዶማዳ፣ ሃ አሳስ ፐርዳሽ ዴዴይሳ ኤራዳ ታ አዳስ ኡፋይሳን ዛሮ ኢማይስ። ¹¹ ታኒ ጎይናናው ዩሩሳላሜ ከዩን ታማኔ ናምቡ ጋላሳፕ አዶናይሳ ኔኒ ኔ ሁዔን ኤራናው ዳንዳግሳ። ¹² አይሁዴቲ ታና ዎሳ ኪሳን ጊዲን አይሁዴ ዎሳ ኪሳን ጊዲን ካታማን ጊዲን አዴራካ ፓላሚሺን ዎይኮ አሴ ሺሻዳ ማቂሺን ኢሲ አሲካ ዴሚቤና። ¹³ ሃጊካ ኤንቲ ታና ሞቴያባስ ማርካ ዴማናው ዳንዳግሳ።

¹⁴ «ሺን ታኒ ኢሲባ አማናይስ፤ ታኒ ሂንን ዴጊያባኔ ናቤቲ ሃፊዳ ኡባባ አማናዳ፣ ኑ አዋታ ዎሳ፣ ኤንቲ ዎርዶ ጊያ አጊያን ጎይናይስ። ¹⁵ ኤንቲ ባንታ ሁዔን አማኔይሳ ሜላ ሂሎቲኔ ናጋራንቾቲ ሃይቆፕ ዴንዳናይሳ ታካ አማናይስ። ¹⁶ ሄሳ ጊሾ፣ ታኒ ዎሳ ሲንሳኒኔ አሳ ሲንሳን ኡባ ዎዴ ሎዎ ካሂ ታው ዳና ሜላ ሚናይስ።

¹⁷ «ታኒ ዩሩሳላሜፕ ከዮሳፕ ዳሮ ላይሳፌ ጉዩ ታ ቢታ ማንቆታስ ማዴ ኢማናዉኔ ያርሾ ያርሻናው ዩሩሳላሜ ባስ።

¹⁸ ታኒ ዎሳ ኪሳን ሄሳ አሳዳ ጊሻ ዎጋ ፖላ ሲሚን ታና ዴሚዶሶና። ሄ ዎዴ ታራ አሲ ባዋ፣ አሺካ ከዩቤና። ¹⁹ ሺን ኢሲያፕ ዩዳ ኢሲ ኢሲ አይሁዴቲ ያን ዴዎሶና፤ ኤንቲ ታ ቦላ አዳ ኮይኮ ዩዲ ታና ኔ ቦላ ሞታናው ዳንዳግሳ። ²⁰ ዎይኮ ታኒ ሻንጉዋ ሲንሴ ሺቂዳ ዎዴ አሲዳ ባሊ ዴጊኮ ሃይሳቲ ኔ ሲንሳን ዴዴይሳቲ አዶና። ²¹ ታኒ ኤንታ ጊዶን ኤቃዳ፣ (ሃይቂዳይሳቲ ዴንዳና ጋዳ ዋሳዳ አዲዳ ጊሾ ሃቺ ሂንቴ ሲንሳን ታ ቦላ ፐርዶሶና) ጋስ፤ ሄሳፌ ሃራባ አሳቢኬ» ያጊስ።

²² ሺን ፊልኪሲ ዎሳ አጊያባ ጌሺ ኤሪዳ ጊሾ «ታኒ ሂንቴ አዳ ሻላቃ ሉሲዮሲ ያ ዎዴ ፐርዳና» ያጊዲ ሞይዚስ። ²³ ፊልኪሲ

ቃሲ ጳውሎስ ቃቾና ናጋና ሜላኔ ኢያ ዳቦታፔ አኒካ ኢያ አይቻናው ዩሺን ዲጎና ሜላ ማቶ ሃላቃስ አዲስ።

ጳውሎሲ ፊልኪሳ ሲንፎኔ ዲሩሲላ ሲንፎ ሺቂስ

24 ጉሳ ጋላሳፔ ጉዩ፥ ፊልኪሲ አይሁዴ ባጋ ጊዲዳ ባ ማቼ ዲሩሲላራ ዩዲ ጳውሎስ ኪቲ ኤሂሲዲ ዩሱስ ኪሪስቶስን አማኖባ ኢያፔ ሲዲስ። 25 ጳውሎሲ ያሎቴሳባ፥ ባ ሁዔ ሃሮባኔ ያናው ዴዲያ ፐርዳባ አዲሺን፥ ፊልኪሲ ያዩዲ፥ «ኔኒ ሃዲስ ባ፤ ታው ኢንጄቲዳ ዎዴ ኔና ያጊሳና» ያጊስ። 26 ሄ ዎዴ ጳውሎስፔ ጉቦ ኤካናው ቆፐዲ ኢያ ዛሪ ዛሪ ያጊሲዲ ኢያራ አዴቴስ።

27 ናምቡ ላይሳፌ ጉዩ፥ ፊልኪሳ ቤሳ ጳርቂዮስ ፊስዎሲ ኤኪስ። ፊልኪሲ አይሁዴታ ኡፋይሳናው ኮዩዲ ጳውሎስ ቤሎና አጋጊስ።

25

ጳውሎሲ ሮሜ ካዉዋስ አቤት ጊስ

1 ፊስዎሲ ካዎቲዳ ሄቩ ጋላሳፔ ጉዩ ቂሳሪያፔ ዩሩሳላሜ ቤስ። 2 ያን ካሂኔ ሃላቃቲኔ አይሁዴታ ካሌጴይሳቲ ጳውሎስ ሞቲዶሶና። 3 ጳውሎስ ዩሩሳላሜ ኤሂሺን አጊን ቆሴቲዲ ኢያ ዎዳናው ኤንታው ኢንጄታና ሜላ ባንታና ማዶ ጊዲ ፊስዎስ ዎሲዶሶና። 4 ፊስዎሲ ኤንታኮ፥ «ጳውሎሲ፥ ቂሳሪያን ቃሾ ኬሳን ዴዔስ፤ ታኒ ታ ሁዔንካ ኤሌሳዳ ጉዩ ሲማና ሃናይስ። 5 ኢ ባሊዳባይ ዴዲኮ ሂንቴ ጊዶን አዋቴይሳቲ ታራ ቂሳሪያ ቤዲ ኢያ ሞቶና» ያጊዲ ዛሪስ።

6 ፊስዎሲ ኤንታ ማታን ሆስፔን ዎይኮ ታሙ ጋላሳ ሜላ ጋምዲዳፔ ጉዩ ቂሳሪያ ቤስ። ዎንቴሳ ጋላስ ፐርዳ አይዲያን ኡቲዲ ጳውሎስ ኤሃና ሜላ ኪቲስ። 7 ኢ ዩን ዩሩሳላሜፔ ዩዳ አይሁዴቲ ኢያ ዩሹዋን ኤቂዲ ኤንቲ ላሳናው ዳንዳዎና ዳሮ ዴዎ ሞቶ ኢያ ቦላ ሺሺዶሶና። 8 ጳውሎሲ ዛሪዲ፥ «ታኒ አይሁዴ ሂጊያ ጊዲን ዎሳ ኬሳ ዎይኮ ሮሜ ካዉዋ ቂሳሬ ናቃቢኬ» ያጊስ።

9 ሺን ፊስዎሲ አይሁዴታ ኡፋይሳናው ኮዩዲ ጳውሎስ፥ «ዩሩሳላሜ ባዳ ሃ ሞቱዋባ ያን ታ ሲንሳን ፐርዴታናው ኮያይ?» ያጊዲ አይቺስ።

10 ሺን ጳውሎሲ፥ «ታኒ ፐርዴታናው ቤሲያ ቂሳሬ ፐርዳ ኬሳን ኤቃ ኪቻስ። ኔኒ ሎይሳ ኤሬይሳዳ ታኒ አይሁዴታ አይቤንካ ናቃቢኬ። 11 ሂዛ፥ ታኒ ናቂዳባይ ዎይኮ ሃይቆስ ጋሲያባ አሲዳባ ጊዲኮ ሃይቆፔ ታና አሻ ጊኬ። ሺን ኤንቲ ታና ሞቲያ ሞቶይ ሎ ጊዳፔ ጉዩ አኒካ ታና ኤንታው አሲ ኢማናው ዳንዳዔና። ቂሳሬይ ታባ ፐርዶ ጋዳ አይቻይስ» ያጊስ።

12 ሄ ዎዴ ፊስቦሲ ባ ዙሪንቾታራ ዙሬቲዲ፥ «ኔኒ ቁሳሬይ ታባ ፒርዶ ጋዳ አይቻዳሳ፤ ቁሳሬኮ ባሳ» ያጊዲ ዛሪስ።

ጳውሎሲ አጊርጳ ሲንጴኔ ባርኒቄ ሲንጴ ሺቂስ

13 ጉሳ ጋላሳፔ ጉዬ ካዎይ አጊርጳኔ ባርኒቄይ ፊስቦሳ ሳሮሳናው ቁሳሬያ ቢዶሶና። 14 ያን ኤንቲ ዳሮ ጋላስ ጋምዲን፥ ፊስቦሲ ካዉዋስ ጳውሎሳባ ሃይሳዳ ያጊዲ አዲስ፤ «ፊልኪሲ ቢሎና አጊዲ ቢዳ ኢሲ አዴይ ሃይሳን ዴዴስ። 15 ታኒ ዩሩሳላሜ ቢዳ ዎዴ ካሂኔ ሃላቃቲኔ አይሁዴ ጨማቲ ኢያ ቦላ ፒርዳና ሜላ ታና ዎሲዲ ኢያባ ታው አዲዶሶና። 16 ታኒ፥ <ሞቴቲዳ ኡራይ ባና ሞቴይሳታ ሲንሳን ኤቂዲ ባ ሞቴዳባስ ዛሮ ኢሞናሺን፥ እና ጊዲኮካ አዲዲ ኢሜቴይሲ ሮሜ ሂጌ ጊዴና> ያጋዳ ኤንታው ዛሪስ።

17 «ሄሳ ጊሾ፥ ኤንቲ ሃይሳን ሺቂዳ ዎዴ ታኒ ጋምዶና ዎንቴላ ጋላስ ፒርዳ ኬላ ጌላዳ ጳውሎሳ ኤሃና ሜላ ኪታስ። 18 ኢያ ሞቴይሳቲ ኢያ ማታን ኤቂዲ፥ ኢታባን ኢያ ሞቶና አጎኮና ጋዳ ታኒ ቆፒዳይሳ ሜላ ኢያ ሞቴቦኮና። 19 ሺን ኤንቲ ባንታ አማናባኔ ጳውሎሲ፥ <ጋፃ ዴዴስ> ጊያ ኢሲ ሃይቂዳ ዩሱሳ ጌቴቲያ አዲያባ አያራ ፓላሞሶና። 20 ሃ አዳይ ታና ሻካናው ሜቲዳ ጊሾ ጳውሎሲ ዩሩሳላሜ ቢዲ፥ ያን ፒርዴታናው ኮያኮ ጋዳ ኢያ አይቻስ። 21 ሺን ጳውሎሲ ባ ኦዳ ቁሳሬይ ቤዳና ጋካናው ቃሾ ኬላን ጋምዳናው አይቺስ። ታኒ ኢያ ቁሳሬኮ ዩዳና ጋካናው ኢ ቃሺታና ሜላ ኪታስ» ያጊስ።

22 ሄሳ ጊሾ፥ አጊርጳ ፊስቦሳኮ፥ «ታኒ ታ ሁዴንካ ሄ ኡራይ ጊያባ ሲዳናው ኮያይስ» ያጊስ።

ፊስቦሲ ኢያኮ፥ «ኔኒ ዎንቶ ኢ ጊያባ ሲዳና» ያጊስ።

23 ዎንቴላ ጋላስ አጊርጳኔ ባርኒቄይ ጊታ ቦንቾን ሻላቃታራኔ ካታማን ዴዲያ ጊታ አሳታራ ዩዲ ፒርዳ ኬላ ጌሊዶሶና። ፊስቦሲ ጳውሎሳ ዩጊሲዲ ኤሂስ። 24 ፊስቦሲ፥ «ካዋው አጊርጳ፥ ሃይሳን ኑራ ዴዲያ አሳው፥ አይሁዴቲ ዩሩሳላሜንካ ሃይሳንካ ዋሲዲ፥ <ኢ ሂዛፔ ጉዬ ጋፃ ዳናው ቤሴና> ያጊዲ፥ ታና ዎሲዳ ኡራ ሃይሳ ቤዴታ። 25 ሺን ኢያ ሃይቆስ ጋሊያባ አይቢባካ ታኒ ዴማቢኬ። ኢ ባ ሁዴን፥ <ቁሳሬይ ታባ ፒርዶ ያጋዳ አይቻይስ> ጊዳ ጊሾ ቁሳሬኮ ኢያ ዩዳናው ቆፋ ቃቻስ። 26 ታኒ ኢያባ ታ ጎዳ ቁሳሬስ ፃፋናው ጊዲያ ጋሶይ አይቢካ ባዋ። ሄሳ ጊሾ፥ ኢያባ ሂንቴ ቤዴኮ ታ ፃፊያባይ ቤንታኔኮ ጋዳ ሂንቴ ሲንጴ ኡባራካ ካዋው፥ አጊርጳ፥ ኔ ሲንጴ ኢያ ኤሃስ። 27 አይስ ጊኮ፥ ቃሺቲዳ አሲ ቦላ ዳይናስ አሊያ ዎዴ ኢ አይስ ሞቴቲዳኮ ቆንጨሶና አጊይሲ ታው ኤያቴሲ ዳኔስ» ያጊስ።

26

ጳውሎሲ አጊርጳ ሲንሳን ዛሪዳ ዛሩዋ

1 አጊርጳ ጳውሎሳኮ፣ «ኔኒ ኔባ አዳናው ዳንዳዓሳ» ያጊስ። ሄ ዎዴ ጳውሎሲ ባ ኩሺያ ዴንሴዲ ሃይሳዳ ያጊስ።

2 «ካዋው፣ አጊርጳ፣ አይሁዴቲ ታና ሞቲዳባስ ዛሮ ኢማናው ሃቺ ኔ ሲንሳን ኤቃሼ ታ ቃዳይ ሎዎ ጋዳ ቆፓይስ። 3 ኔኒ አይሁዴ ዎጋኔ ፓላማ ሎይሳዳ ኤሪያ ጊሾ ታና ሳሌቶና ሲዓና ሜላ ዎሳይስ።

4 «ታኒ ናግቴሳፌ ዶማዳ ታ አሳ ጊዶኒኔ ዩሩሳላሜን ዴዒዳ ታ ዴዑዋ አይሁዴ ኡባይ ኤሮሶና። 5 ታኒ ኮይሮፔ ዶማዳ፣ ኑ አማኖ ሂጊያ ሚንሴዲ ናጊያ ፋሪሳዌታ ያራፔ ጊዴይሳ ኤንቲ ማርካታናው ኮይኮ ኤሮሶና። 6 ሃዲካ ታኒ ያሳይ ኑ አዋታስ ኢማና ጊዳ ኡፋይሳ ናጊያ ጊሾ ሞቴታዳ ሃይሳን ኤቃስ። 7 ቃሲ ታማኔ ናምዑ ኑ አዋታ ሼሻይ ያሳ ቃማኔ ጋላስ ሚንሴዲ ጎይኒሼ ያሳይ ኢማና ጊዳይሳ ኤካናው ኡፋይሳን ናጎሶና። ካዋው አጊርጳ፣ አይሁዴቲ ታና ሞቴይ ታኒ ኡፋይሳን ሄሳ ናጊያ ጊሾሳ።

8 አይሁዴቶ፣ ያሳይ ሃይቁዳይሳታ ዴንሴይሳ አይስ አማኔኬቲ?

9 «ካሴ ታኒ ታ ሁዔንካ ናዘሬቴ ዩሱሳ ሱንሳ ቴቃናው ዳንዳዔቲዳባ ኡባ አሳናው ቤሴስ ጋዳ ቆፓስ። 10 ታኒ ዩሩሳላሜን አሲዳይ ሃይሳ፣ ካሂኔ ሃላቃታፔ ማታ ኤካዳ ያሳ አሳታፔ ዳሮታ ቃሺሳስ። ኤንታ ዎዲያ ዎዴካ ኤንታ ሃይቁዋ ዶሳስ። 11 ዳሮ ዎዴ አይሁዴ ዎሳ ኬሳ ኡባን ኤንቲ ሴሬታና ሜላኔ ዩሱሳ ጫዩዲ ካዳና ሜላ ኡንዔሳስ። ታኒ ዎጊ ባይና ኤንታ ሃንቁታዳ ሃሪ አቶሺን፣ ሃሪ ቢታ ካታማታ ጋካናው ኤንታ ጎዳስ።

12 «ታኒ ሃ አዳስ ካሂኔ ሃላቃታፔ ማታኔ ኪታ ኤካዳ ዳማስቆ ባይስ። 13 ካዋው፣ ታኒ ሴታ ጋላስ አጊያን ዴዒሺን አዋ ፖዎፔ ዳሮ አዲያ ፖዎይ ታ ዩሹዋኒኔ ታራ ቤይሳታ ዩሹዋን ሳሎፔ ፖዒስ። 14 ኑኒ ኡባይካ ሳዓን ኩንዲዳ ዎዴ ኢብራይስጪ ዶናን፣ ሳዎላ፣ ሳዎላ፣ ታና አይስ ጎዳይ? ኔኒ ኔና ጫዲያ ፃምዓ ቃኪኮ ኔና ቆሃሳ) ያጊዲ ታው አዲሺን ሲዓስ።

15 «ታኒ፣ ሳዳው፣ ኔኒ አኔ?» ያጋስ።

«ጎዳይ፣ ሳዳው፣ ኔኒ ጎዲያ ዩሱሳ፤ 16 ሺን ዴንዳ ኤቃ። ሃቺ ኔኒ ታና ቤዒዳይሳኒኔ ሲንሳፌ ታ ኔና ቤሳኝሳ ሃራታስ ማርካታና ሜላ ታ አሳንቾ አሳዳ ኔና ሹማናው ኔው ቤንታስ። 17 ኢስራዔሌ አሳታፔኔ ታኒ ኔና ኤንታኮ ኪቲያ አይሁዴ ጊዶናይሳታፔ ኔና አሻና። 18 ኔኒ ኤንታ አይፊያ ዶያና፣ ዲማፔ ፖዎኮ፣ ፃላሄ ኩሼፔ

የሳኮ ኤንታ ዛሬና። ኤንቲ ታናን አማኒዲ ናጋራ አቶቴሳ ኤካና።
የሳይ ዶሪዳ አሳ ጊዶን ባንታ ላታ ዴማና» ያጊስ።

19 «ካዋው አጊርጳ፥ ሄሳ ጊሾ፥ ታው ሳሎፕ ቤንቲዳ ቆንጩሳስ ኪቱታናይሳ ኢፃቢኬ። 20 ሺን ታኒ ኮይሮታዳ ዳማስቆን ሄሳፌ ጉዬ ዩሩሳላሚኒኔ ዩሁዳ ቢታ ኡባን ዴዔይሳቲኔ አይሁዴ ጊዶናይሳቲ ባንታ ናጋራፕ የሳኮ ሲማና ሜላኔ ናጋራፕ ሲሙዋ ቤሲያ አሶ አሳና ሜላ ቃላ አዳስ። 21 ሄሳ ጊሾ፥ አይሁዴቲ ታና የሳ ኬሳን አይኪዲ ዎዳናው ኮዩዶሶና። 22 ሃቺ ጋካናው የሳ ማዴይ ታፕ ሻኬቲቤና፤ ያኒያ ጊሾ፥ ጉሳሲኔ ጊታስ ማርካታሽ ሃይሳን ኤቃስ፥ ናቤቲኔ ሙሴይ ሃናና ጊዲ አዲዳይሳፌ ሃራ ኢሲባካ ታኒ አዲዳባይ ባዋ። 23 ሄሲካ፥ «ኪሪስቶሲ ዋዬ ኤካናው ቤሴስ፤ ቃሲ ሃይቆፕ ኮይሮ ዴንዲዲ አይሁዴታሲኔ አይሁዴ ጊዶናይሳታስ አቶቴሳ ፖዎ አዳናው ቤሴስ» ጊዳይሳ» ያጊስ።

24 ጳውሎሲ ሄሳ ያጊዲ ዛሪሺን፥ ፊስዎሲ ባ ቃላ ጴቁ አሲዲ፥ «ጳውሎሳ፥ ኔ ጎያዳሳ፤ ኔ ዳሮ ቲሚርቴይ ኔና ጎሻስ ጋሴስ» ያጊስ።

25 ሺን ጳውሎሲ፥ «ቦንቾ ፊስዎሳ፥ ታኒ ቱማባኔ ቤሲያባ አዳይሲፕ አቲን ጎያቢኬ። 26 ታኒ ቆንጩን አዲያ አዳ ካዎይ ኤሬስ። ሃ አዳይ ጌማን አሴቲቦና ጊሾ ኢሶይካ ኢያፕ ጌዋናይሳ ታኒ ጌሻዳ ኤራይስ።

27 «ካዋው አጊርጳ፥ ኔኒ ናቤታ አማናሳ ጊዲኪ? ኔኒ አማኔይሳ ታኒ ኤራይስ» ያጊስ።

28 ካዎይ አጊርጳ፥ ጳውሎሳኮ፥ «ሃ ጉሳ ሳቴን ታና አማንሳናው ኮያይ?» ያጊስ።

29 ጳውሎሲ፥ «ዳሮ ዎዴ ጊዲን ጉሳ ዎዴ ኔ ፃላላ ጊዶናሺን ሃቺ ታና ሲዲያ ኡባይ ሃ ቃሹዋፕ አቲን ታ ሜላ ጊዳና ሜላ የሳ ዎሳይስ» ያጊስ።

30 ሄሳፌ ጉዬ፥ ካዎይ ፊስዎሲ፥ ባርኒቄይኔ ኤንታራ ኡቲዳ ኡባይካ ዴንዲዶሶና። 31 ያፕ ኬዩዲ ቢሽ ኢሶይ ኢሱዋራ፥ «ሃ ኡራይ ሃይቆስ ዎይኮ ቃሾስ ጋሴያባ አይኮካ አሴቤና» ያጊዲ አዴቲዶሶና። 32 አጊርጳ ፊስዎሳኮ፥ «ሃ ኡራይ «ቄሳሬይ ታባ ፒርዶ» ጎናኮ ቢሌታናው ዳንዳዔስ፥ ሺን አቲስ» ያጊስ።

27

ጳውሎሲ ሮሜ ቢስ

1 ኑኒ ማርካቤራ ፃሌ ባናው ቃቺዳ ዎዴ አወጊስዎሳ ዎታዳሬታ ጌቴቴይሳታፕ ኢሲ ዩሊዮሳ ጊያ ማቶ ሃላቃስ ጳውሎሳኔ ሃራ

26:20 ሃ.አ 9:20፥ 28-29 26:23 1ቆሮ 15:20፥ ኢሳ 42:6፥ 49:6

ጉሳ ቃሾ አሳታ ኢሚዶሶና። 2 ኢሲያ ጋፃን ዴዲያ ቢታታ ቢያ አዲራሚዲያኑ ማርካቤን ጌሊዲ ዴንዲዳ። ማቄዶኒያ አሲ ጊዲዳ ቴሴሎንቄ አርስባሮኮሲ ኑራ ዴዴስ።

3 ዎንቴላ ጋላስ ኑኒ ሲዶና ጋኪሺን፣ ዩሊዮሲ ጳውሎሳስ ኬሂዲ ባ ላጌታኮ ቢዲ ኮሺያባን ማዴታና ሚላ ኤንታኮ ዩዲስ። 4 ያፕ ዴንዲዲ ሲንሳራ ኑ ቦላ ጫርኪያ ጊሾ ሃላን ቴቁቲዳ ቢታ፣ ቆጲሮሳን ዜምፒዲ አዲዳ። 5 ኪልቁያኔ ጲንፊሊያ ማታን ዴዲያ አባ ፒኒዲ ሊቁያን ዴዲያ ሙራ ጋኪዳ። 6 ያን ማቶ ሃላቃይ ፃሌ ቢያ ኢስኪንዲሪያ ማርካቤ ዴሚዲ፣ ኢያን ኑና ጌልሲስ።

7 ኑኒ ዳሮ ጋላስ ሎዳራ ቢዲ፣ ዳሮ ሜቶን ቃንዶሳ ካታማ ማታ ጋኪዳ። ያራ ባናው ኑና ጫርኮይ ዲጊን ሳልሞናራ አዲዲ ሃላን ቴቁቲዳ ቢታ፣ ቃርዲሳን ዜምፒዲ አዲዳ። 8 ዳሮ ሜቶን ጋፃ ጋፃ አይኪዲ ላሲያ ካታማ ማታን ዴዲያ አባ ዶናን «ማርካቤይ ዎፑ ጊዲ ሽምፒያሶ» ጊያ ቤሳ ጋኪዳ።

9 ኑኒ ያን ዳሮ ዎዲያ ጋምዲዳፕ ጉዬ ዎሚ ቢሌቲን፣ ማርካቤራ ቡሲ ሜቲያ ጊሾ ጳውሎሲ ኤንታ ዞሪስ። 10 «አሳው፣ ኑ ቡሳን ጊታ ቦሺኔ ዳሮ ቆሆይ ዴዴይሲ ታው ቤንቴስ፤ ቆሆይ ጫና ቦላኔ ማርካቤያ ቦላ ፃላላ ጊዶናሺን ኑ ዴዑዋ ቦላካ ጋካና» ያጊስ። 11 ሺን ማቶ ሃላቃይ ጳውሎሲ ጊዳይሳፌ አሲዲ ማርካቤያ ላጌይሲኔ ማርካቤያ ጎዳይ ጌይሳ አማኒስ። 12 ሄ አባ ዶናን ዴዲያ ካታማይ ባልጎ አጌና አላናው ኤንታው ኢንጄቶና ጊሾ ዳሪያ አሳቲ ባንታው ዳንዳዴቲኮ ፊንቄ ካታማ ጋኪዲ ባልጎ አጌና ያን አላናው ዞራቲዶሶና። ፊንቄይ ፑዴሃ-ዉሎሃፕኔ ዱጌሃ-ዉሎሃፕ ጊዶን አባ ዶናን ዴዲያ ካታማ።

አባ ቦላ ጎቴይ ዴንዲስ

13 ካዉሻ ዱጌሃ ጫርኮይ ሎዳራ ጫርኪዳ ዎዴ ባንታ ቆፒዳይሳዳ ሃኒዳባ ዳኒን ዴንዲዲ፣ ማርካቤይ ቃያና ሚላ አይኪያ ቢራታ ፑዴ ኤኪዲ ቃርዲሳ ማታራ አዲዶሶና። 14 ሺን ዳሮ ጋምዎና «አዉራቁስ» ጊያ ዎልቃማ ጎቴይ ሃላን ቴቁቲዳ ቢታፌ ዱጌ ኤንታ ቦላ ዴንዲስ። 15 ሄ ጎቴይ ማርካቤያ ሱጊዲ ኤፎና ዲጊዳ ጊሾ ጫርኮይ ማርካቤያ ባ ዶሲዳ ሶ ኤፊስ።

16 ኑኒ ቄዳ ጊያ ሃላን ቴቁቲዳ ቢታ ዜምፒዲ ቢሽ ዳሮ ሜቶቴቲዲ ማርካቤያ ዎጎሉዋ አሻናው ዳንዳዲዳ። 17 ኤንቲ ዎጎሉዋ ፑዴ ኪሲዳፕ ጉዬ ዎዶሩዋን ማርካቤያ ቦላ ፃፂዲ፣ ሚንሲ ቃቺዶሶና። ሱርቲሳ ጊያ ሻፊያን ባንታና ዶምዴላና ጊዲ ሂርጊዲ፣ ማርካቤያ ሻራ ዎዲሲዲ ማርካቤያ ጮ ዩዲ አጊዶሶና።

18 ጎቴይ ዎልቃሚሽ ቢን ዎንቴላ ጋላስ ጫናፕ ባጋ አባን ሆሎ አይኪዶሶና። 19 ሄቫንሶ ጋላስ ማርካቤያ ሚሺያ ኤኪዲ ባንታ ኩሽን ሆሊዶሶና። 20 ኑኒ ዳሮ ጋላስ አዋ አይፌኔ ያሲንቶ ቤያና

ጊሮኔ ወልቃማ ኡሾይ ኑ ቦላ ኡሺዳ ጊሾ ሲንፋሬ ሼምፖራ አታና ጊዲ ቆፒቦኩ።

21 ሄ ወዴ ኤንቲ ዳሮ ጋላስ ካሲ ሞና ጋምዲዳ ጊሾ ጳውሎሲ ኤንታ ጊዶን ዴንዲ ኤቂዲ፣ «አሳው፣ ሂንቴ ታ ዞሪያ ኤኪዲ ቃርዪሳፕ ዴንዶና አጊዳኮ ሃ ሜቶይኔ ቆሆይ ኑና ጋኬና። 22 ሺን ታኒ ሂንቴና ያዮፊቴ ጋዳ ዞራይስ፤ አይስ ጊኮ፣ ሃ ማርካቤይ ዳያናፕ አቲን ሂንቴፊ ኢሲ አሳ ሼምፖይካ ዳዮና። 23 ዚኔ ቃማ ታ ኢያባ ጊዲዳይሲኔ ታ ጎይኒያ ያሳይ ኪቲዳ ኪታንቾይ ታ ማታን ኤቂዲ፣ 24 «ጳውሎሳ፣ ያዮፋ፤ ኔኒ ሮሜ ካወዋ ቁሳሬ ሲንፋን ኤቃናው ቤሴስ። ሄኮ ያሳይ ኔ ጊሾ ኔራ ቢያ አሳ ኡባ ሼምፕዋ አሺስ» ያጊስ። 25 ሄሳ ጊሾ፣ አሳው፣ ያዮፊቴ። ሄ ኪታንቾይ ታው አዲዳይሲ ሃናናይሳ ታኒ አማናይስ። 26 ሺን ጫርኮይ ኑና ኤፊዲ ኢሲ ሃሳን ቴቂቲዳ ቢታ ጋፃን ሆላና» ያጊስ።

27 ታማኔ አይዳንሶ ቃማን ሜዲቲራኔ አባን ኑና ጫርኮይ ጌዴኔ ሃ ሱጊሺን፣ ጊዲ ቢላሄ ጊዲያ ወዴ ማርካቤያን አጴይሳታስ ቢታኮ ማቲዳባ ዳኒስ። 28 ኤንቲ ጩሞቴሳ ኤራናው ኮዩዲ ወዶሮ ዪራን ዴዲያባ ቃቺዲ አባን ዩጊን፣ አባይ ሆስፑን ታሙ ዋዳ ጊዲስ። ጉሲ ጋምዲዲ፣ ዛሪ ዩጊን ኡሱፑን ታሙ ዋዳ ጊዲስ። 29 ኤንቲ አባ ጋፃን ዴዲያ ሹቻን ዶምዔቶና ሜላ ያዩዲ፣ ማርካቤይ ቦና ሜላ አይኪያ አይዱ ቢራታታ ማርካቤያፕ ጉዩራ አባን ዩጊዲ፣ ሳዳይ ዎንታና ሜላ ያሳ ዎሶሶና። 30 ማርካቤያን አጴይሳቲ ማርካቤያፕ ባቃታናው ኮዩዲ፣ ማርካቤይ ቦና ሜላ አይኪያ ቢራታታ ማርካቤያፕ ሲንፋ ባጋራ አባን ዩጊያ ዳኒን ዎጎሎዋ አባን ዩጊዶሶና። 31 ጳውሎሲ ማቶ ሃላቃኮኔ ዎታዳሬታኮ፣ «ሃይሳቲ ማርካቤያን ሼምፕ ኡቶና ኢዲኮ ሂንቴ አታናው ዳንዳዔኪታ» ያጊስ። 32 ሄሳ ጊሾ፣ ዎታዳሬቲ ዎጎሎይ ቃሹቲዳ ወዶሩዋ ቃንዲዲ ዩዲ አጊዶሶና።

33 ሳዲ ዎንታና ሃኒሺን ኡባይ ካሲ ማና ሜላ ጳውሎሲ አሳኮ፣ «ሂንቴ ካሲ ሞና ናጊሼ ሃቺራ ታማኔ አይዱ ጋላስ ጋምዲዴታ።

34 ሄሳ ጊሾ፣ ጉሳ ካሲ ሂንቴ ማና ሜላ ታኒ ሂንቴና ዎሳይስ። ሂንቴ ጋሽታና ሜላ ጉሳ ካሲ ማናው ኮሺስ፤ ሃሪ አቶሺን ሂንቴ ሁዔ ቢናናፕ ኢሶይካ ዳዮና» ያጊስ። 35 ጳውሎሲ ሄሳ ጊዲ ኡይሲ ኤኪዲ ኡባ ሲንፋን ያሳ ጋላቲስ፤ ኡይሳ ሜንሲዲ ሙሱ ዶሚስ። 36 ኡባይ ሚኔቲዲ ባንታው ካሲ ኤኪዲ ሚዶሶና።

37 ኑኒ ማርካቤያን ዴዔይሳቲ ናምፀ ዪታኔ ላፑን ታማኔ ኡሱፑና።

38 ኤንቲ ሚዲ ካሊዳ ወዴ ጫና ጊስቲያ አባን ዩጊዲ ማርካቤያ ዴፀዋ ካወሺዶሶና።

ማርካቤይ ሜዲስ

39 ሳሊ ዎንቲዳ ዎዴ ማርካቢያ አሳንኛቲ አው ቢታ ጋኪዳኮ ኤርናሺን፣ አባ ጋፃን ዴሲያ ሻፌኔ ሲሊሞ ቤሂዶሶና። ባንታው ዳንዳዔቲኮ ማርካቢያ ሄ ሻፌያኮ ሺሻናው ቆጥዶሶና። 40 ያቲዲ፣ ማርካቢይ ቦና ሜላ አይኪያ ቢራታታ ቢርሺዲ አባን ዩጊዶሶና። ሄ ዎዴ ላጊያ ሚላ ቃቺያ ዎዶሩዋ ቢርሺዶሶና። ሄሳፌ ጉዬ፣ ጫርኮይ ማርካቢያ ሲንፅ ሱጋና ሜላ ማርካቢያ ኤፊያ ሻራ ሲንሳ ባጋራ ጶቁ አሲዲ ቡሱ ዶሚዶሶና። 41 ሺን ማርካቢይ ሻፌ ዶሬን ዶምዔቲዲ ሚቴቲስ። ማርካቢያስ ሲንሳ ባጋይ ፀጉኒዲ ሻፌያ ጫዲ አይኪያ ቃዎና ኢዲን፣ ጉዬ ባጋይ ዙሊያ ሱጊላን ሜቁሬቴሲ አይኪስ።

42 ዎታዳሬቲ ቃሾ አሳፔ ኢሶይካ ሃላ ዋዲዲ ኬሲ ኤኮና ሜላ ኤንታ ዎዳናው ዞሬቲዶሶና። 43 ሺን ማቶ ሃላቃይ ጳውሎሳ አሻናው ኮዶዲ ዎታዳሬታ ዞሬታ ኢዲስ። ሃፅ ዋዶ ኤሪያ ኡባይ ማርካቢያፔ ሃላን ጉፒ ጉፒ ዎዲዲ ካሴቲዲ ጋፃ ኬያና ሜላ ኪቲስ። 44 አቲዳይሳቲ ሳንቃ ቦላኔ፣ ማርካቢያ ሜዑዋ ቦላ ኬያና ሜላ ኪቲስ። ሄሳዳ ሃኒዲ ኡባይ ጋፃ ሳርራ ኬዶዶሶና።

28

ጳውሎሲ ማልታ ጊያ ሃላን ቴቁቲዳ ቢታ ቢስ

1 ኑኒ ጋፃ ሳር ኬዶዳ ዎዴ ጋኪዳ ሃላን ቴቁቲዳ ቢታይ ማልታ ጌቴቴሳ ኤሪዳ። 2 ማልታ አሳይ ኑስ ዳር ኬሃ ኬሂዶሶና። ኢሪ ቡኪያ ጊሾኔ ሜጊያ ጊሾ ታማ ኤሲዲ ኑና ኡባ ሞኪዶሶና። 3 ጳውሎሲ ዳር አፊራ ሺሺዲ ታማን ዎሊሺን፣ ሾሺ ሴላ ጊሾ ኬዶዲ ኢያ ኩሺያ ቦላ ፃዔቲዲ ኢያ ዱኪስ። 4 ማልታ አሳይ ሾሺ ጳውሎሳ ኩሺን ፃዔቲዳይሳ ቤሂዳ ዎዴ ኢሶይ ኢሱዋኮ፣ «ቱማ ሃ ኡራይ ሺምፖ ዎዲዳ አሲ፤ ሃሪ አቶሺን አባፌ ኢ አቲንካ ዶሳ ፐርዳፌ * አቲዲ ፓፃ ዳናው ዳንዳዔቢና» ያጊዶሶና። 5 ሺን ጳውሎሲ ባ ኩሺያፔ ሾሻ ወፃርኪዲ፣ ታማን ዩጊስ፤ ኢያ አይኮካ ቆሂቤና። 6 ኤንቲ፣ «ኢያ አሳቴላይ ኪዔስ፣ ዎይኮ አኪኮና ኩንዲዲ ሃይቁስ» ጊዲ ናንሶና። ሺን ዳር ዎዴ ናጊዲ ኢያ አሳቴላን አይቢካ ዱማቲዳባይ ዳዩን፣ «ሃይሲ ዶሴ» ያጊዲ ባንታ ቆፋ ላሚዶሶና። 7 ሄ ሄራን ሃላን ቴቁቲዳ ቢታ ሃላቃ፣ ፑፕሊዮሳ ጌይሳስ ጋዶይ ዴዔስ፤ ሄዙ ጋላስ ጋካናው ኢ ኑና ሲቆን ሞኪስ። 8 ፑፕሊዮሳ አዋይ ቆዎ፣ ሚሻኔ ኡሎ ኡቲሶን ሃርጌቲዲ ዜንዲዲ ዴዔስ። ጳውሎሲ ኢያ ሶ ጌሊዲ ኢያው ዶሳ ዎሲስ፤ ባ ኩሺያ

* 28:4 ዶሳ ፐርዳፌ፡ ሄ ዎዴ ሄ ቢታን ዱማ ዱማ ማጫ ዶሳቲ ዴዎሶና፣ ኤንታፌ ኢሲኒያ ኢታ አሲያ አሳ ፐርዲያሮ። ኢያ ፐርዳ ዶሲ ጌቴታ ዩጊታሱ።

ኢያ ቦላ ዎሲዲ ፓሲስ።⁹ ሄሳፌ ጉዬ፥ ማልታን ዴዲያ ሃርጊያ ሃራ አሳቲካ ዪዲ ፓዲዶሶና።¹⁰ ኤንቲ ኑና ዳሮ ቦንቺዶሶና፤ ኑኒ ማርካቤራ ባናው ዴንዲዳ ዎዴ ኦጌስ ኮሺያባ ኑስ ኢሚዶሶና።

ጳውሎሲ ማልታፊ ሮሜ ቢስ

¹¹ ሄሹ አጊናፔ ጉዬ፥ ማልታን ባልጎ አሲዲ ኢስኪንዲሪያ ማርካቤራ ባናው ዴንዲዳ። ሄ ማርካቢያ ቦላ ዲዮስቆሮሳ ጊያ ሜንቴ ኤቃታ ሚሲሌይ ዴዴስ።¹² ሲራኩሴ ካታማ ጌሊዲ ያን ሄሹ ጋላስ ኡቲዳ።¹³ ያፔ ዴንዲዲ ሬጊዮሜ ካታማ ጋኪዳ። ኢሲ ጋላሳፔ ጉዬ፥ ዱጌሃ ባጋ ጫርኮይ ጫርኪን፥ ዎንቴላ ጋላስ ፕቲዮሌ ካታማ ጋኪዳ።¹⁴ ያን ኑኒ ኢሲ ኢሲ አማኒያ አሳታ ዴሚን፥ ባንታራ ሳሚንታ ጋምዓና ሜላ ኑና ዎሲዶሶና። ሄሳፌ ጉዬ፥ ሮሜ ቢዳ።

¹⁵ ሮሜን ዴዲያ አማኒያ አሳቲ ኑባ ሲዲዲ፥ አፊዮሳ ጊያን፥ ሄሹ አቂዶሶ ጊያ ቤሳ ጋካናው ኑና ሞካናው ዪዶሶና። ጳውሎሲ ኤንታ ቤዲዳ ዎዴ ያሳ ጋላቲዲ ሚኔቲስ።

ጳውሎሲ ሮሜን

¹⁶ ኑኒ ሮሜ ጌሊዳ ዎዴ ጳውሎሲ ባና ናጊያ ዎታዳሪያራ ባርካ ዴዎ ጌቴቲስ።

¹⁷ ሄሹ ጋላሳፔ ጉዬ፥ ጳውሎሲ አይሁዴታ ሃላቃታ ባኮ ዪጊሲስ። ኤንቲ ሺቂዳ ዎዴ ኤንታኮ፥ «ታ ኢሻቶ፥ ታኒ ኑ አሳ ዎይኮ ኑ አዋታ ዎጋ ቦላ አይቢ ቆሆካ አሳቢኬ፥ ሺን ታና ዩሩሳላሜን ቃቺዲ ሮሜ አሳስ አሲዲ ኢሚዶሶና።¹⁸ ኤንቲ ታ ሞቱዋ ቤዲዲ ሃይቆስ ጋሲያባ ታ ቦላ አይቢባካ ዴሚቦና ጊሾ ታና ቢላናው ቆፒዶሶና።¹⁹ ሺን አይሁዴቲ ሄሳ ኢዲዳ ዎዴ <ታባ ቄሳሬይ ፒርዶ> ያጋሲፔ አቲን ታኒ ታ ዴሪያ ሞቲያባይ ዴዲን ጊዴና።²⁰ ታኒ ሂንቴና ዪጊሲዳይ ሂንቴና ቤዓናውኔ ሂንቴው ሃይሳ አዳናሳ። ታኒ ሃ ሳንሳላታን ቃሼቲዳይ ኢስራዴሌ አሳይ ናጊያ ኡፋይሳ ጊሾሳ» ያጊስ።

²¹ አይሁዴ ሃላቃቲ ጳውሎሳኮ፥ «ኑስ ዩሁዳፔ ኔባ ዓፌቲዳ ዳብዳቤይ ጋኪቤና፥ ያፔ ዩዳ አሳታፔ ኢሶይካ ኔባ ኢታ አዲዳይ ባዋ።²² ሺን ሃ ኔ ካሊያ አማኑዋ ዱማ ዱማ ቤሳን አሳይ ኢዪይሳ ኑኒ ኤሪያ ጊሾ ኔ ቆፋ ሲዓናው ኮዮስ» ያጊዶሶና።

²³ ኤንቲ ባንታ ያና ጋላስ ጳውሎሳስ ቃፃሪዲ፥ ሄ ጋላስ ዳሪዲ ኢ ዴዲያሱዋ ዩዶሶና። ኢ ዎንታፌ አማርሲ ጋካናው ያሳ ካዎቴላባ ኤንታው ማርካቲስ። ቃሲ ኤንቲ ዩሱሳባ አማናና ሜላ ሙሴ ሂጊያፌኔ ናቤታ ማፃፍፔ ቆንጨሲዲ ኤንታ ታማርሲስ።²⁴ ኢሶቲ ኢሶቲ ጳውሎሲ ጊዳይሳ አማኒዶሶና፥ ሺን ሃራቲ አማኒቦኮና።

28:19 ሃ.አ 25:11

25 ኤንቲ ባንታ ጊዶን አዳ ማዖና ኢጊዳ ዎዴ ጳውሎሲ ኢሲባ ጊዳፕ ጉዩ ቢዶሶና። ኢ ሃይሳዳ ያጊስ፡ «ጌሻ አያናይ ኑ አዋታስ ናቢያ ኢሳያሳ ዶናን አዲዳይሲ ቱማ።

26 ሄኒ ሄ አሳኮ ባዳ።

ሂንቱ ሲሳ ሲዔታ። ሺን ሂንቱው ጌሌና፤

ሂንቱ ቤዖ ቤዔታ። ሺን ዴሜኬታ።

27 ሃ አሳ ዎዛናይ ሙሚስ፤

ኤንታ ሃይሳይ ቱሊስ፤

ኤንታ አይፌይካ ጎዜቲስ።

ሄሲ ባይኔኮ።

ኤንቲ ባንታ አይፌያን ቤዒዲ፣ ባንታ ሃይሳን ሲዒዲ፣ ባንታ ዎዛናን አኬኪዲ፣

ኤንቲ ታኮ ሲማና፤

ታካ ኤንታ ፓሳናሺን) ያጋ» ያጊስ።

28 «ሂዛ፣ ሃይሲ ዎሳ አቶቴሳ ኪታይ አይሁዴ ጊዶናይሳታስ ጊዴይሳ ኤሬታ። ኤንቲካ ሲዓና» ያጊስ።

29 ጳውሎሲ ሄሳ ጊዳፕ ጉዩ አይሁዴቲ ባንታ ጊዶን ዳሮ ፓላሚሼ ኬዩዲ ቢዶሶና።

30 ጳውሎሲ ኬራ ኬሳን ናምው ላይሲ ኩሜሲ ዴዒስ፤ ያን ዴዒሼ ባኮ ያ ኡባ ሞኬስ። 31 ያሺ ባይናኔ አኒካ ዲጎናሺን ዎሳ ካዎቴሳባ ሳባኪስ፤ ጎዳ ዩሱስ ኪሪስቶሳባ ቆንጫሲዲ ታማርሴስ።

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5